

Ke Meupiya ne Tudtul Mekeatag ki Hisu Kristu ne Miguhud ni Mateo

*Ke Kepuun ni Hisu Kristu
(Lucas 3:23-38)*

¹ Ini se guhud te kepuun ni Hisu Kristu, kevuwaran ni David wey kevuwaran dema ni Abraham.

² Si Abraham ke amey ni Isaac, ne si Isaac ne amey ni Jacob, si Jacob ne amey ni Hudah wey ke menge suled din.

³ Ne si Hudah ne amey en ni Paris ki Sara, (si Tamar ke iney ran);

ne si Paris ne amey ni Iserum, ne si Iserum ne amey ni Aram;

⁴ ne si Aram ne amey ni Aminadab, ne si Aminadab ne amey ni Naasun, ne si Naasun ne amey ni Salmun,

⁵ ne si Salmun ne amey ni Buus (si Rahab ke iney rin),

si Buus ne amey ni Ubid

(si Ruth ke iney rin),

si Ubid ne amey ni Isai,

⁶ ne si Isai ne amey ni Datu David.

Si David ke amey ni Salomon

(ke iney rin ne esawa rengan ni Uriya);

⁷ Si Salomon ne amey ni Rubuam,

si Rubuam ne amey ni Abiyas,

si Abiyas ne amey ni Asa,
8 si Asa ne amey ni Husapat,
si Husapat ne amey ni Hiram,
si Hiram ne amey ni Usiyas,
9 si Husiyas ne amey ni Hutam,
si Hutam ne amey ni Akas,
si Akas ne amey ni Isikyas,
10 si Isikyas ne amey ni Manasis,
si Manasis ne amey ni Amun,
si Amun ne amey ni Husyas,
11 ne si Husyas ne amey ni Hikunyas wey ke
menge suled din. Ini se hewii ne neviyag ke
menge Israyil diyà te inged ne Bebilunya.

12 Guna su diyà dan en te inged ne Bebilunya
ne nevuwad si Hikunyas ne iyan din anak ne si
Selatil,
si Selatil ne amey ni Serubabil,
13 si Serubabil ne amey ni Abiyud,
si Abiyud ne amey ne Iliyakim,
si Iliyakim ne amey ni Asur,
14 si Asur ne amey ni Saduk,
si Saduk ne amey ni Akim,
si Akim ne amey ni Iliyud,
15 si Iliyud ne amey ni Iliasar,
si Iliasar ne amey ni Matan,
si Matan ne amey ni Jacob,
16 si Jacob ne amey ni Jose, ke esawa ni Maria ne
iney ni Hisus ne ed-ingaranan ki Mesiyas, ne iyan
din meana ne impasad te Eleteala ne Ebperetuen
te langun.

17 Ketà be ne igenat ki Abraham taman te
kineanak ki David ne sepulù wey epat ne lapis.
Ne igenat ki David taman te kinekeviyag dan

diyà te inged ne Bebilunya ne sepulù wey epat ded ne lapis. Ne igenat te kinekeviyag dan taman te kineanak ki Hisu Kristu ne sepulù ded dema wey epat ne lapis.

*Ke kineanak ki Hisu Kristu
(Lucas 2:1-7)*

¹⁸ Iring kayi se ned-ulaula te kineanak ki Hisu Kristu. Nepesaran en se ed-esawaen ke iney rin ne si Maria ni Jose, ugaid ne warà den pà mekedtimpung ne netuenan ni Maria te mehingey sikandin egenat te gehem te Kedese-nan ne Ebpetuntul te Menusiyà.

¹⁹ Si Jose ini ne egkeesawa rin ne metidtu ne etew, ugaid ne warà din metueni ke engkey se amey rut te vatà. Tembù be nepegitung din se kenà din edleusan te ed-esawa si Maria asal ed-usayen dà te meeles su apey kenà meyeyai si Maria.

²⁰ Ne gewii rin te ebpegpegitung kayi ne nekelipereng sikandin ne mibpekita ke suluhuen te Kerenan kayi te tehinep din se egkahi te, “Jose, sikuna ne kevuwaran ni David, kenà ka egkeandek ne ebpengesawa ki Maria su arà se ibmehingey rin ne egenat te gehem dut te Kedese-nan ne Ebpetuntul te Menusiyà.

²¹ Ne ed-anak sikandin te meama ne iyan nu id-ingaran ne si Hisus su sikandin ke ebpelihuan te menge etew rin dut te menge salà dan,” ke se suluhuen.

²² Langun kayi ne ned-ulaula su apey metuman ke impekahi rengan te Kerenan dut te ebpelambas te lalag din ne egkahi te,

²³ “Ebmehingey ini se raha ne warà pà mebeyugi ne ed-anak te meama ne iyan id-ingaran ne si Imanwil” (ne iyan din meana ne “Ke Eleteala ne kayi en te kenitew”).

²⁴ Guna su nekehimerat si Jose ne midtuman din ke insuhù dut te suluhuen te Kerenan ne mid-esawa rin si Maria.

²⁵ Ugaid ne warà din pà uvaya si Maria taman te warà pà mid-anak. Guna su mid-anak en ne mid-ingaranan ni Jose ini se batà ne meama ki Hisus.

2

Nekeuma ke Menge Etew ne riyà ebpuun te Edsilaan su Ebpengarap ki Hisus

¹ Diyà in-anak si Hisus te inged ne Bitlihim lusud te Hudiya te gewii te iyan egkamal te inged ne datù ne ed-ingeranan ki Hirudis. Warà meuhet ne ruen menge etew ne metau te bituen riyà ebpuun te Edsilaan ne nekeuma riyà te Hirusalim.

² Nekeuma ran ne mid-insà dan se egkahi te, “Endei ke behu pà ne in-anak ne vatà ne midtendù ne edetuen te menge etew ne Hudiyanen? Su nekita rey ke bituen ne edlepew riyà te inged dey ne rapat te Edsilaan ne tuus te in-anak en sikandin, tembù be mibpengkayi key su ebpengarap key kandin.”

³ Guna su nerineg ni Hirudis ini ne warà meupiya ne itungan din, ne iring ded dema ketà ke langun ne menge etew te inged ne Hirusalim.

⁴ Ketà ne miburun din ke langun ne menge mepurù te terebpelengesa te menge Hudiyanen

wey ke minge meysterù te penduan dan ne mid-insaan din sikandan te, “Èndei igkeanak ke Impasad te Eleteala rengan ne Ebperetuen te langun?”

⁵ “Diyà te inged ne Bitlihim lusud kayi te Hudiya,” ke sikandan, “su ini ke impesurat dut te ebpelambas te Lalag te Eleteala rengan se egkahi te,

⁶ ‘Sikiyu ne minge etew te inged ne Bitlihim lusud te Hudiya,
misan deisek ke inged niyu ne kenà sikiyu ke mewri
dut te minge inged ketà;
su riyà te keniyu ne ruen edlepew
ne ebpenheewit dut te minge sakup ku
ne minge kevuwaran ni Israyil.’ ”

⁷ Guna su nerineg ni Hirudis ini ne midtawag din ke behu pà ne nekeuma ne riyà ebpuun te Edsilaan te in-eles din ne mid-insaan din sikandan ke keenu medlepew ini se bituen ne nekita ran, ne netuenan din ketà te kandan.

⁸ Ketà ne impependiyà din en sikandan te Bitlihim se egkahi te, “Pendiya kew en ne eyeyari niyu te ebpemengà arà se vatà. Ne embiya egketuen niyu ne lived kew kayi ne peketueni niyu kedì su apey a mekependiyà su ebpengarap a rema.”

⁹ Nerineg den dà ini ne mid-ipanew ran en. Ne gewii te ed-ipanew ran ne ketà en maa ke bituen ne nekita ran te riyà dan pà te Edsilaan su mid-una kandan taman te edrenged en ketà te neubpaan te batà.

¹⁰ Nekita ran dà ke bituen ne nehalew ran nevenar.

¹¹ Midlusud dan ketà te valey ne nekita ran ke vatà wey ke iney rin ne si Maria ne midlumpeng dan se ebpengarap kandin. Ne ketà ne mibukaan dan ke midtehuan te ibehey ran kandin ne indenà dan diyà te kandin ke bulawan, mepurù ne rukut, wey periyemut ne ed-ingaranan te mira.

¹² Ne guna su ed-uli dan en ne impesabut kandan te Eleteala impepevayà te tehinep te kenà dan en medlived diyà te ki Hirudis. Ne ketà ne riyà dan en mibpevayà te seveka ne ralan te kineulì dan en.

Impelahuy ni Jose wey si Maria ke vatà Diyà te inged ne Ihiptu

¹³ Guna su migenat en ke minge meama ne riyà ebpuun te Edsilaan ne mibpetehinep en ke suluhuen te Kerenan ki Jose se egkahi te, “Enew ke en ne kua nu ke vatà wey ke iney rin ne pelahuy kew riyà te inged ne Ihiptu. Ne kenà kew awà diyà taman te kenà ku ebpeulien sikiyu su ebpemenganan ni Hirudis ayan se vatà su ed-imetayan din.”

¹⁴ Ne arà dà ne mid-enuw si Jose ne mid-ewit din ke vatà wey ke iney rin te arà dà ne kerukileman te ebpendiyà te inged ne Ihiptu.

¹⁵ Ne riyà dan mid-ubpà taman te minatey en si Hirudis.

Ned-ulaula ini su apey metuman ke impekahi te Kerenan rengan dut te ebpelambas te Lalag din ne si Husiyas ne egkahi te, “Impeuli ku ke Anak ku riyà ebpuun te inged ne Ihiptu.”

Mibpeimetayan ni Hirudis ke menge Batà ne Meama Diyà te Bitlihim

¹⁶ Guna su netueanan ni Hirudis te negaga rà sikandin te itungan dut te menge meama ne riyà ebpuun te Edsilaan ne neregreg sikandin te langet din. Ne insuhù din te ebpeimetayan ke langun ne menge vatà ne meama diyà te inged ne Bitlihim wey ketà te nekelingut ne menge inged ne egenat te deruwa pà ne rahun taman te behu pà ne in-anak su mid-antap din dut te nerineg din ketà te menge etew ne riyà ebpuun te Edsilaan ne nekederuwa en ne rahun igenat dutun te nekita ran ke bituen.

¹⁷ Ne ketà ne netuman en ke impekahi rut te ebpelambas te Lalag te Eleteala rengan ne si Jeremias ne egkahi te,

¹⁸ “Duen nerangkub ne egkerineg diyà te inged ne Rama,
ne edsinehew wey ebpenderawit.
Su ebpenderewitan ni Raquel ke menge anak din,
ne kenè en egkelangan ke hinawa rin
su warè en ke menge anak din.”

Ke Kineulì en en ni Jose Riyà Ebpuun te Ihiptu

¹⁹ Guna su minatey en si Hirudis ne mibpetehinep en maa ke suluhuen te Kerenan ki Jose diyà te inged ne Ihiptu,

²⁰ ne migkahi te, “Enew ka ne kua nu ke vatà wey ke iney rin ne ulì kew en diyà te inged ne Israyil su minatey en ke menge etew ne egkiyug ne ebpeimatey rut te vatà.”

²¹ Ne mid-enew si Jose ne migkuwa rin ke vatà wey ke iney rin ne mid-ulì dan en diyà te inged te Israyil.

²² Ugaid ne guna su nerineg ni Jose te si Arkilew se egkamal dut te inged ne Hudiya neke-sambì dut te amey rin ne si Hirudis ne neandek sikandin ne ed-ulì ketà. Ne mibpetehinep ma ke Eleteala ne mibaag kandin ne ketà ne riyà dan mibpesinaru te lusud te Geliliya,

²³ ne mid-ubpà dan ketà te inged ne ed-ingaranan te Nesarit. Ned-ulaula rin ini su apey metuman ke impekahi rut te ebpelambas te Lalag te Eleteala rengan ne egkahi te, “Ed-ingaranan sikandin te etew te Nesarit.”

3

Ke Kinepesabut ni Juan ke Ebpembunyag (Marcos 1:1-8; Lucas 3:1-18; Juan 1:19-28)

¹ Ketà ne hewii ne nekeuma si Juan ne Ebpembunyag kayi te tanà ne kenà egkeubpaan te menge etew diyà te lusud te Hudiya, ne impesabut din ke Lalag te Eleteala riyà te menge etew ne ed-uvey kandin.

² Migkahi sikandin diyà te menge etew te, “Pemedsendit kew ne engkeri niyu ke menge meraat ne ulaula niyu su mehaan en Edatù ke Eleteala kenitew.”

³ Si Juan ini ke nekahi ni Isayas ke mibpelambas te Lalag te Eleteala rengan se egkahi te, “Duen etew riyà te tanà ne kenà egkeubpaan te menge etew
ne ebpenawag dut te menge etew
ne ed-uvey kandin, ke sikandin te,

‘Mehaan ebpekeuma ke Kerenan,
 ne ihewani niyu ke ralan,
 ne tidtuwa niyu ke ibayà din,
 ne iyan din meana ne tilaka niyu ke hinawa niyu
 su apey kew egkepenehana te kebpekeuma rin.’

⁴ Si Juan ini ne iyan din belegkas ne mid-avel ne bulvul te binatang ne ed-ingeranan te kemilu, ne iyan din insebitan ne lundis ded dut te binatang. Ne iyan din keuyehan se tepurì wey teneb.

⁵ Ne merakel ne minge etew ne mibpendiyà su ebpeming kandin ne riyà ebpemuun te inged ne Hirusalim, ne riyà ebpemuun te lusud te tivuuk ne inged te Hudiya, wey langun ne minge inged ne nekepesuvà te wayig ne Hurdan.

⁶ Ne intarem dan te nekendsendit dan dut te langun ne meraat ne ulaula ran ne arà pà ne mibpebunyang dan ki Juan diyà te wayig ne Hurdan.

⁷ Guna su nekita ni Juan ke merakel ne Pere-siyu wey Sadusiyu ne mibpengkayi su ebpebunyang ne migkehiyan din sikandan te, “Iring kew te minge uled ne ebpelahuy dut te apuy! Mehaan en egkeuma ke kedusa te Eleteala keniyu. Engkey se midtarem keniyu te ebpekeliyu kew ketà te ebpebunyang kew?”

⁸ Embiya benar ne mid-engkeran niyu ke meraat ne ulaula niyu, ne ipekita niyu kayi te ulaula niyu.

⁹ Ne kenà kew egkahi te sikiyu ne kenà edusaan te Eleteala su geina te kevuwaran kew ni Abraham. Su igkahi ku keniyu,” ke si Juan,

“misan ini se menge batu ne egkepebaluy te Eleteala ne etew ne tuney ne kevuwaran ni Abraham ne igkesambì keniyu.

¹⁰ Ne sikiyu ne iring te menge kayu ne kenà ebahas te meupiya, tembù be ebpilayen. Ne iring te nekekayew en ke adsa su ebpemilayen su idtimbag diyà te apuy.

¹¹ “Wayig se ibunyag ku keniyu ne tuus te mid-engkeran niyu ke meraat ne ulaula niyu,” ke si Juan. “Ugaid ne ruen ebpeketundug kediey ne mepurù pà kediey, su misan ke telumpà din ne kenà a edait ne ebitbit. Ne iyan din ibunyag keniyu ke Kedesenan ne Ebpetuntul te Menusiyà ne ebunyahan din ke ruma te apuy.

¹² Geina te ibpesivey rin ke menge etew ne ebperetiyaya rut te menge etew ne kenà ebperetiyaya,” ke si Juan, “ne iring sikandin te etew ne ruen teluung din su ed-ukap ne ibpelayap din ke ukap rut te rimahas. Ke rimahas ne idtahù din diyà te patil, ne ke ukap ne ebinsulan din te apuy ne kenà egkeevukan.”

*Mibunyahan ni Juan si Hisus
(Marcos 1:9-11; Lucas 3:21-22)*

¹³ Warà meuhet ne nekeuma en si Hisus kayi te wayig ne Hurdan se riyà ebpuun te lusud te Geliliya su ebpebunyag ki Juan.

¹⁴ Ugaid ne kenà perem ebunyag si Juan kandin, ke sikandin te, “Meambe ke ebpengkayika te kedi se ebpebunyag? Su iyan edait ne ebpebunyag a kenikew.”

¹⁵ Ne midtavak si Hisus kandin te, “Ed-iringen ta en kayi ne bunyahi ad nikuna su apey ta

metuman ke langun ne insuhù te Eleteala.” Ne ketà ne migkiyug si Juan ne mibunyahan din en si Hisus.

¹⁶ Guna su nebunyahan en si Hisus ne migaun en ketà te wayig. Ne nevukaan ke langit ne nekita rin ke Kedesenan ne Ebpetuntul te Menusiyà ne midragid te melepati ne mibpehunerena ne midlatun kayi te kandin.

¹⁷ Ketà ne ruen suwara ne riyà ebpuun te langit ne nerineg din se egkahi te, “Sikew ke Anak ku ne igkelimù ku nevenar, ne utew en ne ingkesuatsuat ku sikew.”

4

Ke Kinepengeram ki Hisus

(Marcos 1:12-13; Lucas 4:1-13)

¹ Ne ketà ne mid-ewit en si Hisus dut te Kedesenan ne Ebpetuntul te Menusiyà diyà te tanà ne kenà egkeubpaan te menge etew su ebpengeraman dut te datù te pekaid.

² Ne lusud te epat nepulù ne andew wey kerukileman ne warà bulug mekekaan sikandin, ne nevitil nevenar.

³ Ne mid-uvey kandin si Setanas ke datù te pekaid ne mibpengeraman din se egkahi te, “Embiya sikuna en ke Anak te Eleteala ne pebeluya nu ini se menge batu ne pan ne egkekaan.”

⁴ Ne migkahi si Hisus te, “Iyan insurat ne Lalag te Eleteala ne egkahi te, ‘Kenà egkeenen dà se igkeuyag te etew, ugaid ne iyan ebpekeuyag kandin ne uman senge tahà ne lalag te Eleteala.’”

⁵ Ne ketà ne mid-ewit dut te datù te pekaid si Hisus diyà te inged ne Hirusalim ne ed-ingaranan te Berekat ne Siyudad ne rutun ne miduma rin si Hisus diyà te migketikangan dut te Nekebpuru ne Valey te Eleteala.

⁶ Ne migkahi ke datù te pekaid te, “Embiya benar ne sikew ke Anak te Eleteala ne umpak ka ruen. Su ruen impesurat ne Lalag te Eleteala ne egkahi te,

‘Edsuhù ke Eleteala te menge suluhuen din ne ebpetugenuren keykew.

Ne edsepirawen ka nikandin

su apey kenà egkerudruri

ke paa nu te batu.’ ”

⁷ Ne migkahi si Hisus te, “Ugaid ne ruen dema Lalag ne impesurat te Eleteala ne egkahi te, ‘Kenà kew baal te ralan ne ibpenggeram te gehem dut te Kerenan ne Eleteala niyu.’ ”

⁸ Neipus ketà ne mid-ewit maa si Hisus dut te datù te pekaid diyà te metmetikang ne buvungan ne impekita rin ki Hisus ke langun ne menge inged kayi te ampew te dunya wey ke kekewesai ran.

⁹ “Ini se kebakayàbayà kayi te langun ne inged ini ne ibehey ku keykew,” ke se datù te pekaid, “wey langun ini ne kekewesai embiya ebpenimbuel ka ne ed-arap ka kedì.”

¹⁰ Ne migkahi si Hisus te, “Awà ka kayi, Setanas! Duen impesurat ne Lalag te Eleteala ne egkahi te, ‘Iyan niyu rà erapa ne Kerenan ne Eleteala niyu, ne sikandin dà se edsenguren niyu.’ ”

11 Ne ketà ne mid-ewaan en dut te datù te pekaid sikandin ne nekeuma en ke menge suluhuen te Eleteala ne midtuganur kandin.

*Midrudsù si Hisus te Ebpesabut Mekeatag te Kedatù te Eleteala te Menge Etew
(Marcos 1:14-15; Lucas 4:14-15)*

12 Guna su nerineg ni Hisus te impevilanggù en si Juan ke Ebpembunyang ne mibpendiyà sikandin te inged ne Geliliya.

13 Nekeuma sikandin diyà te inged ne Nesarit ugaid ne warà ketà mid-ubpà su mibpendiyà sikandin te inged ne Kapirnawum diyà te beyvey te ranew te Geliliya diyà te tanà ne imbehey rengan dut te keep-epuan ni Sibulun wey Neptali.

14 Ned-ulaula rin ini su apey metuman ke impesurat ki Isayas ke mibpelambas te Lalag te Eleteala rengan ne egkahi te,

15 “Tanà te Sibulun wey tanà te Neptali diyà te beyvey te rahat, diyà te ripag te wayig ne Hurdan, ne ed-ingeranan te Geliliya ne ed-ubpaan te kenà Hudiyanen!

16 Ke menge etew ne ed-ubpà ketà ne rengan ne iring te nerusireman, ugaid ne nekekita en te mesmesihey ne rayag. Uya, ini se riyà te merusirem ne mid-ubpà te alung te kepepatey, ugaid ne mid-endlahan en te rayag!”

17 Ne igenat ketà ne midrudsù en si Hisus se ebpesabut te menge etew, ke sikandin te, “Pedsendit kew en ne engkeri niyu en ke meraat

ne ulaula niyu su mehaan en ebpekeuma ke Kedatù te Eleteala keniyu.”

Mibpemili ni Hisus ke Epat ne Etew ne Ebpemiyala te Eduma Kandin

(Marcos 1:6-20; Lucas 5:1-11)

¹⁸ Gewii te mid-ip-ipanew si Hisus diyà te beyvey te Ranew te Geliliya ne nekita rin ke deruwa ne teleari, si Simon (ne ed-ingeranan ki Pedro) wey si Andres ke ari rin. Ebpemiyala ran diyà te ranew su arà ke helevek dan.

¹⁹ Ne migkehiyan dan ni Hisus te, “Pengkayi kew en ne duma kew kediey,” ke sikandin, “su serà se ebpemiyalaan niyu guntaani, ugaid ne ebpenuruen ku pà sikiyu te iyan niyu mulà egkeutel ne menge etew ne eduma kedì.”

²⁰ Arà dà ne mid-ewaan dan en ke biyala ran su miduma ran en ki Hisus.

²¹ Guna su midlevundus en si Hisus ne nekita rin se deruwa pà maa ne teleari ne si Santiago wey ke ari rin ne si Juan, ke menge anak ni Sibidiyu. Diyà dan te avang dan ne elin ke amey ran ne ebpengumbayà te biyala ran. Midtawag dan ni Hisus,

²² ne arà dà ne mid-ewaan dan en ke amey ran dutun te avang ne miduma ran en ki Hisus.

Impesabut ni Hisus Ke Meupiya ne Tudtul wey Nengeulian Din Ke Menge Ederaru

(Lucas 6:17-19)

²³ Ne mid-eneb-eneb en si Hisus dut te langun ne menge inged diyà te lusud te inged ne Geliliya se ebpenurù ketà te menge valey ne ebpengedian te menge Hudiyanen te penduan

dan. Impesabut din te menge etew ke Meupiya ne Tudtul mekeatag te Kedatù te Eleteala kandan, ne nengeulian din ke piya engkey en ne sakit wey menge daru te menge etew.

²⁴ Ne nekeeneb en ke bantug ni Hisus diyà te tivuuk ne inged te Siriya ne mibpeneheewit te menge etew diyà te kandin ke langun ne egkerasey te piya engkey ne sakit wey daru, menge midsuukan te vusew, menge ebevuyen, wey menge etew ne minatey se lawa rin, ne nengeulian ni Hisus ke langun dan.

²⁵ Ne medmerakel ne menge etew ne miduma kandin egenat te lusud te inged ne Geliliya, lusud te inged ne Dikapulis, inged ne Hirusalim, lusud te inged ne Hudiya wey menge inged diyà te ripag te wayig ne Hurdan.

5

Ke Impesabut ni Hisus Mekeatag te ke Benar ne Kehelawan
(Lucas 6:20-23)

¹ Guna su nekita ni Hisus ke denda ne menge etew ne miduma kandin ne midtekereg sikandin diyà te buvungan ne rutun mibpinuu. Ne mid-
uvey kandin ke menge edumdumaan din.

² Ne mibpenurù din sikandan se egkahi te,

³ “Dayirayi ke menge etew ne netuenan dan te kenà dan ebpekeulaula te meupiya ke kenà dan edtevangan te Eleteala, su sikandan ke ebpekeamung dut te Edetuan te Eleteala!

⁴ Dayirayi ke menge egkemutuwan, su edlenganen te Eleteala ke hinawa ran!

⁵ Dayirayi ke minge mepeembavà te hinawa rin, su ebpeketelimà dan te impasad te Eleteala!

⁶ Dayirayi ke minge ebpeuna te hinawa ran se kedtuman te kiyug te Eleteala, su edtevangen dan te Eleteala te kedtuman kayi!

⁷ Dayirayi ke minge iiruwen te minge ruma ran, su egkeyruwan dan dema te Eleteala!

⁸ Dayirayi ke minge kenà egkereruwa se hinawa rin,

te kedtumana ran te metidtu ne ulaula, su sikandan se ebpekekita te Eleteala keuremà!

⁹ Dayirayi ke minge ebpededtuntey te minge etew,

su sikandan ke ed-engkunan te Eleteala ne anak din!

¹⁰ Dayirayi ke minge ebpekesekitan te kedtuman dan

te engkey se metidtu diyà te etuvangan te Eleteala,

su sikandan ke ebpekelusud dut te Edetuan te Eleteala!

¹¹ Dayirayi kew ke ebpenempelaen kew, wey ebpekesekitan kew, wey edtevuwan kew te langun ne edsusunan te mereatey ne ulaula su sabap te keduma niyu kediey.

¹² Kehalew kew misan iring kayi te ini kew te ampew te dunya su dekelà se idlalew keniya diyà te langit. Su iring ded dema ke impekaid dan dut te minge mibpelambas te Lalag te Eleteala rengan.”

*Insempità ni Hisus te ini se Keduma Kandin ne Ebpekeiring te Timus wey Sulù
(Marcos 9:50; Lucas 14:34-35)*

13 “Sikiyu ne eduma kedi,” ke si Hisus, “ne iring kew te timus ne ibmeupiya te nanam te egkeenen su iyan kew ibmeupiya dut te langun ne menusiya. Ugaid ne upama ke egkeawà en ke nanam din, ne warà en dalan te kebmetimus din pà maa. Warà egkeetahan din, tembù be idtimbang dà ne egiekan dà te minge etew.

14 “Ne iring kew te sulù ne ebpeketeyew diyà te langun ne menusiya. Su ruen beseanan ne egkahi te, ‘Ke inged ne riyà meketahù te puntur te buvungan ne kenà ebpekeeles.’

15 Su warà etew ne midtemtem te sulù ne ebpelengkevan din etawa ibperalung din, ugaid ne riyà din ibpeluukluuk te saag su apey egker-ayahan ke etew ne edlusud.

16 Ne iring ded te sulù ne impeluukluuk te saag ne ebpekerayag te langun ne minge etew ketà te lusud te baley, ne pekereyaha niyu ke sulù niyu riyà te minge etew su apey ran mekita ke meupiya ne ed-ul-ulaan niyu ne ebpekereyù dan dut te Amey niyu ne Eleteala diyà te langit.”

Ke Penurù ni Hisus Mekeatag te Penduan ne Intahak ni Moises

17 “Kenà niyu pegitunga,” ke si Hisus, “te iyan ku impengkayi te ampew te dunya ne apey egkeawà ke penduan ne intelau ni Moises rengan wey ke impenurù te minge mibpelambas te Lalag te Eleteala rengan. Kenà ku iyan impengkayi se id-awà ku ini, ugaid ne mibpengkayi a su apey ku meup-upiani metuman ke langun ne nekahi.

18 Tentenuri niyu ini, su taman te duen pà langit wey tanà ne warà senge tahà ne egkeawà

dut te penduan. Su egkeawà ke langit wey tanà ne warà pà meawà ke penduan.

¹⁹ Tembù be piya entei ne etew ne edsurang te misan deisek dà dut te penduan ne ibpenurù din te ruma se edsurang iring kandin, ne sikandin ke egkevaluy ne kevevan ne etew diyà te menge etew ne Edetuan te Eleteala diyà te langit. Ugaid ne ke etew ne edtuman dut te penduan ne ibpenurù din te ruma se kedtuman, ne egkevaluy sikandin ne mepurù ne etew diyà te menge etew ne Edetuan te Eleteala diyà te langit.

²⁰ Su idtarem ku keniyu,” ke si Hisus, “wey kew rà ebpekeamung diyà te menge etew ne Edetuan te Eleteala diyà te langit embiya iyan kew pà metidtu diyà te etuvangan din dut te menge meyerù te penduan wey menge Peresiyu.”

Ke Penurù ni Hisus te Kenà Egkeepes te Ruma Ta wey Edlalag te Meraat

²¹ Ne migkahi pà maa si Hisus te, “Iyan niyu nerineg ne impenurù te menge lukes tew rengan ne egkahi te, ‘Kenà kew ed-imatey, su ke etew ne ed-imatey ne egkesuhat te kukuman.’

²² Ugaid ne igkahi ku keniyu te piya entei ne egkeepes te ruma rin ne egkesuhat dema te kukuman. Ne piya entei ne egkahi te ruma rin te, ‘Warà itungan nu!’ ne ebpenheewitan sikandin diyà te punggus en dut te kukuman. Ne piya entei ne egkahi te ruma rin te, ‘Buneg ka ne warà rantek nu!’ ne dait ne ebpekednerakà sikandin.

²³ “Tembù be embiya diyà ke en te edenaan su ebehey ka te Eleteala ne netenuran nu te ruen nesakit se hinawa rin kenikew,

²⁴ ne itahak nu pà arà se ibehey nu ne beyai nu pà ne pekid-ulit ka pà ketà te ruma nu, ne arà pà ne lived ka su ebehey ke en diyà te Eleteala.

²⁵ “Ne embiya ruen etew ne edwagib kenikew ne ed-ewiten ka riyà te kukuman, ne gaangaan ke en pekidtuntey kandin te kenà ka pà ebpekeetuvang diyà te kukuman. Su embiya ebpekeetuvang ka en diyà te kukuman, ne ibehey ka en diyà te uwis, ne ibehey ka riyà te menge pulis ne ke menge pulis ne ebilanggù keykew.

²⁶ Idtarem ku keniyu,” ke si Hisus, “kenà kew ebpekelihawang ketà taman te kenà niyu egkevayaran ke langun ne keselaan nu.”

Ke Penurù ni Hisus Mekeatag te Etew ne Edlangkadlangkad te Esawa Rin

²⁷ Ne migkahi pà maa si Hisus te, “Iyan niyu nerineg dema ne impenurù dengan te, ‘Kenà kew edlangkadlangkad te esawa nu.’

²⁸ Ugaid ne igkahi ku keniyu te piya entei ne meama se edtengteng te meritan ne kenà din esawa ne igkeerihi rin, ne timbang te nepengingniyuhan din en arà se meritan.

²⁹ Su embiya iyan ebpekepeneheewit keykew te kebpekedsalà nu ke kewanan ne mata nu, ne lesika nu ne itimbag! Su iyan pà tumù ne dibdivaluy rà se mata nu tumin dè be ke langun ne lawa nu ne igkeantug diyà te apuy nerakà.

³⁰ Ne embiya iyan ebpekepeneheewit keykew te kebpekedsalà nu ke kewanan ne belad nu, ne tempera nu ne itimbag nu! Su iyan pà tumù ne egkesarir ka tumin dè be ke langun ne lawa nu ne igkeantug diyà te apuy nerakà.”

Ke Penurù ni Hisus Mekeatag te Etew ne Ebpekidbelag te Esawa rin

(Mateo 19:9; Marcos 10:11-12; Lucas 16:18)

³¹ Ne migkahi maa si Hisus te, “Impesurat rema dengan te, ‘Embiya ruen meama ne ebpekid-engked te esawa rin, ne edsurat pà te ebpeketuenan te ebpekid-engked en sikandin.’

³² Ugaid ne igkahi ku keniyu embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne ini se meama se puunan te salà te esawa rin su embiya edsaup ed-esawa ke meritan ne timbang te nekelangkadlangkad en sikandin. Ne engketà ded dema timbang te nekelangkadlangkad en ke meama ne ed-esawa kandin.”

Ke Penurù ni Hisus Mekeatag te Pasad te Menge Etew

³³ Ne migkahi pà maa si Hisus te, “Nerineg niyu red dema se impenurù te menge lukes tew dengan, ‘Kenà niyu perisa ke impasad niyu, su embiya ruen impasad niyu te Kerenan ne tumana niyu iya.’

³⁴ Ugaid ne igkahi ku keniyu, embiya ruen ibpasad niyu ne kenà kew sesapà. Kenà kew sesapà te langit su arà ke ubpaan te Eleteala,

³⁵ ne kenà kew sesapà kayi te ampew te dunya su ini ne iring te edtembaran te paa rin. Ne kenà ka sesapà te inged ne Hirusalim su arà ke inged dut te pinekemepurù ne Datù.

³⁶ Ne kenà kew rema sesapà te ulu niyu su warà gehem niyu te ebpekeputi te misan senge waru rà ne bulvul niyu etawa ebpekeitem.

³⁷ Embiya iyan netahù te hinawa niyu se ‘uya’ ne kehiya niyu te ‘uya’, ugaid embiya iyan netahù te hinawa niyu se ‘kenà’ ne kehiya niyu rà te ‘kenà’. Su embiya ed-umanan niyu pà te sapà ne riyàn en arà ebpuun te datù te pekaid.”

Ke Penurù ni Hisus te Kenà ki Edsuli te Menge Kunterà ta
(Lucas 6:29-30)

³⁸ “Nerineg niyu rema,” ke si Hisus, “ke impenurù dengan se egkahi te, ‘Embiya ruen etew ne ebpekereraat te mata te ruma rin, ne edereetan dema ke mata rin. Ne embiya ruen ebpekehevang te ngipen te ruma rin ne egevangen dema te ngipen din.’

³⁹ Ugaid ne igkahi ku keniyu te kenà kew edsuli dut te etew ne mid-ulaula te mereatey keniyu. Upama ke ruen edtabpì te buked nu, ne kenà nu ivangen ke edtebpìen din ke divaluy.

⁴⁰ Ne embiya ruen ed-ewit keykew riyà te kukuman ne edlugkasan ka rin en te kemisita nu, ne kenà nu ivangen kandin te egkuwa ketà, ugaid ne ivehey nu kandin ke kumbalà nu rema.

⁴¹ Ne embiya ruen sundaru ne ebpehes keykew te ebpevava te kesangkapan din taman te senge kilumitru se keriyù din, ne bevaa nu misan taman te deruwa ne kilumitru.

⁴² Ne embiya ruen ebuyù keykew, ne behayi nu. Ne embiya ruen edsambey keykew, ne pesembaya nu.”

Ke Penurù ni Hisus Mekeatag te Kedlimù ta te Menge Kunterà ta
(Lucas 6:27-28, 32-36)

⁴³ “Nerineg niyu rema,” ke si Hisus, “ke nekahi ran dengan te, ‘Limui nu ke menge sepakat nu ne keepesi nu ke menge kunterà nu.’

⁴⁴ Ugaid ne igkahi ku keniyu te limui niyu ke menge kunterà niyu, ne ipengeningeni niyu te ebpeneuven te Eleteala ke menge etew ne ebpekesakit kenikew.

⁴⁵ Su embiya ini se ed-ul-ulaan niyu, ne egkekita kayi te keniyu te sikiyu ne menge anak en te Amey niyu ne Eleteala diyà te langit. Su ini se Eleteala ne kenà iyan din dà ebpesilaan te andew ke menge metidtu rà su elin ded dema ke menge etew ne meraat se ulaula rin. Ne ebpeuranan din ded dema ke menge metidtu wey ke menge etew ne ed-ulaula te meraat.

⁴⁶ Su embiya iyan niyu rà igkelimù ke menge etew ne egkelimù keniyu, ne meambe ke ebpenareng kew te kebpenaub te Eleteala keniyu? Misan ke ebpevayad te buwis ne limbungan ne igkelimù dan dema ke menge etew ne egkelimù kandan.

⁴⁷ Ne embiya iyan niyu rà edsehipaan ke menge sepakat niyu, ne engkey se kegkereyui keniyu? Warà! Su misan ke menge etew ne kenà ebperetiyya te Eleteala ne ed-ulaula red dema te iring ketà.

⁴⁸ Tembù be sikiyu ne pekeimpit kew te ulaula niyu riyà te menge etew, su ke Amey niyu riyà te langit ne impit ke langun ne ulaula rin.”

6

Ke Penurù ni Hisus Mekeatag te Kebehey ta te

Menge Egkeayuayu

¹ Migkahi pà maa si Hisus te, “Itahù niyu ini te itungan niyu te kenà iyan niyu kebpengeningeni te Eleteala ne apey kew mekita te menge etew. Su embiya ini se ed-ul-ulaan niyu ne kenà niyu egketelimà ke idlalew ketà dut te Amey niyu riyà te langit.

² “Tembù be embiya ruen ibehey niyu te egkeayuayu ne kenà niyu ibpekitakita te menge etew iring dut te menge etew ne egkiyug ne ebpekita te keupiya ran. Su sikandan ini ke ebehey ran ne riyà den dà ibehey te lusud te valey ne ebpengedian te penduan dan wey riyà te ralan su apey egkekita ne egkereyù dan te menge etew. Ugaid ne igkahi ku keniyu te ini se mid-ulaula ran ne nekuwa ran en ke lalew ran.

³ Ugaid ne embiya ruen ibehey niyu te egkeayuayu, ne kenà niyu peketueni te misan sepatat niyu,

⁴ su apey ini se ibehey niyu ne warà ruma ne egketau. Ne ke Amey niyu rà se nekekita dut te mid-ulaula niyu ne iyan edlalew keniyu.”

Ke Penurù ni Hisus Mekeatag te Kebpengeningeni

(Lucas 11:2-4)

⁵ “Ne embiyà ebpengeningeni ka,” ke si Hisus, “ne kenà ka ed-iring te engkungkun ne metidtu. Su embiya ebpengeningeni ran ne egkiyug dan ne ed-itindeg diyà te lusud te valey ne ebpengedian te menge Hudiyanen te penduan dan wey riyà te lirig te kelesada su apey egkekita te menge

etew. Ugaid ne igkahi ku keniyu te ini se mid-
ulaula ran ne nekuwa ran en ke lalew ran.

⁶ Ugaid ne sikiyu, ke ebpengeningeni kew ne
lusud kew riyà te sungkù niyu ne lelekeb kew ne
pengeningeni kew riyà te Amey niyu ne Eleteala
ne kenà egkekita. Ne ke Amey niyu ne iyan dà
ebpekekita keniyu ne iyan edlalew keniyu.

⁷ “Ne kayi te kebpengeningeni niyu,” ke si
Hisus, “ne kenà niyu edlumlumbayi ke pen-
geningeni niyu iring dut te menge etew ne kenà
ebperetiyaya te Eleteala. Su iyan dan kunaan ke
ebpeminehen te Eleteala ke pengeningeni ran ke
ebpekelayaten dan.

⁸ Kenà kew ve ed-iring kandan! Su sikiyu, ne
netuenan en te Amey niyu ke kurang niyu te
warà kew pà mebuyù.

⁹ “Embiya ebpengeningeni kew ne iringa niyu
kayi,

‘Ah, Amà diyà te langit,
berekat ne edati te menusiya ke ngaran nu.

¹⁰ Ne berekat ne ebayàbayà ka rut te langun ne
menusiya,

su apey metuman ke kiyug nu kayi te ampew te
dunya

iring dut te diyà te langit.

¹¹ Behayi key te sesangan ne egkekaan dey te ini
ne andew.

¹² Ne pesehara nu ke salà dey
iring dut te nepesehad dey en ke nekedsalà
kenami.

¹³ Ne ipekeriyù key nikuna dut te menge meva-
her

ne penggeram, ne pekelangi key dut te datu te pekaid.'

¹⁴ Su embiya ebpeseharen niyu ke menge etew ne nekedsalà keniyu," ke si Hisus, "ne egkepesehad kew rema te Eleteala ne Amey niyu ne riyà te langit.

¹⁵ Ugaid ne embiya kenà niyu egkepesehad ke menge etew ne nekedsalà keniyu, ne kenà dema ebpeseharen ke salà niyu dut te Amey niyu ne riyà te langit."

Ke Penurù ni Hisus Mekeatag te Kedlimpas te Kegkaan su apey kenà ki Mevangen se Ebpengegeni

¹⁶ Ne migkahi pà maa si Hisus te, "Embiya edlimpas kew te egkaan su ebpengeningeni, ne kenà kew ebpekerumbahat te paras niyu iring dut te menge etew ne engkungkun ne metidtu. Su sikandan ke edlimpas dan te egkaan ne ebpeparas dan te merupaas su apey mekita te edlimpas dan te egkaan. Ne igkahi ku keniyu te kayi te ini se mid-ulaula ran ne nekuwa ran en ke lalew ran.

¹⁷ Ugaid ne iyan meupiya ke edlimpas kew te egkaan ne pendapug kew ne penuwat kew,

¹⁸ su apey kenà metueni te menge etew te edlimpas kew te egkaan. Ne iyan dà netau ke Amey niyu ne Eleteala ne kenà egkekita. Ne iyan sikandin edlalew kenikew dut te mid-ulaula nu te sebseveka nu."

*Ke Penurù ni Hisus Mekeatag te Kedlimud ta te Kekewesai Tew Riyà te Langit
(Lucas 12:33-34)*

19 “Kenà kew edlimud te kekewesai niyu kayi te ampew te dunya,” ke si Hisus, “su kayi ne ruen egketketen, ne ruen edtengisen, ne ruen menge tekawen ne edlusud te menge valey niyu su ebpemenakew.

20 Ugaid ne iyan meupiya,” ke si Hisus, “ne edtuman kew te kiyug te Eleteala ne egkevaluy ne ruen kekewesai niyu riyà te langit ne kenà egketketen, ne kenà edtengisen, ne warà tekawen ne edlusud su ebpemenakew.

21 Su piya endei niyu idtahù ke kekewesai niyu, ne ketà dema ke hinawa niyu.”

*Ke Sempità ni Hisus Mekeatag te Engkey se Ebpekerayag te Lawa ta
(Lucas 11:34-36)*

22 Ne migkahi pà maa si Hisus te, “Ke mata te etew ne iring te sulù dut te lawa rin su embiya merayag se kedtengteng din ne iyan din meana ne metidtu se ulaula rin, ne iring te egkerayahan ke langun ne lawa rin.

23 Ugaid ne embiya edsehulepunen se kedtengteng din ne iyan din meana ne mereatey se ulaula rin, ne iring te egkerusireman ke langun ne lawa rin!”

*Ke Penurù ni Hisus te Kenà Egkepakey ne Deruwa ke Edtehiuripen keyta
(Lucas 16:13; 12:22-31)*

24 “Warà edsugsuhuen,” ke si Hisus, “ne deruwa se edtehiuripen kandin. Su embiya deruwa se ebpengunguripen kandin, ne egkeepesan din ke seveka ne ed-edatan din ke seveka. Etawa ebperumaduma sikandin dut te seveka ne

kenà din edsehipaan ke seveka. Su iring be kayi embiya iyan dekelà te hinawa nu ne kureta, ne kenà ka ebpeketuman te kiyug te Eleteala.

²⁵ “Tembù be iyan ku igkahi keniyu,” ke si Hisus, “kenà kew meuru te egkekaan wey ed-inumen ne igkeuyag niyu etawa ke engkey se ibevelegkas niyu. Su ke hinawa wey lawa niyu ne imbehey te Eleteala, ne maa kenà belielehà pà arà dut te egkekaan niyu wey belegkas niyu?

²⁶ Keniyan niyu rè ma te minge uwak, warà kebpemula ran, ne warà ked-ehani ran, ne warà edtehuan dan te egkekaan dan, ugaid ne ke Amey nu ne riyà te langit se ebpesavud kandan! Ne meambe, kenà belielehà kew pà dut te minge pepenuk?

²⁷ Ne engkey keniyu se nekesumpat te umur din te impepevayà te kegkeuru rin?

²⁸ “Embiya kenà ka ebpekegaga kayi, ne meambe ke egkeuru ka te ibevelegkas nu? Keniyan niyu rè ma te kevukaran ke engkey se kedtuvù dan. Kenà dan egelevek ne kenà dan ed-avel.

²⁹ Ne misan iring ketà ne igkahi ku keniyu te misan ke kewasa ne datù dengan ne si Salomon, ne ke keupiya te belegkas din ne warà dà mekesuluwan dut te keupiya te seveka keniyan ne kevukaran.

³⁰ Embiya Eleteala se ebpebparas te kevukaran te sagbet iring ketà, misan mehaan dà se kedtuvù din su egkekita niyu guntaan ne keremà ne nehangu en ne egkevinsulan en, ne maa iyan kew pè be kenà behayi te ibevelegkas niyu? Sikiyu ne deisek se kedsarig niyu!

³¹ “Ketà be ne kenà kew meuru se egkahi te, ‘Engkey se egkekaan wey egkeinum dey? Ne engkey se ibevelegkas dey?’

³² (Su ini imbe ke layun intahù te hinawa rut te menge etew ne kenà ebperetiyaya te Eleteala.) Ugaid ne sikiyu, ne kenà kew meuru su netuenan dut te Amey niyu ne Eleteala ke engkey se kurang niyu.

³³ Iyan niyu ipeuna te hinawa niyu ke kiyug te Eleteala wey ke Kedatù din keniyu, ne arà pè be ne ebehayan kew te Eleteala dut te langun ne kurang niyu.

³⁴ Tembù be kenà kew meuru ke engkey se egketemanan niyu dut te menge hewii ne egkeuma. Su uman hewii ne idsengebias ke kerehenan din, ugaid ne wey niyu en pegitunga ke egkeuma en.”

7

Ke Penurù ni Hisus Mekeatag te Kedsawey ta te Menge Ruma Ta

(Lucas 6:37-38, 41-42)

¹ Ne migkahi pà maa si Hisus te, “Kenà kew edsawey te ruma ne etew apey kenà kew edsewayan te Eleteala.

² Su edtimbangtimbangan kew te Eleteala iring te kedtimbangtimbang niyu te ruma ne etew. Ne iyan din meana ne taman ne kerekelà te kedtimbangtimbang niyu te ruma ne etew, ne arà en dema ke kerekelà ne kedtimbangtimbang te Eleteala keniyu.

³ “Engketà be,” ke si Hisus, “ne meambe ke edturikan nu ke salà te ruma nu ne iring te pesek, ugaid ne warà ma te hinawa nu te ruen salà nu ne iring te gedgeran kerekelà din?”

⁴ Engkey se kedtikà nu te egkahi riyà te ruma nu te id-awà nu ke pesek din, ugaid ne ruen ma nekepeseke kenikew ne iring te gedgeran kerekelà din ne kenà nu egketuusan?

⁵ Engkey en ayan ne kedtarùtarù nu! Unai nu pà te ed-awà ke nekepeseke kenikew ne iring te gedgeran, ne an pà ne ebpekekita ke en ne ebpengawà te pesek te ruma nu.”

Ke Sempità ni Hisus Mekeatag te Menge Etew ne Warà Adat din te Eleteala wey ke Lalag din

⁶ “Kayi te kebpenurù niyu ne kenà niyu ibpehes te ebpepeming dut te menge etew ne warà adat din. Su ebpekeiring kew te idtimbang niyu riyà te asu ke kearen ne egkeedatan te Eleteala, ne eberiyung dan ne ebuntalen kew. Ne kenà niyu idtimbang ke pirlas niyu riyà te menge bavuy su egiekan dan dà ini.”

Mekeatag te Ebpemuyù diyà te Eleteala (Lucas 11:9-13)

⁷ Migkahi si Hisus te, “Embiya ebpengeningeni kew riyà te Eleteala ne buyù kew ne ebhayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin.

⁸ Su langun ne ebuyù diyà te Eleteala ne ebhayan, ne ke etew ne ebpemengà ne ebpeketuen, ne ke etew ne ebpenehetiat ne ebpuwasan ke lekeb kandin.

9 “Menu sikiyu ne munge lukes, embiya ebuyuan ka te anak nu te pan, maa batu se ibehey nu?”

10 Etawa ebuyuan ka rin te serà, maa uled se ibehey nu?”

11 Sikiyu ne menusiyà ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala ne riyà te langit kenà mebehey keykew te meupiya embiya ebuyù kew riyà te kandin.

12 “Ne misan engkey ne egkiyuhan niyu ne ibped-ulaula te munge etew keniyu, ne iring ketà dema se ul-ulaa niyu riyà te kandan. Su ini se meana dut te penduan ne intelau ni Moises wey ke munge penurù dut te munge ebpelambas te Lalag te Eleteala rengan.”

*Ke Melihet wey ke Meluag ne Gumawan
(Lucas 13:24)*

13 “Lusud kew riyà te melihet ne gumawan,” ke si Hisus, “ne ebpependiyà te umur ne kenà edtaman. Su meluag ke gumawan ne merayun ke dalan ne ebpependiyà te apuy nerakà, ne merakel ke edtuntul ketà.

14 Ugaid ne melihet ke gumawan wey mepasang ne ibayà ke dalan ne ebpependiyà te umur ne kenà edtaman, ne merelag dà se ebpeketuen ketà.”

*Ke Sempità ni Hisus Mekeatag te munge Etew
ne Kenà Benar ne Ebpelambas te Lalag te Eleteala
(Lucas 6:43-44)*

15 “Uram kew dut te munge etew ne engkungkun ne ebpelambas te Lalag te Eleteala.

Su ebbendiyà dan te keniyu ne iring te paras te bilibili ne meamuk, ugaid ne riyà te hinawa ran ne iring dan te mewalew ne asu ne ebpekekaid.

¹⁶ Egkekilala niyu ke kenà benar ne ebpelambas te Lalag te Eleteala kayi te ulaula ran. Su iring te kayu, kenà ebahas ke sepinit te paras ne kenà ebahas ke degiyangas te igira.

¹⁷ Iring din ded dema ke kayu ne meupiya se kegueyhuey rin ne iyan din dà bahas ne meupiya. Ugaid ne ke kayu ne ruen sakit din ne iyan din bahas ne meraat.

¹⁸ Su ke kayu ne meupiya se kegueyhuey rin ne kenà ebahas te mereatey, ne ke kayu ne ruen sakit din ne kenà ebahas te meupiya.

¹⁹ Ne langun ne minge kayu ne kenà ebahas te meupiya ne ebplayen ne idrapug su ebinsulan.

²⁰ Tembù be igkahi ku keniyu te egkekilala niyu ke kenà benar ne ebpelambas te Lalag te Eleteala kayi te ed-ul-ulaan dan.”

*Mekeatag te Menge Etew ne Kenà Ebpekelusud dut te Menge Etew ne Edetuan te Eleteala
(Lucas 13:25-27)*

²¹ Ne migkahi si Hisus te, “Kenà langun te minge etew ne edtawag kedì te ‘Is Kerenan, Kerenan’ ne ebpekelusud dut te minge etew ne Edetuan te Eleteala ke kenà sikandan dà arà se edtuman dut te kiyug te Amey ku ne Eleteala ne riyà te langit.

²² Su embiya egkeuma arà se hewii te kegkukum te Eleteala ne merakel se ebpeyiruwiru kedì se egkahi te, ‘Is Kerenan, Kerenan, mibpesabut key te Lalag te Eleteala

impepevayà te gehem te ngaran nu, ne mibpenegseg dey ke vusew ne ed-amung-amung te menge etew, ne merakel pà se mekegeyip ne neveelan dey!’

²³ Ugaid ne iyan ku igkahi kandan te, ‘Sikiyu ne meraat se ulaula, kenà ku egketuenan sikiyu. Awà kew kayi!’ ”

Ke Deruwa ne Etew ne Ebevaley
(Lucas 6:47-49)

²⁴ “Tembù be,” ke si Hisus, “langun dut te nekerineg te lalag ku ne mibperumaruma, ne ebpekeiring dan te bereitungan ne etew ne riyà mebevaley te meresen.

²⁵ Ne midadsang ke uran ne midalem ke wayig ne nesuhat te keramag ini se valey, ugaid ne warà ini mepiley su riyà mekeitindeg te meresen.

²⁶ “Ugaid ne langun ne menge etew,” ke si Hisus, “ne nekerineg te lalag ku ne kenà dan ebperumaruma, ne iring dan te etew ne warà itungan din ne mebevaley riyà te pantad.

²⁷ Ne midadsang ke uran ne midalem ke wayig ne nesuhat te keramag ini se valey, ne arà dà ne nerundus en su neawet dà dut te keramag.”

Ruen Gehem te Kebpenurù ni Hisus

²⁸ Nekeipus si Hisus se ebpenurù te menge etew ne neinuinu ran nevenar,

²⁹ su kenà iring dut te kebpenurù te menge etew ne ebpenurù te penduan te menge Hudiyanen su ruen gehem din ini se penurù din.

8

Neulian ni Hisus ke Senge Etew ne Kevuwaen ne muna pà te It-it

(Marcos 1:40-45; Lucas 5:12-16)

¹ Guna su midtupang si Hisus ketà te buvungan ne mibpenuruan din te menge etew, ne medmerakel se miduma kandin.

² Ne ruen etew ne egkevuwaen ne muna pà te it-it ne mid-uevey ki Hisus. Ne midlumpeng en sikandin diyà te sineruwan ni Hisus se ebpemuyù te, “Mama, embiya perem egkiyug ke rà ne egkeulian nu ini se meredsik ne sakit ku.”

³ Ne midampen ni Hisus sikandin se egkahi te, “Uya, egkiyug a,” ke sikandin. “Meulii ka!” Arà dà ne neawà en ke sakit dut te meama su neulian en.

⁴ Ne migkahi si Hisus kandin te, “Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu te Eleteala ke ibpelengesa ne insuhù dengan ni Moises su apey metueni te langun te neulian ka.”

Neulian ni Hisus ke Edsugsuhuen dut te Senge Etew ne Kepitan

(Lucas 7:1-10)

⁵ Guna su nekeuma si Hisus diyà te inged ne Kapir nawum, ne ruen kepitan ne kenà Hudiyanen ne egkamal te menge sundaru ne mid-uevey kandin se ebpemuyù te tavang din.

⁶ “Mama,” ke sikandin, “duen edsugsuhuen ku ne ederaru riyà te valey ku su minatey ke divaluy

ne lawa rin ne merasey nevenar se egeramen din.”

⁷ Ne migkahi si Hisus te, “Ebpendiyan a su apey ku meulii sikandin.”

⁸ “Mama,” ke se kepitan, “misan kenà ke en edlaus diyà te valey ku, su kenà a dait ne ebpemeneyikan nu. Su dekelà se gehem nu ne misan igkahi nu te, ‘Meulii sikandin,’ ne egkeulian ini se edsugsuhuen ku.

⁹ Nesebutan ku ini su siaken ne ruen mepurù ku ne meperumaruma a kandin. Ne ruen menge sundaru ne egkemalan ku ne meperumaruma ran kediey. Su egkahi e rà te, ‘Diyà kew,’ ne iring dan te ebelesiken. Ne engketà ded ke egkahi a te, ‘Kayi kew,’ ne seperek mata ne kayi ran en. Ne embiya edsuhuen ku ini se edsugsuhuen ku te, ‘Ul-ulaa nu ini,’ ne arà en iya rema se ed-ul-ulaan din. Iring de be kayi,” ke se kepitan, “misan edlelehan nu rà ne egkeulian ini se edsugsuhuen ku.”

¹⁰ Nerineg ni Hisus ini ne neinuinu nevenar sikandin ne migkehiyan din ke menge etew ne miduma kandin te, “Sevenarbenar ne igkahi ku keniyu te warà e pà mekeuma te etew ne iring kayi kerekelà se sarig din kediey misan kayi te langun ne kevuwaran ni Israyil.

¹¹ Ini ve se idtarem ku keniyu ne merakel se menge etew ne egenat te edsilaan taman te edsenlepan ne ebpekeuma su ebpekepinuu te egkaan duma en ni Abraham wey ke anak din ne si Isaac wey ke apù din ne si Jacob diyà te menge etew ne Edetuan te Eleteala.

¹² Ugaid ne merakel ne menge kevuwaran ni Israyil ne mibpenehenaan perem te Eleteala dut te Edetuan din ne ibpependiyà te merusirem, ne ketà ne ebpekependerawit wey ebpekengingitel.”

¹³ Ne migkahi si Hisus dut te kepitan te, “Ulì ke en. Su ke sarig nu kedì ne netuman en.” Ne ketà dà dema ne ke edsugsuhuen din diyà te valey ne neulian en.

*Neulian ni Hisus ke Mibpenderaru ne Etew
(Marcos 1:29-34; Lucas 4:38-41)*

¹⁴ Ne mibpendiyà si Hisus te baley ni Pedro ne ketà ne nekita rin ke enuhang ni Pedro ne meritan ne ed-id-irehà su edetengen.

¹⁵ Ne midampen ni Hisus ke velad din ne neawà en ke rateng din, ne mid-enew sikandin ne mid-ilotù en te ibpekaan kandan.

¹⁶ Guna su midsanlep en ke andew ne ruen merakel ne menge etew ne midsuukan te vusew ne mibpeneheewit dan kayi te ki Hisus. Ne mibpenegseg ni Hisus ke menge vusew te im-pepevayà dà te lalag din, ne nengeulian din langun ne ebpenderaru.

¹⁷ Mid-ulaula rin ini su apey metuman ke impesurat ki Isayas ne ebpelambas te Lalag te Eleteala rengan se egkahi te,
“Sikandin en iya ke nekeulì te daru tew,
ne nekeawà te menge sakit tew.”

*Ke Menge Etew ne Egkiyug Perem ne Eduma ki Hisus
(Lucas 9:57-62)*

18 Guna su nekita ni Hisus ke medmerakel ne menge etew ne edlingut kandin ne migkehiyan din ke edumdumaan din te, “Kuwa kiyu en su ed-apet kiyu riyà te ripag te ranew.”

19 Ketà ne ruen senge etew ne mibpenurù te penduan ni Moises ne mid-uvey kandin ne migkahi te, “Meyterù, eduma a kenikew misan ebpendei ka.”

20 Ne migkahi si Hisus kandin te, “Ke menge laku ne ruen takub ne ed-ul-ulian dan, ke menge pepenuk ne ruen kandan ne salag, ugaid ne ke Impeanak te Menusiyà ne misan endei en memekeirehà su warà ubpaan din.”

21 Ne ruen dema senge etew ne edumdumaan ni Hisus ne migkahi te, “Mama, ed-ulì e pà ne embiya egkepupusan en te ebpeneytayen ke amey ku ne arà pà ne eduma a kenikew, su siaken ded se edleveng kandin.”

22 “Kenà,” ke si Hisus, “su дума ka kedì. Ne iyan nu pelevenga rut te minatey ke menge ruma nu ne kenà ebperetiyya kediey.”

Impeengked ni Hisus ke Keramag Diyà te Ranew

(Marcos 4:35-41; Lucas 8:22-25)

23 Ketà maa ne mid-untud si Hisus te avang ne miduma ke menge edumdumaan din.

24 Ne midtekewtekew se mevaher ne keramag ne nekesuhat ketà te ranew ne nelikuvungan en te baleg ini se avang dan. Ugaid ne nekelipereng si Hisus.

25 Ne mid-uvey ran si Hisus ne mibpukew ran en se egkahi te, “Tevangi key, Kerenan, su egkekahem ini se avang ne egkeherà ki en!”

²⁶ Ne migkahi si Hisus te, “Meambe ke nengeandek-andek kew? Kurang kew te sarig kedi!” Ne mid-enuw en ne pineengked din en ke keramag wey menge baleg, ne midlengen en ke ranew.

²⁷ Ne neinuinu ke menge edumdumaan din se egkahi te, “Engkey ini ne etew? Su misan ke keramag wey menge baleg ne ebperumaruma rut te lalag din!”

Neulian ni Hisus ke Deruwa ne Etew ne Mid-suukan te Menge Vusew

(Marcos 5:1-20; Lucas 8:26-39)

²⁸ Nekerunggù en ensi Hisus diyà te ripag te ranew riyà te sakup te inged te Gadara, ne ketà ne ruen midsinuhung kandin ne deruwa ne etew ne riyà ebpuun te menge surung ne penleleven-gan. Midsuukan te vusew ini se deruwa ne etew ne laus ne ebpekekaid ne igkeandek en sikandan te menge etew ne warà en edtikà ne ebpevayà ketà te ralan.

²⁹ Ne migkuleyì dan te, “Sikuna ke Anak te Eleteala, ne engkey ma se kememeniyà nu kediey? Maa mibpengkayi ka su ebpeemekeiran key nu misan kenà pà ini ke timpu?”

³⁰ Ruen ketà te uvey ran medmerakel ne bavuy ne ebpememenumal.

³¹ Ne mibpemuyù ke menge vusew ki Hisus te, “Embiya edsegsehen key nikuna ne ketà key nu ipeawuk te menge bavuy.”

³² Migkahi si Hisus kandan te, “Kuwa kew en!” Ketà dà ne mid-ewaan dan en ke meama ne mibpengasuk dan en dut te menge bavuy,

ne mibpemelelahuy en ke minge bavuy se ed-umpak diyà te dempilas ne nengelened dan en diyà te ranew.

³³ Nekita ini rut te minge etew ne edtuganur ketà te minge bavuy ne mibpemelelahuy ran en diyà te inged su impemenudtul dan ini wey ke ned-ulaula rut te minge etew ne midsuukan te vusew.

³⁴ Guna su netuenan dut te minge etew ketà te inged ne midsamasama ran mibayà ki Hisus. Guna su nekeuma ran ne mibpemuyù dan kandin te menu ke med-awà sikandin ketà te inged dan.

9

Neulian ni Hisus ke Meama ne Minatey ke Lawa Rin

(Marcos 2:1-12; Lucas 5:17-26)

¹ Ne mid-untud en maa si Hisus te avang ne mid-apet dut te ranew ne mid-ulì diyà te inged din.

² Ne ruen minge etew ne nekeuma ne ed-ewit te etew ne mid-irehà diyà te duyanà ne minatey se tevì ne lawa rin. Guna su netuenan ni Hisus te rekelà ke sarig dan kandin ne migkehiyan din en ke minatey se tevì ne lawa rin te, “Kenà ka egkeuru, Mama. Nepesehad en ke keberedusaan nu.”

³ Ketà ne ruen dema ebpinpinuu ne minge etew ne ebpenurù te penduan ne guna su ner-ineg dan ini ne iyan netahù te hinawa ran te, “Ini ne etew ne edsumpalit te Eleteala!”

⁴ Ugaid ne netuenan en ni Hisus ke netahù te itungan dan, ne migkahi en sikandin diyà te

kandan te, “Meambe ke netahù te itungan niyu se iring kenihan ne meraat?

⁵ Endei rapit se melemu,” ke si Hisus, “te egkahi riyà te minatey se lawa rin te, ‘Ke menge salà nu ne nepesehad en’ etawa ve ke egkahi te, ‘Enew ka ne luluna nu ke ikam nu na ipanew ke en’ ”? ke sikandin.

⁶ “Ugaid ne guntaani ne ibpekita ku keniyu te ruen gehem dut te Impeanak te Menusiyà te ebpesahad te salà kayi te ampew te dunya.” Ketà ne migkehiyan din ke etew ne minatey ke lawa rin te, “Mama, enew ke en ne luluna nu ke ikam nu ne uli ke en!”

⁷ Ne mid-enew en ke etew, ne midlulun din ke ikam din ne mid-uli en.

⁸ Guna su nekita rut te langun ne menge etew ketà ne nengeandek dan, ne nereyù dan ke Eleteala su imbehey rin te menusiyà ini se gehem ne iring kayi.

*Mibpemili ni Hisus si Mateo te Eduma Kandin
(Marcos 2:13-17; Lucas 5:27-32)*

⁹ Ne mid-awà en si Hisus ketà, ne gewii rin te ed-ipanew ne nekita rin ke senge etew ne meama ne ebpevyad te buwis ne ed-ingaranan ki Mateo ne ebpinuu riyà te upisinà din. Ne migkehiyan ni Hisus sikandin te, “Duma ka kediey.” Arà dà ne mid-itindeg si Mateo ne miduma en kandin.

¹⁰ Ne senge hewii ne pinekaan si Hisus wey ke menge edumdumaan din diyà te valey ni Mateo, ne merakel ne ebpevyad te buwis wey ke menge kenè en birang ne menge etew ne nekeuma ne elin dan ki Hisus se migkaan ketà.

¹¹ Guna su nekita rut te menge Peresiyu ne dutun te uvey te valey ne nevrunan te ini se menge etew su egkaan, ne netegtehaad ne mibpendiyà dan te menge edumdumaan ni Hisus ne mid-insà te, “Meambe ke edseveka sikandin se egkaan ketà te menge etew ne ebpevyad te buwis wey ke menge kenè en birang ne menge etew?”

¹² Nerineg dà ni Hisus arà ne migkehiyan din en sikandan te sempità te, “Ke menge etew ne warà daru rin ne kenà dan ebpendiyà te terevawì, ugaid ne ke menge etew rà ne duen daru rin.

¹³ Ne iring din ded be rema kayi ini se menge etew su kenà iyan ku kinepengkayi se iyan ku ebpeuveyen ke menge metidtu kun se ulaula rin, ugaid ke menge etew ne kenà en birang apey ran mekedsendit,” ke si Hisus. “Ne ketà ne pegpegitunga niyu ke engkey se meana rut te impesurat ne Lalag te Eleteala ne egkahi te, ‘Kenà ku iyan egkiyuhan ke menge binatang ne ibehey niyu kedì ne ibpelengesa, ugaid ke kegkeyru niyu rut te menge ruma niyu.’ ”

Ruen Menge Etew ne Mid-insà ki Hisus ke Meambe ke Kenà Edlimpas te Egkaan ke Menge Edumdumaan Din

(Marcos 2:18-22; Lucas 5:33-39)

¹⁴ Ne ruen menge edumdumaan ni Juan ke Ebpebunyang ne nekeuma kayi te ki Hisus ne mid-insà te, “Sikami wey ke menge Peresiyu ne layun edlimpas te egkaan, ugaid ne ke menge edumdumaan nu ne kenà edlimpas te egkaan. Ne meambe ini?”

Impeiring ni Hisus ke Hinawa Rin te Ibpengesawa

¹⁵ Ne midtavak si Hisus te, “Embiya ruen egkewingen, maa edlimpas ves maa te kegkaan ke munge etew ne pinetelavuk te ini pà ke ibpengesawa te kandan? Kenà en iya! Ugaid ne ruen hewii ne egkeuma ne egkeawà ke ibpengesawa diyà te kandan, ne ketà dan pà edlimpas te egkaan.”

Insempità ni Hisus te Kenà Egkepakey ne Ebpegembiten ke Behu ne Penurù din wey ke Raan ne Penurù dut te Keep-epuan Dan

¹⁶ Ne migkahi maa si Hisus te, “Kenà edait ne idapi nu ke behu ne saput ketà te neredit en ne velegkas, su embiya ebpedepiyen nu ne ketà te kebpiii nu ne egkenseng ke vehu ne saput ne egkevindas ke redit en ne velegkas ne tuwas pà te keluag te bisey rin.

¹⁷ Ne iring din ded dema,” ke si Hisus, “ke behu ne tebà su kenà egkepakey ne riyà nu idtahù te raan en ne edtehuan ne mibeelan ne lundis. Su embiya arà se ed-ul-ulaan nu ne edsevu ke tebà ne ebetu ke lundis ne midtehuan, ne edturayas ke tebà ne egkereetan, ne egkereetan dema ke midtehuan ne lundis. Tembù be iyan nu iya tehui te behu pà ne tebà ini se edtehuan ne behu pà ne mibeelan apey kenà egkereetan arà se tebà wey ke midtehuan.”

*Neulian ni Hisus ke anak ni Jairo wey ke Meritan ne Mid-amì dà te Belegkas Din
(Marcos 5:21-43; Lucas 8:40-56)*

¹⁸ Gewii te edlalag pà si Hisus kayi ne nekeuma se senge etew ne egkeunutan te menge Hudiyanen ne midlumpeng en diyà te etuvangan ni Hisus se egkahi te, “Behu pà ne minatey ke anak ku ne meritan, ugaid ne pengkayi ke en apey nu dempena sikandin ne egkeuyag ded.”

¹⁹ Ne mid-itindeg si Hisus ne midumaan kandin te ed-uli abpeg ke menge edumdumaan din.

²⁰ Ne ruen meritan ketà dema ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. Mibpenelektelek en sikandin diyà te uriyan ni Hisus ne mid-amì din dà ke belegkas ni Hisus.

²¹ Su kehingginawa rin te, “Embiya egkeamì ku rà misan ke belegkas din ne egkeulian en ini se sakit ku.”

²² Midlingì si Hisus ne nekita rin ini se meritan ne migkahi te, “Bayi, kenà ka egkeuru! Neulian ke en su sabap dut te kinesarig nu kediey.” Arà dà ne neulian en ke meritan.

²³ Ketà ne mibpendiyan en si Hisus te baley te egkeunutan te menge Hudiyanen. Guna su nekita rin ke menge ebpememulendag te ediyaga te minatey, ne nerineg din en se ebpemenderawit,

²⁴ ne migkehiyan din sikandan te, “Awà kew langun! Warà minatey ayan se vatà su neke-lipereng dà sikandin!” Nerineg dan dà ini ne mid-engitan dan en sikandin.

²⁵ Guna su mibpengawà en ke menge etew ne midlusud en si Hisus diyà te mibpereyasan dut te

vatà ne migeweran din ke velad te vatà ne mid-
enew en se ed-ipanew.

²⁶ Ne nekeeneb en ke tudtul mekeatag dut te ini ne ned-ulaula diyà te langun ne nekeerivey ne inged ketà.

Neulian ni Hisus ke Deruwa ne Etew ne Nepisek

²⁷ Ne mid-awà si Hisus ketà ne gewii rin te ed-ipanew ne ruen deruwa ne etew ne pisek ne edtundug kandin. Midtawag dan kandin se ebpemuyù te, “Ey, sikuna ne kevuwaran ni David, ikeyru key nikuna!”

²⁸ Guna su nekepemenayik en si Hisus diyà te valey ne mid-uvey ke deruwa ne etew ne nepisek. Ne mid-insaan din sikandan te, “Menu, ebperetiyaya kew ve te egkeulian ku sikiyu?” “Uya, Mama, ebperetiyaya key,” ke se menge pisek.

²⁹ Ne midampen ni Hisus ke mata ran ne migkahi te, “Sabap te kebperetiyaya niyu ne meulii kew en!”

³⁰ Arà dà ne nekekita ran en. Ne mid-il-
ilutan ni Hisus te egkahi kandan te, “Kenà niyu penudtula ini te misan entei!”

³¹ Ugaid ne mid-awà dan ketà ne nasì dan en in-eneb ke tudtul mekeatag ki Hisus diyà te langun ne nekeerivey ne inged ketà.

Neulian ni Hisus ke Senge Etew ne Emew

³² Gewii te ed-awà en ke menge etew ne ruen maa menge etew ne nekeuma kayi te ki Hisus ne ed-ewit te senge etew ne neemew su midsuukan te vusew.

³³ Ugaid ne guna su midsegseg en ni Hisus ke vusew ne mibpemekaid, ne nekelalag en ini se meama. Ne negeyip nevenar ke langun ne menge etew ketà ne mibpein-inseey ran te, “Taman te taman en ne warà tew pà mekita se iring kayi kayi te bansa tew te Israyil.”

³⁴ Ugaid ne migkahi ke menge Peresiyyu ketà te, “Ke unuten te menge vusew se mibehey kandin te gehem te kebpenegseg te menge vusew.”

Neyruwan ni Hisus Ke Menge Etew

³⁵ Ne mid-eneb ni Hisus te ebayà ke langun ne reisek dekelà ne menge inged. Mibpenurù diyà te menge valey ne ebppededian te menge Hudiyannen te penduan dan, ne impesabut din kandan ini se Meupiya ne Tudtul te Kedetui te Eleteala te menge etew, wey nengeulian ke menge etew ne ebpenderraru te misan engkey en ne ebpenggeramen.

³⁶ Ne uman din mekita ke medmerakel ne etew ketà ne egkeyruwan din sikandan su merungkug dan wey mekeyruwuru su iyan dan neiringan ne menge bilibili ne warà tumetuganur.

³⁷ Ne migkahi si Hisus diyà te menge edumdumaan din te, “Medmerakel se menge etew ne warà pà meketelimà dut te Meupiya ne Tudtul mekeatag te Eleteala. Iring dan te nelutuan ne parey. Meluag nevenar ini se pareyanan, ugaid ne warà utew ruma ne ebpengehani.

³⁸ Pemuyù kew riyà te kemuney te pareyanan te medsuhù pà sikandin te ruma ne ed-ehani diyà te pareyanan din.”

10

Mibpemilì ni Hisus ke Sepulù wey Deruwa ne Edumdumaan Din
(*Marcos 3:13-19; Lucas 6:12-16*)

¹ Ne miburun ni Hisus ke sepulù wey deruwa ne edumdumaan din ne mibehayan din te gehem te kebpekesegseg te vusew ne ed-amung-amung te menge etew, wey gehem ne ebpekeulì te misan engkey ne daru wey sakit.

² Ini ke menge ngaran dut te sepulù wey deruwa ne edumdumaan din ne mid-ingaranan ni Hisus te epustulis: ke egkeuna ne si Simon (ke ed-ingaranan dema ki Pedro) wey ke ari rin ne si Andres; si Santiago wey ke ari rin si Juan ke menge anak ni Sibidiyu;

³ Si Felipe wey si Bartolome; si Tomas wey si Mateo ke ebpevayad te buwis; si Santiago ke anak ni Alpiyu, wey si Tediya;

⁴ si Simon ke Patriat ne iyan din meana ne diralem se lengesa rin dut te inged din, wey si Hudan Iskeriyuti ke ed-ulug ki Hisus te ked-imetayi.

Impeipanew ni Hisus ke Sepulù wey Deruwa ne Edumdumaan Din
(*Marcos 6:7-13; Lucas 9:1-6*)

⁵ Ini se sepulù wey deruwa ne impeipanew ni Hisus ne midteleenan din te, “Kenà kew ebpendiyà te menge inged te menge etew ne kenà Hudiyenen wey menge inged te Semeriya.

⁶ Ugaid ne diyà kew te menge ruma tew ne menge kevuwaran ni Israyil ne iring te menge bilibili ne nelaag.

⁷ Diyà kew pesabut kandan te mehaan en ebpekeuma ke Kedetui te Eleteala te menge etew.

⁸ Bewii niyu ke menge ederaru, benawa niyu ke menge minatey, bewii niyu ke menge kevuwaen, wey penegseha niyu ke menge vusew ne ed-amung-amung te menge etew. Ini se netelimà niyu ne riyà ebpuun te Eleteala ne warà niyu mevayari, ne kenà niyu rema buyui ke egketevangan niyu.

⁹ Kenà kew ewit te bulawan, pirak etawa pelatà kayi te kemuyut nu.

¹⁰ Kenà kew ewit te kempiru te ked-ipanew niyu, etawa idsambì ne belegkas wey telumpà, wey misan tuked. Su ke egelevek ne dait ne ebehayan te igkeuyag din.

¹¹ “Piya endei ne inged ne egkeumaan niyu, misan dekelà ne inged etawa deisek dà, ne pemengà kew te etew ne ebpepemenayik keniyu, ne ketà kew rà rateng taman te ked-awà niyu ketà te inged.

¹² Embiya ebpepemenayik kew te valey ne penubtuvari niyu ke ed-ubpà ketà te valey te, ‘Ebpeneuven kew te Eleteala!’

¹³ Ne embiya edtelimaen kew rut te etew ketà te valey, ne ke kinepenuvadtuvad niyu ne egketuman ketà te kandan. Ugaid ne embiya kenà dan edtelimà keniyu, ne ke kinepenuvadtuvad niyu ne keniyu red.

¹⁴ Ne embiya ruen inged ne warà ketà ne edtelimà keniyu etawa kenà dan ebpepemenayik dut te ibpesabut niyu, ne ewai niyu sikandan wey pendegdeha niyu ke lipupuk diyà te menge paa

niyu.

¹⁵ Sevenarbenar ini se idtarem ku keniyu,” ke si Hisus, “muna pà ke kedusai te Eleteala kandan ketà te hewii ne kedtimbang din te menusiya dut te kinerusa rin te menge mehinged ketà te Sudum wey Gemura.”

*Migkahi ni Hisus ke Keresayan wey Kebpeke-sakit ne Ebpekeuma kayi te Menge Etew
(Marcos 13:9-13; Lucas 21:12-17)*

¹⁶ “Pemingew kew,” ke si Hisus, “su edsuhuen ku sikiyu riyà te menge etew ne ebpekekaid, ne iring kew te menge bilibili ne ebpekeseruk diyà te senge ingeren en ne mewalew ne asu. Tembù be ingat kew ne pekeibpes kew iring te uled, ugaid ne kayi te ulaula niyu ne iring kew te melepati ne meamuk.

¹⁷ Uram kew su ebpenigkemen kew te menge etew ne ibpepemenayik kew diyà te kukuman. Ne ebpenruuhen kew riyà te valey ne ebpenge-dian te penduan te menge Hudiyanen.

¹⁸ Ne edtuyuken kew riyà te menge egke-unutan wey menge mepurù su atag dut te ked-sarig niyu kediey, ugaid ne ini en imbe ke ralan te kebpesabut niyu kandan wey ke menge kenà Hudiyanen dut te Meupiya ne Tudtul mekeatag kediey.

¹⁹ Ketà te ibpepemenayik kew riyà te kukuman, ne kenà kew meuru ke ebmenmenuwen niyu se kedlalag niyu te kedtindog te hinawa niyu wey engkey se ralan te kegkahi niyu, su ketà ne iyan niyu egkekahi ne lalag ne ibpekahi keniyu.

²⁰ Su iyan niyu egkekahi ne kenà keniyu ne lalag, ugaid ne lalag ne riyà ebpuun te Kedese-nan ne Ebpetuntul te Menusiyà ne midsuhù te Amey tew ne Eleteala.

²¹ “Su ketà ne hewii ne ruen menge etew ne misan ke temperà dan te pused ne ed-uluhen dan su ebpeimetayan, ne iring din ded dema ke ed-ul-ulaan te amey dut te menge anak din. Ne ruen menge anak ne ebpekid-atu te menge lukes dan su ebpeimatayan dan.

²² Ne egkunteraan kew te langun su atag te keduma niyu kediey, ugaid ne ke etew ne kenà edsuwey te keduma rin kediey taman te kayi pà sikandin te ampew te dunya ne ebpekehaked te umur ne kenà edtaman.

²³ Embiyà ebpekesekitan kew nikandan diyà te senge inged su sabap te kebpesabut niyu ne pelahuy kew riyà te ruma pà ne inged. Su sevenarbenar ne igkahi ku keniyu te kenà niyu pà egkepasad ke helevek niyu riyà te langun ne menge inged te Israyil ne edlived en ke Impeanak te Menusiyà.

²⁴ “Su warà etew,” ke si Hisus, “ne ebpepenurù pà ne iyan en mepurù dut te ebpenurù kandin, ne warà uripen ne iyan en mepurù dut te mibpengunguripen kandin.

²⁵ Tembù be ebmehalew ke etew ne ebpepenurù pà ke egketamat din en ke ibpenurù kandin su apey ebpekeiring en sikandin dut te ebpenurù kandin. Ne iring din ded dema ke uripen ke ebpekeiring en dut te mibpengunguripen kandin. Ne embiya ke pengulu dut te telteleanak ne ed-ingaranan

ki Bilsibul ke egkeunutan te busew ne iyan pè be kenà tuwas pà ne meraat ke id-ingaran dut te minge anak din.”

*Ke Engkey se Dait ne Igkeendeki
(Lucas 12:2-7)*

²⁶ “Iyan se kenà kew meandek,” ke si Hisus, “dut te minge etew.

Su langun te netelewan guntaani,
ne ebpekepehawahawa red keuremà.
Ne langun ne impegelesà,
ne egkepayahan ded.

²⁷ Ini se ingkahi ku keniyu te merusirem,
ne ipenuitul niyu en diyà te kerayahan.
Ne ini se lalag ku ne sikiyu rà se nekerineg,
ne ibpesabut niyu riyà te langun ne minge etew.

²⁸ Ne kenà kew meandek dut te minge etew ne iyan dà egkepatey se lawa niyu, ugaid ne kenà dan ebpekepatey te himukud niyu. Ugaid ne iyan niyu ikeandek ne Eleteala, su kenà lawa niyu rà se egkepatey rin su ruen gehem din te kebpekeantug te himukud niyu riyà te apuy nerakà.

²⁹ Su ruen deisek ne pepenuk ne egkepemasa te lelima ne timan ne deruwa rà ne tumbaha. Ne misan iring ketà se kevavà te elehà din, ne warà seveka kandan ne egkeulug diyà te tanà embiyà kenà egkiyug ke Amey niyu ne Eleteala.

³⁰ Ne iyan kew pè be melipati te Eleteala su misan ke edtiweruwan te bulvul niyu ne nevirang din en.

³¹ Engketà be ne kenà kew meandek su iyan kew pà belielehà diyà te kandin dut te merakel ne pepenuk.”

*Ke Imbaag ni Hisus Mekeatag Dut te Menge
Etew ne Ebpawew Kandin*

(Lucas 12:8-9)

³² “Piya engkey ne etew,” ke si Hisus, “se ebpayag diyà te minge etew se ebpesakup kediey, ne iyan ku rema ibpayag diyà te suluhuen te Amey ku ne Eleteala diyà te langit ne ed-engkunen ku sikandin te kediey ne sakup.

³³ Ugaid,” ke si Hisus, “piya engkey ne etew se ebparew riyà te minge etew te sakup ku sikandin, ne kenà ku rema ed-engkunen te sakup ku sikandin diyà te minge suluhuen te Amey ku ne Eleteala diyà te langit.”

*Ke Kebperetiyya ki Hisus ke Puunan te Kebpe-
mekedsingey te Hinawa Dut te Telteleanak*

(Lucas 12:51-53; 14:26-27)

³⁴ “Maa, iyan niyu kunaan,” ke si Hisus, “ke ini se kinepengkayi ku ne ed-ewit a te kebmelinew kayi te kelibutan? Kenà iring ketà! Su idtarem ku keniyu te kenà kebmelinew, ugaid ne kayi ebpuun te kinepengkayi ku ne ebpekunkun-tereey ke itungan dut te minge etew.

³⁵ Su sabap te mibpengkayi a
ne egkunterà ke minge anak ne meama dut
te amey ran,
ne egkunterà ke minge anak ne meritan dut
te iney ran,
ne egkunterà ke enuhang ne meritan dut te
ambey ran,

³⁶ ne iyan mepasang ne egkekunterà te minge
etew
ke megeget ne sikandan ded ne ebpenusuled.

³⁷ “Embiyà ruen etew ne iyan pà dekelà se limù din dut te amey rin wey iney rin kenà siaken, ne kenà edait sikandin ne edumdumaan ku. Iring din ded dema ke etew ne iyan pà dekelà se limù din dut te anak din kenà siaken, ne kenà edait sikandin ne edumdumaan ku.

³⁸ Ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke minge suhù ku misan ibpatey rin. Su embiya kenà, ne kenà edait sikandin ne edumdumaan ku.

³⁹ Su ke etew ne egkenuhun te umur din, ne ebpatey lavew. Ugaid ke etew ne iyan din ibpatey se keduma rin kediey te kebpemesabut dut te Meupiya ne Tudtul, ne ruen umur ne ibehey kandin ne warà edtemanana din.”

*Mekeatag te Kebehey te Eleteala te Lalew
(Marcos 9:41)*

⁴⁰ “Piya entei ne etew,” ke si Hisus, “ne edtelimà keniyu, ne midtelimà dema kediey. Ne misan entei ne etew ne edtelimà kediey, ne kenà siak dà se midtelimà din su ke Amey ku rema ne Eleteala ne midsuhù kediey ne midtelimà din ded.

⁴¹ Ne piya entei ne etew ne edtelimà te etew ne ebpelambas te Lalag te Eleteala su midtendù te Eleteala ini se etew ne ebpelambas te lalag din, ne egkevehayan te Eleteala arà se etew te lalew iring dut te lalew te midtendù din ne ebpelambas te lalag din. Ne iring din ded dema ke etew ne edtelimà te metidtu ne etew su sabap te ketidtu

rin, ne egkevehayan te Eleteala te lalew iring te lalew dut te metidtu ne etew.

⁴² Ne benar ini se egkehiyen ku keniyu, misan meadsil dà ne wayig se ibpeinum dut te senge etew ne edumdumaan ku su atag dut te keduma rin kediey, ne ruen lalew rin. Misan ke kevevaan en dut te edumdumaan ku ini se pineinum din.”

11

Ke Menge Midsuhù ni Juan Diyà te ki Hisus (Lucas 7:18-35)

¹ Nekepasad si Hisus te kebpenurù din dut te sepulù wey deruwa ne edumdumaan din, ne mid-awà sikandin ketà ne mibpendiyà te menge sepiring ded ne inged su ebpenurù wey ebpesabut te Lalag te Eleteala.

² Ugaid ne riyen en te bilengguan si Juan ke Ebpembunyag. Ne guna su nerineg din ke mekegeyip ne mid-ulaula ni Hisu Kristu, ne ruen menge edumdumaan din ne midsuhù din diyà te ki Hisus te ebpeinsaen.

³ Nekeuma ran ne migkahi ran te, “Menu, sikuna ke impesabut ni Juan ne ibpepengkayi te Eleteala etawa ruen duma pà ne egkepenareng dey?”

⁴ Ne midtavak si Hisus te, “Uli kew en diyà te ki Juan ne penudtula niyu kandin ini se nekita niyu ne mid-ulaula ku wey ini se nerineg niyu ne migkahi ku.

⁵ Iyan niyu peketueni kandin ne kayi ebpuun te kediey ne nekeulit en se kebpekekita rut te menge pisek, nekeipanew en ke menge pungkù, neulian en ke menge kevuwaen, nekerineg en

ke munge bengel, neuyag en ke munge minatey wey impesabut ku ke Meupiya ne Tu dtul diyà te munge ayuayu,” ke si Hisus.

⁶ “Ne peketueni niyu kandin te dayirayi nevenar ke etew ne kenà eduwaruwa kediey.”

⁷ Guna su nekehenat en ke munge edumdumaan ni Juan, ne midlalag en si Hisus mekeatag ki Juan diyà te denda ne munge etew ne nevrurun, ke sikandin te, “Ketà te kinependiyà niyu te ki Juan diyà te tanà ne kenà egkeubpaan te munge etew, ne engkey se mibpenareng niyu? Maa, ebpenareng kew te ebpekekita kew te etew ne iring te karan ne edsemseberen te keramag?”

⁸ Engkey ve iya, etew ne mibevelegkas te nepenù te rayandayan? Kenà buwa, su ke etew ne mibevelegkas te iring ketà ne riyà niyu rà egkekita te turuhan te munge ratù.

⁹ Na, engkey ve iya se mid-intengan niyu? Engkey, etew ne ebpelambas te Lalag te Eleteala? Arà imbe! Ugaid ne igkahi ku keniyu te arà se nekita niyu ne labi pà dut te etew ne ebpelambas te Lalag te Eleteala.

¹⁰ Su si Juan ini ke nekahi te Eleteala rut te impesurat ne Lalag din ringan se egkahi te, ‘Duen edsuhuen ku ne ibpeuna ku keykew te kebpekepenehana rut te munge etew te kebpekeuma nu.’

¹¹ Sebenarvenar ini,” ke si Hisus, “warà pà etew ne in-anak kayi te ampew te dunya ne ebpekerepeng ki Juan ke Ebpembunyag. Ugaid ne misan ke kevevaan en ne etew dut te langun ne Edetuan te Eleteala diyà te langit keuremà ne muna pà sikandin ki Juan.

¹² Igenat dut te kebpesabut ni Juan taman guntaani ne mibpekepesangan ini se menge Edetuan te Eleteala riyà te langit, ne ruen menge etew ne edtehel ed-ahew te Kedatù.

¹³ Su ini se Edetuan te Eleteala ne impesabut dengan dut te langun ne ebpelambas te Lalag te Eleteala wey riyà te penduan ni Moises taman te hewii ne migemew en si Juan.

¹⁴ Ne impesabut dan dema te edlived ded si Elias, senge etew ne ebpelambas te Lalag te Eleteala rengan. Ne embiya egkiyug kew ne ebperetiyaya dut te impesabut dan, ne si Juan ne si Elias ded.

¹⁵ Tembù be,” ke si Hisus, “itaan niyu ke telinga niyu kayi te migkahi ku ini!”

¹⁶ “Ugaid ne ini se menge etew te huntaani en,” ke si Hisus, “engkey se ebpeiringan ku? Iring dan en iya te menge vatà ne ebpemimpinuu riyà te kevrunan. Ed-umew ini se senge puntuk diyà te menge ruma ran te,

¹⁷ ‘Midlebpad key, ugaid ne warà kew medsayew! Mibminudar key, ugaid ne warà kew medsinehew!’

¹⁸ Iring din ded dema ke kebpekeuma ni Juan, su nekita niyu te edlimpas te kegkaan si Juan ne kenà dema ed-inum te piya engkey ne ebpeketevereg ne iyan niyu migkahi se, ‘Midsuukan sikandin te vusew!’

¹⁹ Ne mibpengkayi ke Impeanak te Menusiyà ne nekita niyu te migkaan sikandin wey med-inum ne iyan niyu maa migkahi se, “Tengtengi niyu ma ayan se midelungan te bitil! Ne metehel ne ed-inum! Ne teleduma kayi te ebpevayad te buwis wey misan ke menge etew ne kenà

en birang.’ Ugaid, ke si Hisus, ketà te minge ulaula te minge etew ne tidtu ne mibperetiyaya te Eleteala ne nekeheram te limù din, ne egkekita te utew metau ke Eleteala te langun ne petiralan din.”

*Mekeatag te minge Etew ne Warà Med-engked te meraat ne Ulaula Ran
(Lucas 10:13-15)*

²⁰ Ne midsewayen ni Hisus ke minge etew ketà te inged ne merakel se impekita rin ne minge mekegeyip, su warà dan engkeri ke minge meraat ne ulaula ran.

²¹ “Sikiyu ne minge etew riyà te inged ne Kurasin,” ke si Hisus, “mekeandek-andek se egketemanan niyu! Ne sikiyu riyà te inged ne Bitsaida, mekeandek-andek dema se egketemanan niyu! Su embiya ke minge etew rà diyà te minge inged ne Tiru wey Sidun se nekekita kayi te minge mekegeyip ne mid-ulaula ku riyà te keniyu, ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-evuwan dan ke ulu ran su tuus te nekedsendit dan.

²² Tentenuri niyu ini su ketà te hewii ne kedtimbang te Eleteala te menusiya ne iyan pà dekelà se kedusa te Eleteala keniyu rut te minge mehinged te Tiru wey Sidun.

²³ Ne sikiyu rema ne minge etew riyà te inged ne Kapir nawum,” ke si Hisus, “egkesuat kew perem ne ebpekesugkur diyà te langit, ugaid ne ibpeantug kew riyà te apuy nerakà. Su ini se mekegeyip ne mid-ulaula ku ne impekita ku keniyu ne embiya ingkepekita ku rà ini riyà te

inged ne Sudum, ne warà dan dereeti te Eleteala ne kemulu ran pà guntaani.

²⁴ Tembù be tentenuri niyu ini su ketà te hewii ne kedtimbang te Eleteala te menusiya, ne muna pà se kedusai rin keniyu rut te mehinged diyà te Sudum!”

“Pengkayi kew te kediey,” ke si Hisus, “ne Imeley kew”

(Lucas 10:21-22)

²⁵ Ne ketà ne mibpengeningeni si Hisus se egkahi te, “Ew Amà, sikuna ke Kerenan diyà te langit wey kayi rema te ampew te dunya. Dekelà se kebpeselamat ku kenikew su impayag nu ke ketau nu rut te menge etew ne warà egketùtuenan din, ne in-eles nu ini se ketau nu rut te menge etew ne dekelà se netuenan din.

²⁶ Uya, dekelà se kebpeselamat ku kenikew, Amà, su ini se mid-ulaula nu ne ini ke kiyug nu.”

²⁷ Ne migkahi si Hisus diyà te menge etew te, “Ke Amey ku se mibpesarig kediey te langun taman. Warà netau kedì te Anak a te Eleteala liyu rà te Amey ku ne Eleteala. Ne warà netau te Amey ku ne Eleteala liyu rà te siaken ne Anak din wey ke menge etew ne egkiyuhan ku te ebpayag mekeatag dut te Amey ku.”

²⁸ “Pengkayi kew te kediey,” ke si Hisus, “langun niyu ne nengeluhat wey nengevehatan, su ebpeimelayen ku sikiyu.

²⁹ Isangan niyu ke ingkul ku diyà te keniyu ne iyan din meana ne guru kew kayi te kedì ne tumana niyu ke penurù ku, ne ebpekeimeley

kew su siaken ne metmetulanged wey dekelà se kegkeyru ku.

³⁰ Su ini se penurù ku ne melemu ne edtumannen, ne meagkap ini se ibpevava ku keniyu.”

12

Ke Impenurù ni Hisus Mekeatag te Hewii ne Id-imeley

(Marcos 2:23-28; Lucas 6:1-5)

¹ Senge hewii te Sepetu, ke Hewii ne Id-imeley, ne midtarà en si Hisus diyà te pareyanan. Nevitil ini se menge edumdumaan ni Hisus ne mibpengetu ran ke tiugkayan ne mibpengurib su idsungit dan.

² Nekita rà ini dut te menge Peresiyu ne migkehiyan dan en si Hisus te, “Tengtengi nu ma ayan se menge edumdumaan nu su nekesurang en ayan se ed-ul-ulaan dan dut te Penduan tew ne egkahi te warà egelevek te Andew te Id-imeley.”

³ Ne migkehiyan ni Hisus sikandan te, “Maa, warà niyu ves mevasa ke impesurat te Eleteala mekeatag te mid-ulaula ni David, ke ratù tew rengan? Su ruen hewii ne sikandin wey ke menge sundaru rin ne nengevitil dan.

⁴ Ne midlusud si David diyà te Valey te Eleteala ne migkuwa rin ke egkeenen ne indenà diyà te Eleteala ne migkaan din ne mibehayan din ke menge ruma rin. Ugaid ne kayi te Penduan tew ne kenà arà egkekaan te piya entei ne etew su ke menge terebpelengesa rà te Eleteala.

⁵ Nevasa niyu red ura kayi te Penduan tew ne impesurat ki Moises ne egelevék ded ke menge terebpelengesa riyà te Nekebpuru ne Valey te Eleteala ketà te Hewii ne Id-imeley misan ebpekesurang dut te Penduan tew te arà ne hewii, ugaid ne warà mekedsalà.

⁶ Benar ini se igkahi ku keniyu,” ke si Hisus, “te ruen nekeuma en kayi ne muna pà se gehem din dut te Nekebpuru ne Valey te Eleteala.

⁷ Su ruen impesurat ne Lalag te Eleteala ne egkahi te, ‘Kenà ku iyan egkiyuhan ke menge binatang ne ibehey niyu kedì ne ibpelengesa, ugaid ke kegkeyru niyu rut te menge ruma niyu.’ Embiya nesebutan niyu ke meana kayi te impesurat ini,” ke si Hisus, “ne warà kew mekekahi geina te nekedsalà ini se menge etew ne warà meraat ne mid-ulaula ran.

⁸ Su ke Impeanak te Menusiyà ke ebayàbayà se egkahi te engkey se edait ne ed-ul-ulaan dut te Hewii ne Id-imeley.”

*Ke Meama ne Nekeyengkeng ke Belad Din
(Marcos 3:1-6; Lucas 6:6-11)*

⁹ Mid-awà si Hisus ketà ne mibpendiyà te baley ne ebppedgian te menge Hudiyanen te penduan dan.

¹⁰ Ne ruen ketà senge etew ne meama ne nekeyengkeng se belad din. Duen dema ketà menge Peresiyu ne ebpenipat ki Hisus su ebpe-mengà dan te kebpekesurang din te penduan dan kayi te Hewii ne Id-imeley apey ruen id-isuhat dan kandin ne kevenar. Ne mid-insà dan ki Hisus te, “Kayi te penduan tew menu, idtuhut be kenitew se ebpemawì te Hewii ne Id-imeley?”

¹¹ Ne migkahi en si Hisus kandan te, “Embiya ruen senge etew keniyu ne ruen bilibili rin ne neulug diyà te merallem ne kalut te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley?”

¹² Ne muna pà ne belielehà ke etew dut te bilibili! Tembù be kayi te penduan tew ne kenà ki ebpekesurang ke edtevangen ta te ruma ta misan Hewii ne Id-imeley.”

¹³ Ne migkehiyan en ni Hisus ke meama ne nekeyengkeng ke velad din te, “Mama, ketenga nu ayan se velad nu.” Ne ketà ne migketeng dut te meama ke velad din ne neulian en, ne warà ded bira rin dut te divaluy ne velad din.

¹⁴ Ketà ne mid-awà ke menge Peresiyu ne mibpemengà dan se ralan te kegkeimetayi ran ki Hisus.

Si Hisus ke Mibpemilì ne Edsugsuhuen te Eleteala

¹⁵ Guna su nerineg ni Hisus ini se netahù te itungan rut te menge Peresiyu, ne mid-awà sikandin ketà te inged ne denda ne menge etew se miduma kandin. Ne neulian din ke langun ne ebpenderaru,

¹⁶ ugaid ne mibenduan ni Hisus sikandan te kenà dan peketueni te ruma ne etew ini se mid-ulaula rin.

¹⁷ Iyan din kinekahi kayi su apey metuman ke impesurat te Lalag te Eleteala ne impekahi ki Isayas te,

¹⁸ “Ini ke sugsuhen ku ne mibpemilì ku, sikandin ke igkelimù ku, ne ebpekesuhat sikandin te hinawa ku.

Ebpelumunan ku sikandin
dut te Kedeseenan ne Ebpetuntul te Menusiyà,
ne ini se metidtu ne kukuman ku
ne ibpesabut din diyà te langun ne menusiyà.

¹⁹ Ugaid ne kenà sikandin ebpekidlawan etawa
ebpemensag,
ne kenà sikandin edwaakwaak en se edlalag
diyà te kevrunan te minge etew.

²⁰ Embiya idsempità ta ke ulaula rin kayi te
menusiyà,
ne kenà din ebettien en ke etew ne iring te
subpang ne migeri en,
ne edtulengeran din ke etew
ne iring te ebmelatmelat ne sulù ke sarig din,
ne kenà ed-engked ke tavang din taman te
egketalew rin
langun ne kenà metidtu.

²¹ Ne kayi te kandin ne ebpekesarig
ke langun ne menusiyà.”

*Iyan Kunaan te Menge Etew ne Riyà Ebpuun
te ki Bilsibul ke Unuten te Busew ini se Gehem ni
Hisus*

(Marcos 3:20-30; Lucas 11:14-23)

²² Ne ruen minge etew ne mid-ewit kayi
te ki Hisus te etew ne nepisek wey neemew
su midsuukan te vusew. Midsegseg ni Hisus
ke vusew kayi te meama ne neulian en, ne
nekelalag wey nekekita en.

²³ Nengegeyip ke minge etew ketà ne ke
sikandan te, “Menu, sikandin be buwa ini ke
nekahe ni Eleteala ne kevuwaran ni David ke
datù tew rengan?”

²⁴ Guna nerineg ini rut te minge Peresiyu ketà ne migkahi ran te, “Si Bilsibul ke unutan te minge vusew se mibehey kandin te gehem te kebpenegseg te minge vusew.”

²⁵ Ugaid ne netuenan ni Hisus ke netahù te itungan dan ne migkahi en te, “Upama ke ruen datù te inged ne iyan ded ed-uneuy ebpevunuey ke minge sakup din, ne egketunggad arà se inged din. Ne iring din ded dema ke ruen pehinged etawa telteleanak ne iyan ded ed-uneuy egkewaha, ne warà ebpengkusan din ke kenà egkevurahey.

²⁶ Iring din ded be ketà ke midetuan ni Setanas ke unuten te minge vusew. Embiya iyan ded ed-uneuy ebpevunuey ke sakup din ne kenà meuhet se kedatù din su egketunggad arà se edetuan din.

²⁷ Embiya benar ne iyan ku ibpenegseg te vusew ke gehem ni Bilsibul, ne endei ve ebpuun ke gehem dut te edumaruma keniyu te ebpenegseg te vusew? Sikandan be ayan se ebpekekahi te warà mekesuhat ke egkehiyen niyu.

²⁸ Ugaid ne iyan benar ne riyà ebpuun te Kedeseenan ne Ebpetuntul te Menusiyà ini se gehem ku te ebpenegseg te vusew. Sabap kayi ne egketuenan niyu te neuma en ke hewii te Kedatù te Eleteala keniyu.

²⁹ “Ugaid ne netalew ku en si Setanas ke unuten te minge vusew,” ke si Hisus, “tembù be ebpekesegseg a te minge sakup din. Su warà etew ne ebpekelusud te valey te etew ne mevaher apey ebpenakew te minge kearen din embiya kenà din ed-unaan pà te ebakù arà se

etew ne mevaher. Ugaid ne embiya nevakù din en, ne arà pà ne ebpekekuwa sikandin dut te kearen.

³⁰ “Su ke etew ne kenà ku ruma ne kunterà ku,” ke si Hisus. “Ne ke etew ne kenà ed-amung kediey te eburun kayi te munge etew, ne ebpemburahey.

³¹ Tembù be igkahi ku keniyu,” ke si Hisus, “te egkepesahad te Eleteala ke langun ne munge salà te munge etew ne misan engkey ne meraat ne edlelehan dan kandin. Ugaid ke etew ne edlalag te meraatey mekeatag dut te Kedesenan ne Ebpetuntul te Menusiyà, ne kenà en vulug egkepesahad te Eleteala ke salà din.

³² Ne misan engkey en ne etew ne edlalag te meraatey mekeatag dut te Impeanak te Menusiyà ne egkepesahad te Eleteala te salà din, ugaid ne misan engkey ne etew ne edlalag te meraatey mekeatag dut te Kedesenan ne Ebpetuntul te Menusiyà, ne kenà en vulug egkepesahad te Eleteala ke salà din taman te taman.”

Ke Ulaula te Munge Etew ne Ebpekeiring te Ebahas ne Kayu

(Lucas 6:43-45)

³³ “Upama ke iring te kayu,” ke si Hisus, “embiya meupiya se kegueyhuey rin ne kayu, ne kenà ebahas te meraatey. Ne engketà ded maa ke kayu ne ruen sakit din, ne kenà ebahas te meupiya. Ketà be ne egketueanan ta embiya meupiya ke kayu kayi te bahas din.

³⁴ Engketà ded dema te sikiyu. Iring kew te munge uled ne ebpekekaid, ne warà meupiya ne

egkekahi niyu geina te memeraatey ini se netahù te hinawa niyu. Su piya engkey se intahù te etew te hinawa rin, ne ini se egemew te bèbà din.

³⁵ Su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaid ke etew ne meraatey se ulaula rin, ne meraatey rema se kedlalag din su iyan din intahù te hinawa rin ne meraatey.

³⁶ Tentenuri niyu ini su ketà te hewii ne kedtimbang te Eleteala te menusiya, ne ibpetavak te Eleteala te minge etew ke uman senge tahà ne nelalag dan ne warà rantek din.

³⁷ Su ke langun ne minge lalag niyu ne migemew te bèbà niyu, ne ketà kew edtimbanga ke edusaan kew ve etawa kenà.”

*Mibuyù ki Hisus ke Menge Peresiyu te Ed-inteng Dan te Ed-ul-ulaan Din ne Mekegeyip
(Marcos 8:11-12; Lucas 11:29-32)*

³⁸ Ketà te minge etew ne nevurun ne ruen minge meyerù te penduan wey minge Peresiyu ne migkahi te, “Meyerù, egkiyug key ne ed-inteng te mekegeyip ne ed-ul-ulaan nu tuus te gehem nu.”

³⁹ Ugaid ne migkahi si Hisus te, “Sikiyu ne minge etew te guntaani en, meraatey nevenar se ed-ul-ulaan niyu su warà kebperetiyaya niyu te Eleteala! Ugaid ne warà en ma tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.

⁴⁰ Su mid-iveleng te dekelà ne serà si Jonas ne taman te tetelu ne hewii ne riyà dà sikandin te hetek te rekelà ne serà. Ne engketà ded dema

ke Impeanak te Menusiyà ne riyà sikandin te diralem te tanà lusud te tetelu ne hewii.

⁴¹ Su ketà te akir din ne hewii te kedtimbang te Eleteala te menusiyà ne ed-itindeg ini se menge etew ne riyà ebpuun te Niniva rengan su ed-isuhat keniyu te kewagib. Su sikandan mulà ne nerineg dan dà ke Lalag te Eleteala ne impesabut ni Jonas kandan ne nekedsendit dan en ne mid-ewaan dan en ke meraat ne mid-ulaula ran. Guntaan ne ruen mepurù pà ki Jonas ne kayi te keniyu, ugaid ne kenà niyu edtelimaan ke penurù din ne kenà kew ebpedsendit te meraat ne ulaula niyu.

⁴² Su ketà te akir din ne hewii te kedtimbang te Eleteala te menusiyà,” ke si Hisus, “ne duen Bai ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin se riyà ebpuun te divaluy te pehiliran su apey mekerineg dà ki Salomon ke Ratù dengan ne metmetau. Ne ruen en guntaan seveka ne mepurù pà ki Salomon ne ini en te keniyu!”

Ke Kedlived te Busew Dut te Eteu ne Mid-suukan Din

(Lucas 11:24-26)

⁴³ Ne migkahi pà maa si Hisus te, “Embiya ruen busew ne edsuuk te etew ne ed-awà en, ne riyà ebpevayà te memara ne tanà su ebpemengà te ubpaan din. Ne embiya warà egketuen din,

⁴⁴ ne iyan egketahù te hinawa rin se, ‘Edliveran ku red ke mid-ubpaan ku.’ Nekeuma ini se busew, ne nekita rin te metilak en wey nekeulit en ke langun ketà te lusud.

⁴⁵ Ne midlihawang pà sikandin su mid-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan dut te etew ne muna pà se kepasang din dut te neuna. Engketà ded dema se egketemanan dut te menge meraat ne etew te guntaani en.”

Ke Impetimbang ni Hisus te Iney Rin wey Menge Suled Din

(Marcos 3:31-35; Lucas 8:19-21)

⁴⁶ Edlalag pà si Hisus ne nekeuma en ke iney rin wey ke menge ari rin ne meama. Ne riyà dan dà te luwal meketaman ne mibpesuhuan dan dà si Hisus.

⁴⁷ Ne senge etew ketà se migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

⁴⁸ Ne migkahi si Hisus te, “Duen pà ibpekita ku keniyu ne iring te iney ku wey ke menge suled ku.”

⁴⁹ Ne interù din ke menge edumdumaan din ne ke sikandin te, “Sikandan ini ke iney ku wey ke menge suled ku!

⁵⁰ Su misan engkey se ebperumaruma te kiyug te Eleteala, ne sikandan en imbe ke menge suled ku ne meama, ke menge etevey ku, wey ke iney ku.”

13

Mibpenempità si Hisus Mekeatag te Etew ne Midsawed te Beni

(Marcos 4:1-9; Lucas 8:4-8)

¹ Arà ne hewii ne mid-awà si Hisus ketà te valey ne mibpendiyà te beyvey te ranew, ne ketà mibpinuu su ebpenurù.

² Ne geina te medmerakel ne menge etew ne midlingut kandin ne mid-untud sikandin te avang diyà te gebgevasan su ebpenurù. Ne riyà dà te beyvey te ranew ke menge etew ne ebpeming kandin.

³ Ne merakel se impenurù din kandan ne impepevayà te sempità.

“Ruen etew,” ke si Hisus, “ne mibpendiyà te pengengewiran din su edsawed te benì.

⁴ Ne ketà te kinesawed din ne ruen benì ne nengeulug diyà te kilid te ralan ne midtuktuk en te menge pepenuk.

⁵ Ruen ruma ne insawed din ne riyà nengeulug te kebetuwan ne mevavew se tanà din. Ne geina te mevavew ini se tanà din, ne mehaan dà se kinetuvù din.

⁶ Ugaid ne guna su mid-endawan en ne petuluy ne migkuley ke dawun din geina te warà meketuneb ke ralid din, ne neebmas en.

⁷ Ke ruma pà ne riyà nengeulug te sepinitan ne guna su midtuvù en ini ne migkubmusan en dut te sepinit.

⁸ Ugaid ne ruen ruma pà ne riyà nengeulug te meupiya ne tanà, ne midreteb ne meselinuvù se tuvù din, ne nekevahas te meupiya su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani.

⁹ Itaan niyu ke telinga niyu,” ke si Hisus, “kayi te migkahi ku ini.”

Midseysey ni Hisus Ke Atag Dut te Menge Sempità

(Marcos 4:10-12; Lucas 8:9-10)

¹⁰ Ne mid-uvey ki Hisus ke minge edumdu-maan din ne migkahi ran te, “Meambe ke ibpepe-vayà nu ke lalag nu te sempità ke ebpenurù ka kayi te minge etew?”

¹¹ Migkahi si Hisus te, “Sikiyu ne eduru-maruma kediey, ne ebpe sebutan en te Eleteala rut te in-eles dengan mekeatag te Kedadù te Eleteala te minge etew, ugaid ke ruma ne minge etew ne ibpenurù kandan te ibpepe-vayà te minge sempità.

¹² Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din su apey mehaked din ke muna pà dut te ebpegingewaan din. Ugaid ke etew ne kenà din idtahù te hinawa ke ibpesabut kandin te Eleteala ne egkeawà arà se reisek ne nesebutan din.

¹³ Tembù be ebpenurù a kandan ne ibpepe-vayà te sempità su apey ran mekesabut.

Su edtengteng dan, ugaid ne kenà dan ebpekekita;
ne ebpe mineg dan, ugaid ne iring be te warà dan mekerineg.

¹⁴ Ne netuman en kayi te kandan ke impekahi te Eleteala ki Isayas ne egkahi te,
‘Lelayun dan ebpe mineg, ugaid ne kenà dan egkesebutan.

Ne lelayun dan edtengteng, ugaid ne kenà dan ebpekekita.

¹⁵ Su ini se minge etew ne meresen se ulu ran,

ne timbang te midsabpeng dan ke telinga ran,
 wey midlipereng dan ke mata ran.
 Su embiya kenà, ne ebpekekita ran en,
 ne ebpekerineg dan en,
 ne ebpekesabut dan en,
 ne ke hinawa ran ne edlived en kayi te kediey,
 ne ibpekepeliyu ku en sikandan dut te salà dan.’
 ”

¹⁶ Ne migkahi pà maa si Hisus te, “Ne sikiyu, dayirai kew nevenar su nesebutan niyu ini se nekita niyu wey ini se nerineg niyu.

¹⁷ Sebenarvenar ne ini se egkehiyen ku keniyu te kenà pira rà se ebpelambas te Lalag te Eleteala wey menge metidtu ne etew te Eleteala rengan ne ed-inteng perem kayi te nengekita niyu te guntaani en, ugaid ne warà dan en mekita. Ne ebpeming dan perem kayi te nengerineg niyu te guntaani en, ugaid ne warà dan en mekerineg.”

*Mibpesebutan ni Hisus Ke Meana Dut te Sempità Mekeatag te Etew ne Midsawed te Benì
 (Marcos 4:13-20; Lucas 8:11-15)*

¹⁸ “Na pemineg kew” ke si Hisus, “su apey niyu mesebuti ke engkey se meana keniyen te sempità ku mekeatag te etew ne midsawed te benì.

¹⁹ Su ini se benì ne insawed din ne ini ke lalag mekeatag te Edetuan te Eleteala. Ne ke ralan ne neuluhan te benì ne arà ke menge etew ne nekerineg te Lalag te Eleteala, ugaid ne warà dan mesebuti ne warà meketahù te hinawa ran. Nekeuma si Setanas ke datù te pekaid ne midegdehawan din te ed-ahew ke lalag ne nerineg dan.

²⁰ Ne ke kebetuwan ne neuluhan te benì, ne arà ke minge etew ne nekerineg te Lalag te Eleteala ne ingkehalew ran te ebpemineg ne mibperetiyya ran.

²¹ Ugaid ne mehaan dà su warà mekedalid diyà te hinawa ran. Ne wey ran penggerami ni Setanas dut te peretiyya ran te Lalag te Eleteala, ne midlekà dan en.

²² Ne ke sepinitan ne neuluhan te benì, ne arà ke minge etew ne nekerineg te lalag te Eleteala, ugaid ne gewii ran te ebpetindalan ne merakel se egkubmus dut te Lalag ne nerineg dan, iring te kemutuwan dan te ked-ubpà-ubpà wey ke kekgelilingey ran dut te kearen dan, ne warà en mekeuma te kebehas dan.

²³ Ne ke meupiyya ne tanà ne neuluhan te benì, ne arà ke minge etew ne nekerineg te Lalag te Eleteala ne impetuneb dan te hinawa ran su nesebutan dan. Ne mibahas dan su ruen mibpengupiyya nevenar se bahas din, ne ruen migkakey, ne ke ruma pà ne ruen ded neehani.”

Ke Sempità ni Hisus Mekeatag te Utan ne Insawed Dut te Kunterà Din Ke Datù te Pekaid

²⁴ Ne mibpenurù si Hisus te seveka maa ne sempità, ke sikandin te, “Ke Kedatù te Eleteala rut te minge etew ne iring te etew ne mibpesawed te meupiyya ne benì diyà te pengengewiran din.

²⁵ Senge kerukileman ketà te nekelipereng dan langun, ne nekeuma ini se kunterà din ne midsawed te utan ketà te pengengewiran din ne mid-awà en.

²⁶ Guna su midtuvù ke pinemula ne ebmeme-hingey en, ne midtuvù en dema ke utan.

²⁷ “Ne mid-uvey ke edsugsuhuen kayi te kemuney ne migkahi en te, ‘Mama, meupiya ne benì ke impesawed nu riyà te pengengewiran nu, ne endei ve ebpuun arà se menge utan ne midtuvù ketà?’

²⁸ “ ‘Riyà ebpuun ini te kunterà ku,’ ke se kemuney kayi te tanà.

“Ke se menge edsugsuhuen din te, ‘Menu, Mama, ibpevarut nu kenami ayan se utan?’

²⁹ “ ‘Kenà,’ ke se kemuney, ‘su gewii te kebarut niyu te utan ne kema ke ebpekeragkes ke meupiya ne pinemula.

³⁰ Ebeleharen tew pà taman te egkeuma en ke ked-ehani, ne ebpeunaan ku pà te ebpepemarut rut te ebpengehani ne ibpepemagkes ku kandan su ebinsulan. Ne anpà ne ibpeehani ku ini se pinemula ku ne ibpetahù ku kayi te kemalig ku.’”

Insempità ni Hisus ke Kedatù te Eleteala te Menge Etew Dut te Pinekemerimet ne Lahas ne Ed-ingeranan te Mustasa

(Marcos 4:30-32; Lucas 13:18-19)

³¹ Ne mibpenurù maa si Hisus te ruma pà ne sempità. “Ini se Kedatù te Eleteala kayi te menge etew,” ke sikandin, “ne ebpekeiring te merimet nevenar ne lahas ne ed-ingeranan te Mustasa ne ibpemula te etew.

³² Ini ke pinekemerimet ne lahas kayi te ampew te dunya, ugaid ne embiya ibpemula ini ne ebpeketuvù ne egkevaluy ne iyan dekelà dut te

langun ne pinemula. Ne edsubpang te derekelà, ne rutun ebpenesalag ke minge pepenuk.”

Insempità ni Hisus ke Kedatù te Eleteala te Minge Etew dut te Ibpelevag te Pan

(Lucas 13:20-21)

³³ Ne mibpenurù pà lavew si Hisus te ruma pà ne sempità. Ke sikandin te, “Ini se Kedatù te Eleteala kayi te minge etew ne iring te ibpelevag te pan. Migkuwa ini te meritan ne insawug din dut te senge asad ne tapung su apey ebpeketuvù ke mibawug din ne tapung.”

³⁴ Langun ini ne impesabut ni Hisus diyà te denda ne minge etew ne impepevayà din te sempità. Warà misan engkey en ne impemenudtul din kandan ke kenà impenempità din.

³⁵ Mid-ulaula rin ini su apey metuman ke impesurat ne Lalag te Eleteala dut te ebpelambas te lalag din rengan ne egkahi te,

“Ebpenurù a kandan te kayi ibpepevayà te minge sempità;

ibpenudtul ku kandan arà se warà pà mepayahi igenat dut te kinelimbaha kayi te kelibutan.”

Midseysey ni Hisus ini se Sempità Din Mekeatag te Utan ne Insawed Dut te Kunterà Din Ke Datù te Pekaid

³⁶ Ketà ne mid-ewaan ni Hisus ke denda ne minge etew ne mibpemenayik sikandin diyà te baley. Midtundug kandin ini se minge edumdumaan din ne ke sikandan te, “Ibpayag nu kenami ke engkey se meana dut te sempità nu mekeatag te utan ne insawed diyà te pengengewiran.”

³⁷ Migkahi si Hisus te, “Ke meama ne mid-sawed te meupiya ne benì ne sikandin ke Im-peanak dut te Menusiyà;

³⁸ ne ke pengengewiran ne ini se kelibutan. Ne ke meupiya ne benì ne arà ke menge etew ne Edetuan dut te Eleteala. Ke utan ne arà ke menge etew ne sakup ni Setanas ke egkeunutan te menge vusew,

³⁹ ini se kunterà dut te kemuney te pengengewiran su midsawed te utan, ne sikandin ke egkeunutan te menge vusew. Ke hewii te kedehani ne arà ke ketepusan kayi te kelibutan, ne ke ebpegehani ne sikandan ke menge suluhuen te Eleteala.

⁴⁰ Ne arà se utan ne ebpemeruten ne ebinsulan dan, ne arà ke egketemanan dut te sakup te egkeunutan te busew kayi te ketepusan te kelibutan.

⁴¹ Su kayi te ketepusan te kelibutan ne ed-suhuen dut te Impeanak te Menusiyà ke menge suluhuen din su ibpeawà ketà te Edetuan din ke langun ne mibpeneheewit te kebpekedsalà te ruma ran wey langun ne mid-ulaula te meraat

⁴² ne ibpeantug diyà te apuy nerakà. Ne ketà dan ebpekependerawit wey ebpekengingitel.

⁴³ Ugaid ne ke menge metidtu ne etew su sakup te Eleteala, ne ed-anlag dan iring te andew diyà te Edetuan te Amey ran ne Eleteala. Ne itaan niyu ke telinga niyu kayi te nerineg niyu.”

Insempità ni Hisus Ke Kedatù te Menge Etew Dut te In-eles ne Kearen diyà te Pengengewiran

⁴⁴ Migkahi pà maa si Hisus te, “Ini se Kedatù te Eleteala ne iring te kearen ne in-eles diyà te pengengewiran. Netuen ini te senge etew

ne nesuatsuat nevenar sikandin, ne midtelevan din ne mid-uli en. Ne mibpasa rin ke langun taman ne kearen din, ne midlived sikandin ne mibpemasa rin arà se pengengewiran.”

Insempità ni Hisus ke Kedatù te Eleteala Dut te Senge Timan ne Ebeliehen ne Mepmepurù ne Ed-ingaranan te Pirlas

⁴⁵ “Ini se Kedatù te Eleteala,” ke si Hisus, “ne ebpekeiring dema te etew ne ebpemengà te menge pirlas ne ebpemesaan din.

⁴⁶ Guna su neketuen sikandin te seveka ne pirlas ne mepmepurù nevenar, ne arà dà ne mibpasa rin ke langun taman ne kearen din ne mibpemasa rin arà se pirlas.”

Insempità ni Hisus ke Kedatù te Eleteala Dut te Biyala

⁴⁷ “Ne seveka rema ne ebpekeiring te Kedatù te Eleteala,” ke si Hisus, “ne ini se biyala ne id-antug diyà te ranew su apey ebpekeutel te langun ne edsusunan te serà.

⁴⁸ Guna su nepenuen ini se biyala, ne midtuyuk dan en diyà te geunan. Ne mibpinuu ran su ebpengeraman dan ke serà. Su ke meupiya ne serà ne id-awuk diyà te ambung su ibpendehang dan, ne ke kenà meupiya ne idtimbang dan.

⁴⁹ Iring be ketà dema se egketemanan kayi te menge etew ketà te kegkepupus te ini se kelibutan su ebpemenkayi ke menge suluhuen te Eleteala ne ibpedsivey ran ke menge etew ne meraat se mid-ulaula rin dut te menge etew ne metidtu.

⁵⁰ Ne ini se minge meraat ne etew ne ibpean-tug diyà te apuy nerakà, ne ketà dan ebpekepen-derawit wey ebpekengingitel.”

Ke Upama ni Hisus Mekeatag te Etew ne Metau ne Ebpenurù te Raan wey Behu ne Penurù

⁵¹ Ne mid-insaan ni Hisus ke edumdumaan din te, “Menu, egkesebutan niyu ini se langun ne mibpengahi ku?”

“Uya,” ke se minge edumdumaan din.

⁵² Ketà ne migkahi maa si Hisus te, “Ne geina te nesebutan niyu en arà, ne misan engkey ne etew ne ebpenurù te penduan ne miduma kayi te Kedatù te Eleteala ne iring sikandin dut te senge etew ne kemuney te valey ne merakel se kearen din megidsan se raan wey behu. Iring sikandin ketà su metau ne ebpenurù te raan ne penurù wey igkepenurù din dema ke behu.”

Warà Mibperetiyaya te Penurù ni Hisus Diyà te Inged Din ne Nesarit

(Marcos 6:1-6; Lucas 4:16-30)

⁵³ Guna su nekepasad en si Hisus te kebpenurù din te ibpepevayà te minge sempità, ne mid-awà en sikandin ketà te inged

⁵⁴ ne mid-ulì en diyà te inged din ne mibpenurù diyà te baley ne ebpengedian te minge Hudiyanen te penduan dan. Ne nengegeyip ke minge etew ne nekerineg te penurù din. Ke sikandan te, “Endei rin be buwa mekuwa ini se ketau rin? Ne ebmenuwen din te ebaal ini se minge mekegeyip?”

⁵⁵ Maa, kenà uvag sikandin ke anak te pandey? Ne maa, kenà si Maria ke iney rin wey si

Santiago, si Jose, si Simon wey si Hudas ke menge ari rin?

⁵⁶ Ne maa,” ke sikandan, “kenà ini red dema med-ubpà ke langun ne etevey rin? Endei rin be buwa mehuruwi ini se ketau rin?”

⁵⁷ Ketà ne mid-engkenà dan kandin.

Ne migkehiyan ni Hisus sikandan te, “Ke etew ne ebpelambas te Lalag te Eleteala ne egkeedatan te piya endei sikandin egketahù, liyu rà dut te muney ne inged din wey ke kereremigey rin.”

⁵⁸ Tembù be kenà utew merakel ne mekegeyip ne ingkepekita ni Hisus ketà te inged din su warà mibperetiyyaya ke menge etew kandin.

14

Ke Guhud Mekeatag te Kinepatey ni Juan ke Ebpembunyag

(Marcos 6:14-29; Lucas 9:7-9)

¹ Nerineg ne Hirudis ini se tudtul mekeatag te mid-ulaula ni Hisus su arà ne hewii ne sikandin ke egkeunutan ketà te Geliliya.

² Migkahi sikandin kayi te menge kedserihan din te, “Neuyag ded maa si Juan ke Ebpembunyag, tembù be ruen gehem din te kebpekeval te menge mekegeyip.”

³ Ini se nekahi ni Hirudis su sikandin en iya ke mibpeimatey ki Juan su sikandin pà ke mibpesigkem, ne mibpevakù ne mibpevilanggù. Iyan din kineul-ulaa kayi su mid-esawa rin si Hirudiyas ke ipag din misan si Hirudiyas ne esawa rut te tuney ne suled din ne si Felipe.

⁴ Su uman dà ebpengegkehiyi ni Juan si Hirudis te, “Kenà meupiya ne ed-esawaan nu ke

ipag nu su esawa en te tuney ne suled nu!” ke si Juan.

⁵ Ne ebpeimetayan perem ni Hirudis sikandin, ugaid ne neandek sikandin te menge Hudiyanen su migkahi ran te ebpelambas te Lalag te Eleteala si Juan.

⁶ Ugaid ne guna su neuma ke hewii te kineanaka ki Hirudis ne ruen kevruran, ne ketà ne pinesayew ke anak ni Hirudiyas ne raha. Ne ingkesuatsuat ni Hirudis ini,

⁷ tembù be mibpesaran din ke midsayew te, “Langun tew te nevrurun kayi ne titihus te misan engkey se ebuyuen nu ne ibehey ku keykew!”

⁸ Ne intelaan en neraan te iney kayi te raha ne midsayew te ibpevuyù diyà te ki Hirudis ke ulu ni Juan ke Ebpemunyag. Tembù be migkahi sikandin te, “Iyan ku ebuyuen te guntaani ne ivehey nu kediey ke ulu ni Juan ke Ebpemunyag!”

⁹ Nerineg dà ni Hirudis ne nekebmutu sikandin, ugaid ne tehaad te ingkepasad din en diyà te etuvangan te pinetelavuk din, ne impetuman din en ke mibuyù dut te raha.

¹⁰ Ketà be ne mibpepungelan din en si Juan diyà te bilengguan.

¹¹ Ne impetahù din en te pelatu ke ulu ni Juan ne mibpeneheneewit en ini ne imbehey en diyà te raha, ne imbehey en dema dut te raha diyà te iney rin.

¹² Guna su nerineg ini dut te menge edumdumaan ni Juan, ne mibayaan dan diyà te bilengguan ke bangkey rin ne inleveng dan. Neipus dan ne mibpendiyà dan te ki Hisus su impenudtul dan ini se netamanan.

*Pinekaan ni Hisus ke Lelima Nengivu ne Etew
(Marcos 6:30-44; Lucas 9:10-17; Juan 6:1-14)*

¹³ Guna su nerineg eni Hisus ke tudtul dut te netemanan ni Juan, ne mid-awà dan ketà ne mid-untud dan te avang te sikandan dà se ebpendiyà te warà etew rin. Guna su netuenan dut te menge etew te mid-avang-avang en ensi Hisus ne mibpenggenat dan en se ebpemeyvey ran su edtelukun kandin.

¹⁴ Guna su nekerunggù en ensi Hisus ne iyan dan nekita se merakel ne menge etew ne nevrurun, ne neyruwan din nevenar sikandan ne neulian din ke ebpenderaru.

¹⁵ Guna su meapun en nevenar ne mid-uvey en kandin ke menge edumdumaan din se egkahi te, “Meapun en ini ne warà dè be menge etew kayi te inged ini. Iyan tumù ne ibpeipanew nu en ke menge etew su apey ran ebpekependiyà te endei se ruen menge valey ne ebpekepemasa ran te egkekaan dan.”

¹⁶ Ne migkehiyan dan ni Hisus te, “Kenà dan en ebpeipanewen,” ke sikandin, “su sikiyu se ebpekaan kandan.”

¹⁷ “Ini se kuwa tew,” ke sikandan, “ne lelima rà ne timan ne pan wey deruwa ne timan ne serà.”

¹⁸ Ne migkahi si Hisus te, “Ewita niyu kayi.”

¹⁹ Ketà ne pinepinuu rin diyà te gumegebà ke menge etew. Ne migkuwa rin ke lelima ne timan ne pan wey ke deruwa ne timan ne serà, ne midlingakà sikandin diyà te langit ne impeselamat din te Eleteala. Ne mibpenevitevì din en ke pan ne imbehey rin en dut te menge

edumdumaan din su ibpetukid diyà te merakel ne etew.

²⁰ Migkaan dan langun ne nengevulung dan. Guna su nekeipus dan en se egkaan, ne mibpunpun dut te sepulù wey deruwa ne edumdumaan din ke nesamà ne iyan din nepunpunan ne sepulù wey deruwa ne binevey ne nengepenù.

²¹ Ne ke menge etew ne migkaan ketà ne menge lelima nengivu ke meama, liyu pà ke menge meritan batà.

Mid-ipanew si Hisus Diyà te Divavew te Wayig te Ranew

(Marcos 6:45-52; Juan 6:15-21)

²² Ne pineuntud en ni Hisus te avang ke menge edumdumaan din su ibpeuna rin en sikandan te ed-apet te ranew su ibpepeulì din pà ke menge etew.

²³ Guna su impeipanew rin en ke menge etew, ne midtekereg en sikandin te sebseveka rin diyà te buvungan su ebpengeningeni. Guna su egkesagkup en ne ketà pà si Hisus te sikandin dà.

²⁴ Ugaid ke menge edumdumaan din ne meriyù en se ebpengavang-avang ne diyan en te kalud te ranew ne nesuhate mevaheer ne baleg su egkesurang dan ke mevandes ne keramag.

²⁵ Egkepekepawà ketà ne midtelukun en si Hisus kandan se ed-ip-ipanew riyà te divavew te wayig.

²⁶ Guna su nekita sikandin dut te menge edumdumaan din se ed-ip-ipanew riyà te divavew te wayig, ne nengeandek dan nevenar. "Gimukud!" ke sikandan, ne migkuleyì dan te kegkeandek dan.

²⁷ Ketà ne migkahi si Hisus kandan te, “Pedti-hel kew te hinawa niyu su siaken ini! Kenà kew meandek!”

²⁸ Ne migkahi en si Pedro te, “Kerenan, embiya benar ne sikuna ayan, ne peipenawa a kayi te divavew te wayig te ebpeengkeniyan te kenikew.”

²⁹ “Pengkayi ke en!” ke si Hisus. Ne ketà ne midrenà si Pedro dut te avang ne mid-ipanew en diyà te divavew te wayig se ebpendiyà te ki Hisus.

³⁰ Ne guna su neheram din ke mevandes ne keramag ne netekew sikandin meandek ne idteledted en sikandin. “Kerenan, tevangi a!” ke sikandin.

³¹ Arà dà ne migeweran ni Hisus sikandin ne migkahi en te, “Kurang bes ke kebperetiyaya nu kediey! Meambe ke ruen keduwaruwa nu?”

³² Ne mid-untud dan ketà te avang ne mid-engked en ke keramag.

³³ Guna su diyan dan en te avang, ne mibpen-garap ini se menge edumdumaan din kandin. “Benar iya ne Anak ka te Eleteala!” ke sikandan.

Neulian ni Hisus ke Menge Ebpenderaru Diyà te Inged ne Hinisarit

(Marcos 6:53-56)

³⁴ Guna su mid-apet dan en te ranew ne iyan dan nerungguan ne inged ne Hinisarit,

³⁵ ne petuluy ne nekilala dut te menge etew si Hisus. Tembù be pinesugkew ran ke menge etew ne ebpenderaru ketà te nekeerivey ne inged, ne mibpeneheewit dan kayi te ki Hisus.

³⁶ Ne ini se mibpeneheewit te ebpenderaru ne mibuyù ki Hisus te menu ma ke mekeamì ke

ebpenderaru misan dut te belegkas din dà, ne langun ne nekeamì ketà ne neulian.

15

Mid-insà ke Menge Peresiyu ki Hisus ke Meambe Ke Kenà Eduma ke Menge Edumdumaan Dut te Penurù te Keep-epuan Dan ne Hudiyanen Mekeatag te Kebpenlùlù

(Marcos 7:1-13)

¹ Senge hewii ne ruen munge Peresiyu wey munge meysterù te penduan ne riyà ebpuun te Hirusalim ne mibpengkayi te ki Hisus.

² Ne migkahi ran te, “Meambe ke kenà ed-tuman ini se munge edumdumaan nu rut te impenurù ne betasan ne intelau dut te keep-epuan tew? Su matag dan en migkaan ne warà dan tumana ke edtenuran te kedlùlù!”

³ “Ne sikiyu,” ke si Hisus, “meambe ke iyan niyu edtumanen ke betasan ne intelau keniyu rut te munge keep-epuan niyu, ne midsurang kew ma rut te penurù te Eleteala?”

⁴ Su migkahi te Eleteala te, ‘Edati niyu ke amey niyu wey ke iney niyu.’ Ne ingkahi rema te, ‘Misan engkey ne etew ne edlalag te meraatey dut te amey rin etawa iney rin ne ibpeimetayan.’

⁵ Ugaid ne sikiyu,” ke si Hisus, “ne iyan niyu ibpenurù ne embiya ruen etew ne ruen igketavang din dut te amey rin etawa iney rin ne egkepakey ne egkehiyen din te ‘Imbehey ini te Eleteala’

⁶ ne ketà ne kenè en sikandin ebpeketavang dut te amey rin wey iney rin. Kayi ve te penurù niyu ini ne mid-iniyuhan niyu ke Lalag

te Eleteala su iyan niyu ibpeiseg ke betasan ne intelau dut te keep-epuan niyu.

⁷ Sikiyu ne uvag en kun ne ebperetiyaya! Benar iya ke lalag mekeatag keniyu ne impesurat te Eleteala ki Isayas ne mibpelambas te Lalag te Eleteala rengan su migkahi te,

⁸ 'Ini se menge etew, ne kayi rà te bivig dan se ked-arap dan kediey, ugaid ne ke hinawa ran ne medmeriyù kediey.

⁹ Warà ded be lalew rin se kebpengarap dan kediey, su ke ibpenurù dan ne mibèbeelan dà te etew, ugaid ne egkehiyen dan ne kayi ebpuun te penduan ku.' "

*Ke Menge Ebpekeredsik te Etew
(Marcos 7:14-23)*

¹⁰ Ne pineuvey en ni Hisus ke menge etew se egkahi te, "Pemineha niyu ve ini," ke sikandin, "se edlelehan ku su apey niyu egkesebuti.

¹¹ Kenà iyan ebpekeredsik te etew ini se egkeen ne ebpekeawuk te bèbà din, ugaid ne iyan ebpekeredsik te etew ini se netahù te hinawa rin ne ebpekelihawang kayi te bèbà din."

¹² Ne mid-uvey kandin ke menge edumdumaan din ne migkahi te, "Maa, netuenan nu red te neepesan ka te menge Peresiyu dut te migkahi nu geina?"

¹³ Ne migkahi si Hisus te impepevayà te sempità te, "Langun ne pinemula ne warà ipemula te Amey ku ne riyà te langit ne eberuten.

¹⁴ Belehara niyu sikandan! Su iring dan te menge pisek ne edtuyuk te pisek ded dema. Ne

embiya ruen pisek ne edtuyuk te pisek ded dema, ne elin dan egkeulug diyà te lepak.”

¹⁵ Ne migkahi si Pedro te, “Ipayag nu kenami ke meana rut te sempità nu geina.”

¹⁶ Ne migkahi si Hisus kandan te, “Iring kew rà dut te ruma ne etew ne mevavew se kebpekesabut dan.

¹⁷ Meambe, warà niyu ves mesebuti te ini se egkeenen ne ebpekeawuk te bèbà te etew ne ebpevayà te hetek din ne an pà ne edlihawang diyà te kandin?

¹⁸ Ugaid iyan ebpekeredsik te etew ne ini se netahù te hinawa rin ne ebpekeliawang te bèbà din.

¹⁹ Su ini se neketahù te hinawa rin ke ebpuunan te meraat ne itungan ne ebpekepeneheewit kandin te meraat ne ed-ul-ulaan iring te kedimatey, kedlangkadlangkad te esawa rin, ne ruma pà ne meredsik ne ed-ul-ulaan, kebpe-nakew, kedtarùtarù wey kedlalag te ebpekereraat te pekingan te ruma ne etew.

²⁰ Langun din ini ne ebpekeredsik te etew, ugaid ne kenà ebpekeredsik te etew ke egkaan sikandin te warà mekepenlùlù ne ayan ke betasan te menge Peresiyu.”

Ke Guhud Mekeatag te Sarig te Senge Etew ne Meritan ki Hisus

(Marcos 7:24-30)

²¹ Ne mid-awà si Hisus ketà ne mibpendiyà te inged ne uvey te menge inged ne Tiru wey Sidun.

²² Ne ruen nekeubpà ketà ne meritan ne riyà ebpuun te inged ne Kanaan ne midtelavuk ki Hisus. “Kerenan, sikuna ne inenakan ni

David,” ke sikandin, “igkeyru a nikuna! Su ruen anak ku ne meritan ne midsuukan te busew ne egkepesangan nevenar.”

²³ Ugaid ne warà kegkehiyan ni Hisus. Ne ketà ne mid-uvey ki Hisus ke menge edumdumaan din ne mibpemuyù te, “Ipeulì nu ayan se meritan su edtundugtundug kenitew ne ebpekeuringer.”

²⁴ Ne migkahi si Hisus te, “Midsuhù a te Eleteala te iyan dà ebpetevangan ke menge kevuwaran ni Israyil ne iring te menge bilibili ne nengelaag.”

²⁵ Guna su nerineg ini kayi te meritan ne mid-uvey rin en si Hisus ne midlumpeng en diyà te sineruwan din se ebpemuyù te, “Kerenan, tevangi a nikuna!”

²⁶ Ne mibpenempità si Hisus kandin te, “Kenà edait ne egkuan ta ke ibpekaan te menge vatà ne idsavud te menge asu.”

²⁷ “Benar ayan, Kerenan,” ke se meritan, “ugaid ne misan ke menge asu ne ebpenelisim dut te mumu te menge vatà ne ebpengeulug diyà te lemisaan dut te ebpengemuney.”

²⁸ Ne migkehiyan ni Hisus ke meritan te, “E, Bayi, mevaher nevenar se kedsarig nu te Eleteala! Ini se mibpemuyù nu ne ibehey ku keykew.” Arà dà ne neulian en ke anak dut te meritan.

Neulian ni Hisus Ke Denda ne Ebpenderaru

²⁹ Mid-awà si Hisus ketà ne mibpemeyvey te Ranew te Geliliya. Ne midtekereg diyà te buvungan ne mibpinuu.

³⁰ Ne denda ne menge etew se mibpengkayi te kandin se ebpeneheewit te menge pungkù, menge pisek, menge nekeyengkeng, menge emew, wey ruma pà ne ebpenderaru. Ne riyà dan indenà te etuvangan ni Hisus, ne neulian din ke langun dan.

³¹ Ne nengegeyip ke menge etew ketà te nekita ran te nekelalag en ke menge emew, neketidtu en ke nekeyengkeng, nekeipanew en ke menge pungkù wey nekekita en ke menge pisek. Ne ketà nekereyù dan te Eleteala ne iyan ebpengerapan dut te bansa ne Israyil.

*Pinekaan ni Hisus ke Epat Nengivu ne Etew
(Marcos 8:1-10)*

³² Ne pineuvey ni Hisus ke menge edumdumaan din ne migkahi te, “Igkeyruwi ku nevenar ini se menge etew,” ke si Hisus, “su nekedtetelu en ne hewii se kinepekiduma ran keytew ne warà en egkekaan dan. Kenà meupiya ne ebpeulien te kenà dan ebpekekaan su kalu ke ruen edlunusan diyà te ralan.”

³³ Migkahi ke menge edumdumaan ni Hisus te, “Endei ki mulà ebpekekuwa te egkekaan ne ibpekaan tew kayi te merakel ne menge etew se ini kiyu te inged ne warà bulug etew rin?”

³⁴ “Engkey ma taman ne kerakel te lutù tew?” ke si Hisus.

“Pitu rè be ne timan ini se lutù tew ne pan,” ke sikandan, “ne ruen pipira ne timan ne serà.”

³⁵ Ne pinepinuu ni Hisus ke menge etew diyà te tanà.

³⁶ Ne migkuwa rin ke pitu ne timan ne pan wey menge serà ne impeselamat din en diyà te Eleteala. Ne mibpenevìteví din en ke pan, ne imbehey rin en dut te menge edumdumaan din su ibpetukid diyà te menge etew.

³⁷ Langun dan ne migkaan, ne nengevulung. Ne ketà ne mibpunpun dut te edumdumaan din ke nengesamà ne iyan din nepunpunan se pitu ne binevey.

³⁸ Ne epat nengivu ke menge etew ne migkaan ketà liyu ke meritan batà.

³⁹ Arà pà ne impeulì ni Hisus ke menge etew. Ne mid-untud en ensi Hisus te avang ne mid-avang-avang dan en se ebpendiyà te inged ne Magadan.

16

Ke Menge Etew ne Metau ne Ebpenipat te Hewii Ugaid ne uvag Kun Warà Dan Mesebuti Ke Tuus Dut te Ned-ulaula te Arà ne Hewii (Marcos 8:11-13; Lucas 12:54-56)

¹ Ne ruen menge Peresiyu wey menge Sadusiyu ne mibpendiyà te ki Hisus se ebpekidlewanà kandin su ebeelan dan te litag si Hisus. Tembù be mibuyù dan te mebaal si Hisus te mekegeyip ne tuus te midsuhù sikandin te Eleteala.

² Migkahi si Hisus te, “Embiya edsanlep ke andew ke ebpemurawag ne egkahi kew te, ‘Ebpengupiya ke hewii.’

³ Ne embiya egkepkepawà ke ruen pemurawag wey kivel ne egkahi kew te, ‘Ed-uran.’ Embiya edtengteng kew diyà te langit ne metau kew nevenar ne ebpenipat te hewii, ugaid ne kenà

niyu egkekilala ke menge tuus mekeatag kediey guntaan.

⁴ Sikiyu ne menge etew te guntaani en, ne meraatey nevenar se ed-ul-ulaan niyu su warà kebperetiyaya niyu te Eleteala! Menu, ebuyù kew te ebaal a te mekegeyip ne tuus te gehem ku? Kenà, su warà en tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.”

Ketà ne mid-ewaan din sikandan.

Ke Meraat ne Penurù Dut te Menge Peresiyu wey Sadusiyu ne Impeiring ni Hisus te Ibpelevag te Pan

(Marcos 8:14-21)

⁵ Mid-apet ke menge edumdumaan ni Hisus te ranew, ugaid ne nelipat dan ne ed-ewit te lutù dan ne pan.

⁶ Ne mibpenempità si Hisus kandan te, “Andam kew,” ke sikandin, “ne ingati niyu te kenà kew egkepeneheewit te ibpelevag te pan dut te menge Peresiyu wey Sadusiyu.”

⁷ Ugaid ne geina te warà dan mesebuti ne mibpelelelahey ran te, “Iyan din kinepekekahi kayi ne geina te warà kiyu mekeewit te lutù tew ne pan.”

⁸ Ne netuenan ni Hisus ke engkey se ibpelelelahey ran ne migkehiyan din en sikandan te, “Meambe ke iyan niyu egkepengasak se warà niyu kebpekeewit te pan? Kurang nevenar ke kedsarig niyu kediey?”

⁹ Maa, warà kew pè bes mekesabut? Maa, kenà niyu en egketenuran ke kinepenevìtevi ku rut te lelima ne timan ne pan ne impekaan ku rut te

lelima nengivu ne menge etew? Maa, pira ne binevey se nepenù te nengesamà ne nepunpun niyu?

¹⁰ Ne menu, kenà niyu en egketenuran ke kinepenevitevi ku rut te pitu ne timan ne pan ne impekaan ku rut te epat nengivu ne menge etew? Maa, pira ne binevey se nepenù te nengesamà ne nepunpun niyu?

¹¹ Meambe ke warà niyu mesebuti te kenà ini se pan ne warà niyu meewit se egkehiyen ku? Su ingati niyu te kenà kew egkepeneheewit te ibpelevag te pan dut te menge Peresiyu wey Sadusiyu.”

¹² Arà pà ne nekesabut ke menge edumdumaan din te iyan din ebpeingatan kandan ne kenà arà se ibpelevag te pan, ugaid ne arà se ibpenurù te menge Peresiyu wey Sadusiyu.

Ke In-insà ni Hisus Dut te Edumdumaan Din Ke Engkey Sikandin

(Marcos 8:27-30; Lucas 9:18-21)

¹³ Ketà ne mibpendiyà en ensi Hisus te inged uvey te inged ne Sisariya Pilipus. Guna su nekeuma ran en ne mid-insaan ni Hisus ke menge edumdumaan din te, “Engkey kun ke Impeanak te Menusiyà riyà te pegitungan te menge etew?”

¹⁴ “Ruen egkahi te sikuna si Juan ke Ebpembunyang,” ke sikandan. “Ne ruen duma ne egkahi te sikuna si Elias ke mibpelambas te Lalag te Eleteala rengan. Ne ruen pà ruma ne egkahi te sikuna si Jeremias etawa seveka ne mibpelambas te Lalag te Eleteala rengan.”

15 “Ne menu sikiyu,” ke si Hisus, “engkey e ma diyà te pegitungan niyu?”

16 Ne midtavak si Pedro te, “Sikuna ke Impasad ne Ebperetuen te langun ne menge etew dut te Eleteala ne warà kemetayan din, ne sikuna ke Anak din.”

17 “Mibpenaub ka, Simon ne anak ni Juan!” ke si Hisus. “Su benar ini se migkahi nu, ugaid ne kenà etew se mibpayag kayi te kenikew su ke Amey ku riyà te langit.

18 Tembù be ebpeketuenan ku kenikew te edingeranan ku sikew ki Pedro (ne iyan din meana ne ‘batu’). Iring ka te batu ne ebpeunsaran ku te simbaan ku su ini ke langun ne menge etew ne mibperetiyaya kediey. Ne misan ke gehem dut te kemetayen ne kenà ebpeketunggad kandan.

19 Ibehey ku kenikew ke ketau te kebpepemenudtul diyà te langun ne menusiya dut te Meupiya ne Tudtul mekeatag dut te Kedadù te Eletela ne embiya idsempità ta ini ne iring te ibehey ku kenikew ke gunsì te gumawan ne ebpependiyà te lusud te Edetuan te Eleteala. Ne ini se idawey nu kayi te kelibutan ne arà se indawey en dema te Eleteala riyà te langit. Engketà ded dema ke idtuhut niyu kayi te kelibutan ne arà ke intuhut en dema te Eleteala riyà te langit.”

20 Ne mid-il-ilutan ni Hisus te egkahi kandan te kenà dan ibpenudtul te misan engkey ne etew te sikandin ke Impasad te Eleteala ne Ebperetuen te menge etew.

*Mibpayag en Neraan ni Hisus ke Kebpatey Rin
(Marcos 8:31-9:1; Lucas 9:22-27)*

²¹ Igenat dè be ketà ne mibpehayan en ni Hisus ke minge edumdumaan din mekeatag te egketemanan din. Ke sikandin te, “Iyan iya se ebpekependiyan a te inged ne Hirusalim ne edresayen a nevenar su ebpeheweran a te minge pekilukesen te Hudiyanen, minge mepurù te terebpelengesa, wey ke minge meysterù te penduan. Ed-imetayan a, ugaid ne ketà te iketelu ne hewii ne egkevanew e red.”

²² Nerineg ni Pedro ne impesivey rin si Hisus ne pineengked din se egkahi te, “E Kerenan, berekat ne ibpemekeriyù dà ini te Eleteala! Kenà ayan med-ulaula kenikew!”

²³ Ugaid ne midlingi si Hisus ne migkehiyan din si Pedro te, “Awà ka su iring ka ki Setanas! Maa, ebengenen a nu kayi te ibpetuman kediey? Su ke itungan nu ne kenà diyà ebpuun te Eleteala, ugaid ne kayi rà te itungan te menusiya.”

²⁴ Ne migkahi si Hisus dut te minge edumdumaan din te, “Embiya ruen etew ne egkiyug ne eduma kediey, ne iyan iya se pekelipati rin ke kandin ne kiyug wey tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke minge suhù ku misan ibpatey rin pà se keduma rin kediey.

²⁵ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey ne ruen umur ne ibehey kandin ne warà edtemanan din.

²⁶ Menu, embiya ruen etew ne ebpekehaked te langun taman kayi te ampew te dunya, maa engkey se rantek din embiya egkerasey ke himukud din diyà te apuy nerakà? Warà! Su warà misan

engkey ne kearen ne igkevehey te etew apew rin meawi ke gimukud din.

²⁷ Su sikandin ke Impeanak te Menusiyà ne mehaan ne edlived kayi te ampew te dunya ne edumaan te menge suluhuen din wey ruen raman din ne iring te raman te Amey rin ne Eleteala. Ne ketà ne eberasan din ke menge etew dut te mid-ulaula ran kayi te ampew te dunya ke meupiya etawa meraat.

²⁸ Tentenuri nu ini," ke si Hisus, "ruen ruma niyu kayi ne kenà pà ebpatay taman ketà te hewii ne egkekita ran ke Impeanak te Menusiyà ne ebpekeuma su Edatù te menusiyà kayi te ampew te dunya."

17

Nedsalin ke Kebparas ni Hisus (Marcos 9:2-13; Lucas 9:28-36)

¹ Guna su neked-enem en new hewii, ne pineruma ni Hisus ensi Pedro wey ke teleari ne si Santiago wey si Juan ne midtekereg dan diyà te mehantur ne buvungan te sikandan dà.

² Guna su ketà dan en ne midtengtengan dan si Hisus ne netekew nedsalin ke kebpeparas din su mid-anlag ini se buked din iring te andew. Ne mibpeneringsing ke velegkas din te keputi.

³ Netekew ran dema nekita se deruwa ne etew se ebpekidlalag ki Hisus, si Moises wey si Elias, ke menge mibpelambas te Lalag te Eleteala rengan.

⁴ Ne migkahi en si Pedro ki Hisus te, "Kerenan, meupiya su kayi ki! Embiya egkiyug ka ne edsesabung a kayi te tetelu, seveka te keykew, seveka te ki Moises, wey seveka rema te ki Elias."

⁵ Edlalag pà si Pedro, ne ruen mermerayag ne sehulapun ne nekelikuvung kandan ne ruen suwara ne ketà ebpuun te sehulapun ne migkahi te, “Ini ke Anak ku ne igkelimù ku nevenar, ne ebpekesuhat nevenar sikandin te hinawa ku. Pemineha niyu ke edlelahen din!”

⁶ Guna su nerineg kayi te menge edumdumaan ni Hisus ke suwara ne nekelumpeng dan su neandek dan nevenar.

⁷ Ne mid-uvey ran ni Hisus ne migeweran din se egkahi te, “Enew kew, ne kenà kew meandek!”

⁸ Guna su midlingakà dan ne warà duma ne nekita ran su si Hisus dà.

⁹ Gewii ran te edtupang ne mibenduan dan ni Hisus te, “Ini se nekita niyu ne kenà niyu imbe ibpenudtul te misan entei taman te egkevanew en ke Impeanak te Menusiyà.”

¹⁰ Ne ketà ne mid-insà kandin ke menge edumdumaan din te, “Meambe ke egkehiyen te menge meyterù te penduan te iyan ed-una ebpengkayi ne si Elias ke etew ne mibpelambas te Lalag te Eleteala rengan, ne arà pà ke Impasad te Eleteala ne Edatù?”

¹¹ “Benar ne ed-una ebpengkayi si Elias,” ke si Hisus, “su ed-endamen din ke langun te kebpekeuma dut te Impasad te Eleteala ne Edatù.

¹² Ugaid ne igkahi ku keniyu te nekeuma en si Elias asal warà dan mekilala, ne nasi dan midrasey sikandin te endei se kiyug dan. Engketà ded dema te kedresaya ran dut te Impeanak te Menusiyà.”

¹³ Arà pà ne nekesabut ke menge edumdumaan ni Hisus te iyan din egkehiyen ne mekeatag ki Juan ke Ebpembunyag.

Neulian ni Hisus ke Vatà ne Midsuukan te Busew

(Marcos 9:14-29; Lucas 9:37-43a)

¹⁴ Guna su midlived en ensi Hisus diyà te merakel ne etew ne ruen ketà mid-uvey ki Hisus, ne midlumpeng diyà te sineruwan din,

¹⁵ ne migkahi te, “Mama, igkeyru nu ke anak ku! Ebevuyen sikandin ke edsuuk en ke busew ne egkerasey nevenar su ruen ke egkepiley riyà te apuy wey ruen ke riyà te wayig.

¹⁶ Ne mid-ewit ku en sikandin kayi te menge edumdumaan nu su ebpevewian ku, ugaid ne warà dan megaga.”

¹⁷ Migkahi si Hisus te, “Sikiyu ne menge etew guntaan, ne warà kebperetiyaya niyu te Eleteala wey menge suer kew!” ke sikandin. “Neuhet en se kebpekiduma ku keniyu, ne engkey pà se taman ne kebperetiyaya niyu? Engkey pà taman se keuhet din se kedtigkeri ku keniyu? Ipengkayi niyu ayan se vatà!”

¹⁸ Ne pineawà ni Hisus ke vusew ne mid-awà en diyà te kandin, ne arà dà dema ne neulian en.

¹⁹ Ne mid-uvey ki Hisus ke menge edumdumaan din te sikandan dà ne mid-insà te, “Meambe ke warà dey megaga te edsegseg ke vusew ne midsuuk ketà te vatà?”

²⁰ “Warà niyu megaga,” ke si Hisus, “su kurang nevenar ke kedsarig niyu te Eleteala. Tentenuri niyu ini su embiya ruen kebperetiyaya niyu te Eleteala ne reisek, misan iring dà dut te

reisek ne lahas te mustasa ne ebpekegaga kew te merehen ne egketemanan. Su embiya idsempità ta ne ebpekegaga ka ne ebpearat te buvungan ke egkehiyan niyu te, 'Meawà ka.' [

²¹ Migkahi maa si Hisus te, 'Ayan ne vusew ne kenà egkesegseg embiya kenà kew ed-una ebpengeningeni wey edlimpas te egkaan.']"

*Impayag pà maa ni Hisus Ke Kebpatey rin
(Marcos 9:30-32; Lucas 9:43-45)*

²² Guna su nevrurun en ke langun ne edumdumaan ni Hisus diyà te Geliliya ne migkahi si Hisus kandan te, "Mehaan en ibpalad ke Impeanak te Menusiyà diyà te menge kunterà din

²³ ne ed-imetayan sikandin, ugaid ne ketà te iketelu ne hewii ne ebenawen ded sikandin." Ne ketà ne nekebmutu nevenar ke menge edumdumaan din.

Ke Midlalag ni Hisus Mekeatag te Kebayad te Buwis Diyà te Nekebpuru ne Valey te Eleteala

²⁴ Guna su nekeuma en si Hisus wey ke menge edumdumaan din diyà te inged ne Kapirnewum, ne mid-uvey ki Pedro ke menge ebpevayad te buwis dut te Nekebpuru ne Valey te Eleteala, ne mid-insà dan te, "Menu, ebayad ayan se meysterù niyu te buwis dut te Nekebpuru ne Valey te Eleteala?"

²⁵ "Uya," ke si Pedro.

Guna su mibpemenayik en si Pedro diyà te baley ne mid-unaan en ni Hisus te egkahi te, "Diyà te itungan nu, Pedro, entei se ebayad te buwis diyà te egkamal te inged kayi te ampew te

dunya? Engkey, ke mehinged kayi te inged din etawa ke riyà ebpuun te meriyù?”

²⁶ “Ke riyà ebpuun te meriyù,” ke si Pedro. “Embiya iring ketà,” ke si Hisus, “ne kenà ki ebpekevayad diyà te Nekebpuru ne Valey te Eleteala su iyan ebpengemuney ketà ne ke Amey ta ne Eleteala.

²⁷ Ugaid ne kenà meupiya,” ke si Hisus, “ke ebmeraat ke hinawa rut te ebpevayad te buwis keyta. Pendiya ka te ranew ne pemunuwit ka ne ke egkeuna ne edtugtug diyà te bunuwit nu ne bigkata nu en. Ne ketà te bèbà te neutel nu ne egkekita nu ke kureta ne ereg ne ibayad ta te buwis. Kua nu ini ne pendiyà ka te Nekebpuru ne Valey te Eleteala su ivayad nu ini te buwis ta.”

18

Mid-insà ki Hisus ke Menge Edumdumaan Din ke Engkey se Mepurù Diyà te Menge Etew ne Edetuan te Eleteala

(Marcos 9:33-37; Lucas 9:46-48)

¹ Ketà ne hewii ne mid-uvey ki Hisus ke menge edumdumaan din se egkahi te, “Engkey se mepurù diyà te menge etew ne Edetuan te Eleteala riyà te langit?”

² Ketà ne mid-umew si Hisus te senge etew ne vatà ne impeitindeg din kayi te etuvangan dan

³ ne migkahi te, “Tentenuri niyu ini embiya kenà kew edsambì te itungan niyu iring te itungan kayi te vatà ini ne kenà ebpegitung te kebmeperù din, ne kenà kew ebpekelusud dut te menge etew ne Edetuan te Eleteala.

⁴ Su ke etew ne mepurù diyà te Edetuan te Eleteala ne sikandin ke mepeembavà se hinawa rin iring kayi te vatà.

⁵ Su misan engkey ne etew ne edtelimà te kevevan en ne etew iring kayi te vatà su atag te keduma rin kediey ne iring te siaken se midtelimà din.”

*Ke Ebpeneheewit Keytew te Ebaal te Meraat
(Marcos 9:42-48; Lucas 17:1-2)*

⁶ “Ne mekeatag be te ini se minge vatà ne mibperetiyaya kediey,” ke si Hisus, “ne embiya ruen etew ne ebpekevelavag dut te sarig te vatà ne iring kayi ne iyan pà meupiya ne ebperiwetuwan ke lieg din te mevehat ne batu ne id-antug diyà te rahat tumin dè be ke egkevelevahan ke sarig te vatà kediey.

⁷ Keyru nevenar te minge etew kayi te ampew te dunya su ruen kebpenggeram kandan te ebpekedsalà. Kenà egkepakey ne kenà egkeuma ini se kebpenggerami te minge etew, ugaid ne ke etew ne ebpenggeram te ruma rin su apew ebpekedsalà ne mekeyruwiru nevenar!

⁸ “Embiya iyan ebpekepeneheewit keykew te kebpekedsalà nu ke belad nu etawa paa nu, ne tempera nu ne itimbag nu! Su iyan pà tumù ne egkesarir ka tumin dè be ke deruwa red ke velad nu wey paa nu ne igkeantug ka diyà te apuy nerakà.

⁹ Ne embiya iyan ebpekepeneheewit keykew te kebpekedsalà nu ke mata nu, ne lesika nu ne itimbag! Su iyan pà tumù ne dibdivaluy se mata nu tumin dè be ke deruwa red ke mata nu ne igkeantug ka riyà te apuy nerakà.”

Ke Sempità ni Hisus Mekeatag te Bilibili ne Nelaag ne Netuen Ded ne Impeiring Din Dut te Etew ne Mibpendsendit te Salà Din
(Lucas 15:3-7)

¹⁰ “Urami niyu,” ke si Hisus, “te kenà kew edsudì kayi te eduma kediey ne iring te vatà se kedsarig dan. Su ke menge suluhuen ne ebantey kandan ne layun diyà te etuvangan te Eleteala ne Amey ku diyà te langit. [

¹¹ Su mibpengkayi te ampew te dunya ke Impeanak te Menusiyà su apey ebpeleyu te menusiyà ne nelaag.]

¹² “Engkey se pegitungan niyu ne ed-ul-ulaan te senge etew ne ruen mehatus ne bilibili rin ne seveka se nelaag? Ini imbe se ed-ul-ulaan din, ed-ewaan din arà te siyew nepulù wey siyew ne ebpemenabtab su ebpenuntulen din arà se seveka ne nelaag taman te egketuen din.

¹³ Igkahi ku keniyu,” ke si Hisus, “te embiya egketuen din en arà se nelaag ne dekelà pà se kegkehalew rin kayi te seveka ne netuen din dut te siyew nepulù wey siyew ne warà nelaag.

¹⁴ Ne engketà ded dema ke Amey tew ne Eleteala su kenà din egkiyuhan ne misan seveka dut te mibpesakup kandin ne egkelaag.”

Ke Penurù ni Hisus Mekeatag te Kebpesahad te Salà te Menge Ruma Ta

¹⁵ “Embiya ruen duma nu ne nekedsalà kenikew,” ke si Hisus, “ne pendiyà ka te kandin ne kehiya nu ke salà din te deruwa kew rà. Embiya ebpevenar sikandin ne netevangan nu

sikandin su ebpeked-uliey kew te meupiya ne itungan.

¹⁶ Ugaid ne embiya kenà ebpehimbenar sikandin, ne kuwa ka te senge etew etawa deruwa ne etew ne ebpeketitihus te kebitiyara niyu apey niyu egkerumai ke impesurat ne Lalag te Eleteala.

¹⁷ Ne embiya kenà sikandin ebpemineg kandan, ne peketueni nu en dut te langun ne egkevurun ne ebperetiyaya te Eleteala. Ne embiya kenà sikandin ebpemineg kandan, ne iringa niyu en sikandin te kenà niyu ruma te ebperetiyaya te Eleteala etawa iringa niyu en sikandin dut te tenlimbungen ne ebpevayad te buwis.

¹⁸ “Tembù be igkahi ku ini keniyu,” ke si Hisus, “te ini se idawey nu kayi te kelibutan ne arà se indawey en dema te Eleteala riyà te langit. Engketà ded dema arà se iduhut niyu kayi te kelibutan ne arà ke intuhut en dema te Eleteala riyà te langit.

¹⁹ “Ne igkahi ku maa keniyu: embiya duen deruwa keniyu kayi te ampew te dunya ne egkeseveka ne ebpemuyù te Eleteala te misan engkey en, ne ibehey kandan dut te Amey ku ne Eleteala riyà te langit.

²⁰ Su embiya ruen deruwa etawa tetelu ne etew ne egkevurun su atag dut te kedsarig dan kediey, ne ketà a red dema te kandan.”

Ke Sempità ni Hisus Mekeatag te Edsugsuhuen ne Warà Mibpesahad te Ruma Rin

²¹ Ketà ne mid-uvey si Pedro ki Hisus ne mid-insà te, “Kerenan, kepipira a ebpesahad ke

ebpekesalà ke ruma ku kediey? Maa, kepipitu rè be?”

²² “Kenà kepipitu rà,” ke si Hisus, “su egn-givuwan.

²³ Su ke Kekatù te Eleteala dut te menge etew ne ebpekeiring kayi. Duen senge etew ne datù ne ebpevayad en te menge utang kandin dut te menge edsugsuhuen din.

²⁴ Guna su nekerudsù en se ebpevayad, ne ruen senge etew kandan ne mid-ewit kayi te ratù ne nekeutang kandin te enggivungivuwan ne pirak.

²⁵ Tehaad te kenà sikandin ebpekevayad, ne migkahi en dut te datù te ibpepasa sikandin, iring te uripen abpeg ke esawa rin wey menge anak din wey ke langun taman ne kearen din, su apey mevayari ke utang din.

²⁶ “Ne midlumpeng sikandin kayi te etuvangan dut te datù se ebpemuyù te, ‘Kenà e pà nikuna sesawi su edlahud e pà,’ ke sikandin, ‘ne ebayaran ku sikuna te langun.’

²⁷ Ne neyruwan sikandin dut te datù, ne warà din en peveyari ke utang din ne pineuli din en sikandin.

²⁸ “Guna su mid-ipanew en ini se edsugsuhuen ne nesinuhung din en ke ruma rin te edsugsuhuen ne nekeutang kandin te deisek dà. Ne migeweran din en su ebpekelen din en se egkahi te, ‘Beyari nu en ke utang nu kediey!’

²⁹ “Ne midlumpeng en ini se duma rin te edsugsuhuen se ebpemuyù te, ‘Kenà e pà nikuna sesawi su edlahud e pà,’ ke sikandin, ‘ne ebayaran ku sikuna te langun.’

30 “Ugaid ne warà migkiyug, nasì pà te impevilanggù din ne kenà sikandin ebpekeli-hawang taman te kenà din egkevayaran ke langun ne utang din.

31 Guna su nekita ini dut te ruma pà ne edsugsuhuen ne nengeepes dan ne mibpendiyà dan en te datù ne intarem dan ke langun.

32 “Ne impetawag sikandin dut te datù ne migkehiyan din te, ‘Warà rantek nu ne edsugsuhuen! Warà ku en pevayari keykew su in-awà ku en te itungan ku ke langun ne utang nu kediey su atag dà dut te mibpemuyù ka kediey.

33 Ne meambe ke warà ka meyru dut te ruma nu ne edsugsuhuen te iring dut te kinekeyru ku keykew?’

34 Neepes nevenar ke datù ne impevilanggù din en ini se edsugsuhuen ne kenà ebpekeli-hawang sikandin taman te kenà ebpekevayad te langun ne utang din.

35 “Ne engketà imbe rema,” ke si Hisus, “ke ed-ul-ulaan keniyu dut te Amey ku ne diyà te langit ke kenà niyu ebpeseharen ke menge ruma niyu se edlipatan en ke meraat ne mid-ulaula ran keniyu su iawà niyu en iya te pegitungan niyu.”

19

Ke Kebpenurù ni Hisus Mekeatag te Ebpekidingked te Esawa

(Marcos 10:1-12)

1 Nekeipus si Hisus te ebpenurù ne mid-awà ketà te pruvinsiya te Geliliya ne mibpendiyà te pruvinsiya ne Hudiya.

² Ne mibpenduma kandin ke denda ne menge etew, ne nengeulian din ke ebpenderaru.

³ Ne ruen menge Peresiyu ne mibpengkayi te ki Hisus su ebaal dan te idseligkat kandin. “Menu, idluhut be te penduan tew,” ke sikandan, “se ebpekid-engked ke meama te esawa rin te misan engkey ne ibpuun din?”

⁴ Migkahi si Hisus te, “Meambe, warà niyu ves mevasa ke impesurat ne Lalag te Eleteala ne egkahi te, ‘Inggenat te aney en ne midlimbag te Eleteala ke meama wey meritan?’

⁵ ne migkahi ke Eleteala te, ‘Tembù ed-ewaan dut te meama ke amey rin wey iney rin su riyà ebpekidseveka sikandin te esawa rin, ne ini se teled-esawa ne nevaluy ne seveka.’

⁶ Ketà ne kenà dan en deruwa ne etew su neseveka rà. Tembù be ini se deruwa ne midseveka te Eleteala ne kenà egkepebelag dut te piya entei ne etew,” ke si Hisus.

⁷ Ne mid-insà ke menge Peresiyu te, “Embiya iring ketà ne meambe ke inluhut ni Moises dut te meama ne ebpekid-engked te esawa rin embiya ed-una edsurat te kebenaran te ebpekid-engked en sikandin, ne arà pà ne egkeengkeran din ke esawa rin?”

⁸ Ne midtavak si Hisus kandan te, “Inluhut ini ni Moises se kebpekid-engked niyu su meresen ke ulu rut te menge keep-epuan niyu su warà dan mebpemineg te kebpenurù din, ne engketà kew red dema. Ugaid ne kenà arà ke kiyug te Eleteala rut te pehaney en ne midlimbag din ke meama wey meritan.

⁹ Tembù be igkahi ku keniyu embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne edsaup ded maa ed-esawa ne nekelangkadlangkad te esawa rin.”

¹⁰ Migkahi ke minge edumdumaan ni Hisus te, “Embiya iring ketà se egketemanan te teled-esawa, ne iyan tumù ne kenà ebpees-eseweey te etew.”

¹¹ Migkahi si Hisus te, “Duen minge etew, meama wey meritan, ne intandà kandan te Eleteala se kenà ebpeesewaan ne meupiya arà kandan, ugaid ne kenà meupiya arà dut te ruma.

¹² Su merakel ke puunan te meambe ke kenà dan ed-esawa. Duen kenà ebpekeesawa su ketà te kineanak kandan ne netuenan en te kenà dan ebpekeesawa. Ne ruen дума ne kenà ebpekeesawa su migkapun dan te minge etew. Ne ruen дума pà ne kenà ed-esawa su apey ran ebpekepesabut dut te Lalag te Eleteala mekeatag te Kedatù din dut te minge etew. Piya entei se ebpeketuman kayi te penurù ku ini, ne tumana rin en iya.”

*Midpenubtuvaran ni Hisus Ke Minge Vatà
(Marcos 10:13-16; Lucas 18:15-17)*

¹³ Ne ruen ketà minge etew ne mibpemava te minge anak dan diyà te ki Hisus su ibperampen dan kandin su ebpepenubtuvaran dan, ugaid ne midawey ini dut te minge edumdumaan din.

¹⁴ Ugaid ne migkahi si Hisus te, “Kenà niyu dewaya sikandan! Ugaid ne ibpepengkayi niyu te kediey ke minge vatà, su ke minge etew ne

Edetuan te Eleteala ne iring ke sarig dan kediey kayi te minge vatà ini.”

¹⁵ Ketà ne midampen din sikandan su ebpenubtuvaran din, ne mid-awà en.

*Ke Kewasa ne Meama ne Migkiyug ne Ebpeke-
haked te Umur ne Warà Edtemanan Din
(Marcos 10:17-31; Lucas 18:18-30)*

¹⁶ Duen senge etew ne kenakan ketà ne mibpendiyà te ki Hisus. “Meyterù,” ke sikandin, “engkey iyan se meupiya pà ne ed-ul-ulaan ku apey a mekekuwa te umur ne warà edtemanan din?”

¹⁷ Ne midtavak si Hisus te, “Meambe ke id-insà nu kedì ke engkey se meupiya pà ne ed-ul-ulaan nu?” ke si Hisus. “Su sebseveka rà ke meupiya se ed-ul-ulaan din ne Eleteala rà. Embiya egkuwa ka te umur ne warà edtemanan din, ne tumana nu ke langun te penduan te Eleteala.”

¹⁸ Ke se kenakan te, “Engkey ne minge penduan?”

Ne midtavak si Hisus te, “Ke penduan ne iring te, ‘Kenà ka ed-imatey, kenà ka edlangkad-langkad te esawa nu, kenà ka ebpenakew, kenà ka edtarùtarù,

¹⁹ edati nu ke amey nu wey ke iney nu, wey ikelimù nu ke ruma nu iring te kegelimù nu te hinawa nu,’ ” ke si Hisus.

²⁰ “Langun kenihan ne midumaan ku,” ke se kenakan, “engkey pè ma se kurang ne ed-ul-ulaan ku?”

²¹ “Embiya iyan nu kiyug ne warè en kurang te ed-ul-ulaan nu,” ke si Hisus, “ne uli ka ne pesaa ke langun ne kearen nu ne ipemehey nu ve ke

elehà din diyà te menge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedi.”

²² Nerineg ini rut te kenakan ne mid-ipanew en se merungkug su kewasa nevenar.

²³ Ketà ne migkahi si Hisus kayi te edumdumaan din te, “Benar ini te merehen nevenar dut te kewasa ne etew se kebpesakup din te menge etew ne Edetuan te Eleteala.

²⁴ Ne igkahi ku pà lavew keniyu te embiya idupama ta ne iyan pà melemu ne ebpevayà diyà te vudsi te rahum ini se binatang ne kemilu tumin dè be ke kebpesakup te etew ne kewasa dut te menge etew ne Edetuan te Eleteala.”

²⁵ Guna su nerineg ini kayi te menge edumdumaan din ne ingkegeyip dan nevenar ne mid-insà dan te, “Embiya iring ketà se kerehen din te etew ne kewasa te kebpesakup din dut te menge etew ne ebeyveyaan te Eleteala, ne engkey rè be buwa se ebpekehaked te umur ne warà edtemanen din?”

²⁶ Ne midtengteng si Hisus kandan ne migkahi en te, “Embiya etew rà ne kenà dan ebpekegaga ne egaked te umur ne warà edtemanen din, ugaid ne Eleteala se ebpekegaga ne ebehey kandan su egkegaga te Eleteala ke langun taman.”

²⁷ Ketà ne migkahi si Pedro te, “Netuenan nu te mid-ewaan dey ke langun taman dey su miduma key keykew. Ne engkey ve se lalew rey?”

²⁸ Ne migkahi si Hisus kandan te, “Sebenarvenar ne ini se egkehiyen ku keniyu te embiya

egkeuma ke hewii te egkevehu en ini se kelibutan, ne Sikandin ke Impeanak te Menusiyà ne ebpinuu en diyà te ebpinuuwan te punggus ne datù se Edatù te langun. Ne sikiyu ke sepulù wey deruwa ne edumdumaan ku ne ebpepinuuwan ku sikiyu se egkamal dut te sepulù wey deruwa ne bansa te inenakan ni Israyil.

²⁹ Ne misan entei ne etew se neewaan din ke ubpaan din, menge suled din, menge etevey rin, ke amey rin etawa iney rin, menge anak din etawa ke tanà din su atag dut te keduma rin kediey, ne ebpeketelimà sikandin te kemehatus egketakep se neewaan din ne ebehayan pà te umur ne warà edtemanan din.

³⁰ Ugaid ne merakel ne menge etew guntaan,” ke si Hisus, “ne mepurù se ketengdanan din ne ketà te akir din ne hewii ne sikandan ke pinekemevavà te langun. Ne ruen menge etew guntaan ne mevavà dan nevenar, ne ketà te akir din ne hewii ne sikandan se pinekebmepurù se ketengdanan din.”

20

Ke Sempità ni Hisus Mekeatag te Menge Etew Ne Egelevék te Eleteala

¹ Ne mibpenempità si Hisus se egkahi te, “Ini se Kedatù te Eleteala te menge etew ne iring kayi. Ruen senge etew ne meluag se impemula rin ne wahed ne ed-ingaranan te paras. Mibpaneypaney ini se kemuney se ebepemengà te edsukeyan din ne egelevék kayi te pemulaan din.

² Guna su ruen en nekita rin ne in-upakat din en te edsukeyan din te senge elad ne pelatà su

arà ke nelayaman ne sukey te senge hewii, ne pinehelevek din en kayi te pemulaan din.

³ “Guna su edluuk en ebpemenayik ke andew ne midlived pà ke kemuney diyà te pedian ne ruen nekita rin ne ebpimpinuu su warà helevek din.

⁴ Tembù be migkahi ini se kemuney te, ‘Gelevek kew rema diyà te pemulaan ku ne edsukeyan ku sikiyu te sesangan.’

⁵ Ne mibpendiyà dan en.

“Guna su neudtu en ke andew ne midlived pà maa se ebpemengà te ruma ne egelevek kandin, ne engketà ded ke mid-ulaula rin te edluuk en ebpemenaug ke andew.

⁶ Guna su meapun en nevenar ne midlived pà sikandin diyà te pedian ne ruen ruma ne nekita rin ne ebpimpinuu rà. ‘Meambe ke ebpimpinuu kew rà kayi ne kenà niyu ebpekinuhunan ke hewii?’ ke sikandin.

⁷ “ ‘Su warà ebpehelevek kenami,’ ke sikan-dan.

“Ne migkahi sikandin kandan te, ‘Gelevek kew rema diyà te pemulaan ku.’

⁸ “Ketà te ebpengirum-irum en ne migkahi ini se kemuney ketà te kedserihan din te, ‘Tewaha nu ke mibpenggelevek ne sukayi nu en. Unai nu te edsukeyan ke mewri ne pinelusud ku, ne arà pà ke neuna.’

⁹ “Ne ini se menge etew ne pinelusud din te egelevek te meapun en ne midsukeyan te sukey te senge hewii.

¹⁰ Guna su edsukayen en ini se neuna ne pinelusud din, ne iyan dan pegitungan ne labi

pà ke egkekuwa ran su migelevek dan te neep-epunan. Ugaid ne andang ded ne sukey te senge hewii ke nekuwa ran.

¹¹ Nekuwa ran ke sukey ran ne mibpemivig dan dut te kemuney.

¹² Ke sikandan te, 'Meambe ke neked-iring dà ke sukey rey dut te mewri ne pinelusud nu te senge uras dà se kinehelevek dan? Ugaid ne sikami,' ke sikandan, 'ne kayi en minatey ke andew te peka rey.'

¹³ "Ne migkahi en ini se kemuney te, 'Suleren, warà a midlimbung keniyu, su migkiyug kew ma ne egelevek dut te andang ne sukey te senge hewii.

¹⁴ Na, telimaa niyu en ini se sukey niyu, ke se kemuney, ne uli kew en. Su kediey ne kiyug ini se mewri ne pinelusud ku ne edsukayan ku te iring ded dut te insukey ku keniyu.

¹⁵ Meambe, kenà ku egkeveyveyaan ke kedi ne kureta? Maa, egkeima kew su metulanged a dut te menge etew?'

¹⁶ "Ne migkahi pà maa si Hisus te, "Duen merakel ne menge etew ne mepurù se ketengdanan din guntaan ne ketà te akir din ne hewii ne sikandan ke pinekemevavà. Ne ruen merakel ne menge etew ne kevevaan guntaan, ne ketà te akir din ne hewii sikandan se pinekemepurù se ketengdanan din."

Iketelu en ne Kebpayag ni Hisus Atag te Kebpatey Rin

(Marcos 10:32-34; Lucas 18:31-34)

¹⁷ Ketà ne mibpendiyan en ensi Hisus te Hirusalim. Ne impesivey ni Hisus ke sepulù wey

deruwa ne edumdumaan din ne gewii ran te ed-ip-ipanew ne migkehiyan din sikandan te,

18 “Netuenan niyu en,” ke si Hisus, “ne ebpendiyà kiyu te Hirusalim ne ketà sikandin ke Impeanak te Menusiyà ne ibpalad en diyà te menge mepurù te terebpelengesa wey ke menge meysterù te penduan. Ne ebpegumpung dan en te kukuman te ed-imetayan sikandin,

19 ne arà ne ibpalad dan diyà te menge etew ne kenà Hudiyanen, ne ed-undaunda kandin, ebpenlambit kandin, arà pà ne ed-imetayan. Ugaid ne ketà te iketelu ne hewii ne egkevanew red sikandin.”

*Ke Mibuyù te Esawa ni Sibidiyu
(Marcos 10:35-45)*

20 Ne mibpengkayi te ki Hisus ke esawa ni Sibidiyu abpeg ke deruwa ne anak din ne meama ne midlumpeng sikandin kayi te sineruwan ni Hisus su ruen ebpemuyuen din.

21 Ne mid-insà si Hisus te, “Engkey se ebpemuyuen nu?”

“Ini se ebpemuyuen ku,” ke sikandin, “ne ketà te akir din ne hewii te kedatù nu en ne pepinuuwa nu ini se deruwa ne anak ku ne ruma nu te edatù, seveka riyà te egkekewanan nu ne seveka riyà te egkehivang nu.”

22 “Matag niyu en ini ebuyua,” ke si Hisus, “ne warà niyu mesebuti an se ebuyuen niyu. Maa, ebpeketigker kew ve dut te kemeresayan ne mehaan ku en ibpeveyà?”

“Uya,” ke sikandan, “egketigkeran dey.”

²³ “Benar iya ne edresayen kew iring dut te kemeresayan ku,” ke si Hisus, “ugaid ne warà ketengdanan ku te ebpemilì ke engkey se ebpepinuuwen ku kayi te egkekewanan ku wey kayi te egkehivang ku. Su ini ne intail dut te Amey ku ne Eleteala dut te mibpemilì din.”

²⁴ Guna su nerineg kayi te sepulù ne edumdu-maan ni Hisus arà se ebuyuen dut te esawa ni Sibidiyu, ne nengeepes dan kayi te deruwa ne teleari.

²⁵ Tembù be midtawag dan langun ni Hisus se egkahi te, “Netueanan tew se ini te menge pengulu te inged kayi te ampew te dunya ne metehel ne edsuhù te langun ne menge etew, ne ini se menge unuten ne kandan dà ne kiyug se edumaan.

²⁶ Ugaid ne sikiyu,” ke si Hisus, “ne kenà kew ed-iring ketà. Su embiya ruen seveka keniyu ne egkiyug ne ebmepurù, ne iyan iya se mebpeembavà te hinawa rin wey ebpevayàbayà dut te menge ruma rin;

²⁷ ne embiya ruen seveka keniyu ne egkiyug te sikandin se ebpekeuna te langun niyu, ne iyan iya se mebpeembavà te hinawa rin wey ebpevayàbayà dut te menge ruma rin.

²⁸ Med-iring sikandin dut te Impeanak te Menusiyà te kenà iyan din kinepengkayi te ampew te dunya ne apey metevangi te menusiyà. Ugaid ne iyan din kinepengkayi ne apey rin metevangi sikandan, ne egkeimetayan su apey merakel se egkeivelukasan.”

Neulian ni Hisus Ke Deruwa ne Meama ne Pisek

(Marcos 10:46-52; Lucas 18:35-43)

29 Guna su ed-awà en ensi Hisus te inged ne Hiriku ne ruen merakel ne minge etew ne mibpenduma kandan.

30 Ne diyà te kilid te ebpevayaan dan ne ruen deruwa ne meama ne pisek ebpimpinuu. Guna su nerineg kayi te deruwa ne pisek te edsahad si Hisus ne midtawag dan te, "Igkeyru key nikuna! Su sikuna ke inenakan dut te datù tew rengan ne si David!"

31 Ke merakel ne minge etew ketà se midawey kandan te mebpeeneng-eneng dan ugaid ne lemban en ne egkeilut se ebpemensag te, "Kerenan, igkeyru key nikuna! Su sikuna ke inenakan dut te datù tew rengan ne si David!"

32 Guna su nerineg ni Hisus ne mid-itindeg pà ne midtawag din sikandan se egkahi te, "Engkey ma se ebpetevangan niyu kediey?"

33 Ne migkahi ke minge pisek te, "Kerenan, kiyug dey ne mekekita key red perem!"

34 Neyru si Hisus kandan ne midampen din ini se minge mata ran. Arà dà iya ne nekekita ran en, ne miduma ran en ki Hisus te ked-ip-ipanew ran.

21

Ke Kinelusud ni Hisus Diyà te Hirusalim ne Mid-untud te Nati ne Kudà su Tuus ini te Datù Sikandin Dut te Minge Hudiyanen

(Marcos 11:1-11; Lucas 19:28-40; Juan 12:12-19)

1 Guna su ebpelundani ran en te Hirusalim ne nekeuma ran en te inged ne Bitpahi ne egkelingakà ke buvungan ne ed-ingaranan te

Ulivuwen. Midsuhù en ni Hisus ke deruwa ne edumdumaan din te ebpeunaan dan,

² ke sikandin te, “Una kew en be ketà te inged ne an te unaan ta, ne ketà te kebpekeuma niyu ne egkekita niyu se in-iket ne kudà wey ke nati rin. Ekari niyu be ne ewita niyu kayi,” ke si Hisus.

³ “Ne embiya ruen ed-insà keniyu ke maan ke ed-ekaran niyu ne iyan niyu kehiya te, ‘Ke Kerenan dey se ebpegingawà kayi te egkeunturan din’ ne segugunee ne ibehey rin keniyu.”

⁴ Ne ned-ulaula ini su apey metuman ke impesurat te Eleteala dut te senge etew ne mibpelambas te lalag din rengan ne egkahi te,

⁵ “Kehiya niyu diyà te menge etew te Hirusalim te,

‘Ebpekeuma en ke datù niyu!

Meamuk sikandin

ne ed-untud te nati te kudà,

uya, ed-untud te anak te kudà, ke binatang ne eduranaan.’ ”

⁶ Tembù mid-una mid-ipanew ini se deruwa ne edumdumaan din ne midtuman dan ke migkahi ni Hisus.

⁷ Ne mid-ewit dan en ini se kudà wey ke nati rin kayi te ki Hisus, ne midebpasan dan te kumbalà dan ne mid-untud en ketà si Hisus.

⁸ Merakel ne menge etew ketà se midtulid te menge kumbalà dan te ebpepevayaan ki Hisus, ne ke ruma ne mibpenibpù dan te menge subpang ne rawunen su intulid dan diyà te ralan su ini ke tuus te adat te menge Hudiyanen dut te menge mepurù dan.

⁹ Ne ke menge etew ne mid-una ki Hisus wey engketà ded ke midtundug kandin ne migkerag te,

“Edeyuen tew ke inenakan ni David!

Menu ma ke ebpeneuven te Eleteala

ini se midtendù din ne edatù te langun!

Edeyuen tew ke Eleteala!”

¹⁰ Ketà te kedlusud en ni Hisus te Hirusalim, ne mibmehurub ke langun ne menge etew dutun.

“Engkey ini etawa?” ke sikandan.

¹¹ Midtavak ini se menge miduma ki Hisus te, “Si Hisus ini ne ebpelambas te Lalag te Eleteala ne riyà ebpuun te Nesarit diyà te lusud te Geliliya.”

Mibpenegseg ni Hisus ke Ebpemendahang Diyà te Nekebpuru ne Valey te Eleteala

(Marcos 11:15-19; Lucas 19:45-48; Juan 2:13-22)

¹² Guna su nekeuma en si Hisus diyà te Hirusalim, ne midlusud sikandin diyà te Nekebpuru ne Valey te Eleteala ne mibpemenegseg din en ke menge etew ne ebpememasa wey ke menge ebpemendehang ketà. Ne mibpenunggad din ke menge lemisaan dut te menge etew ne ebpenambi te kureta wey ke menge ebpeminuuwan dut te menge etew ne ebpemendahang te menge melepati ne ibpemelengesa rut te menge Hudiyanen diyà te Eleteala.

¹³ Ne migkehiyan din sikandan te, “Duen en ura impesurat ne Lalag te Eleteala ne egkahi te, ‘Ini se baley ku ne ed-ingaranan te baley ne ebpengeningenian te menge etew.’ Ugaid ne

sikiyu,” ke si Hisus, “ne mibaluy niyu en ini ne ubpaan te minge tenlimbungen!”

¹⁴ Ne gewii te diyà si Hisus te Nekebpuru ne Valey te Eleteala ne mid-uvey kandin ke minge pisek wey minge pungkù ne neulian din.

¹⁵ Ne nengeepes nevenar ki Hisus ke minge mepurù te terebpelengesa wey ke minge meysterù te penduan te nekita ran ini se mekegeyip ne mid-ulaula ni Hisus wey ke minge vatà ne egkerag te kedeyù dan kandin te, “Edeyuen tew ini se inenakan dut te datù tew rengan ne si David!”

¹⁶ Tembù be migkehiyan dan si Hisus te, “Menu, nerineg nu red ayan se migkahi ran?”

“Nerineg ku,” ke si Hisus. “Ne maa, warà niyu bes mevasa ke impesurat ne Lalag te Eleteala ne egkahi te,

‘Misan ke deisek ne minge vatà ne mibpenurù te Eleteala te edeyù kandin.’ ”

¹⁷ Ketà ne mid-awà en si Hisus se ebpependiyà te inged ne Bitanya ne dutun en mid-irehà.

Ke Kayu ne ed-ingaranan te Igira ne Mibpenrewakan ni Hisus

(Marcos 11:12-14, 20-24)

¹⁸ Nepawà ketà te kedlived dan diyà te Hirusalim, ne nevitil si Hisus.

¹⁹ Ne nekekita sikandin te kayu ne igira uvey te ibpevayà dan. Mid-uvey rin su ed-inteng sikandin ke ruen bahas din, ugaid ne warà nekita rin su tibal rawun. Ne migkehiyan ni Hisus ke kayu te, “Igenat guntaani ne kenà ke en imbe ebpekevahas!” Arà dà ne nehangu en ke kayu.

²⁰ Nekita ini rut te minge edumdumaan din ne negeyip dan. Ke sikandan te, “Meambe ke megmehaan nehangu ke kayu?”

²¹ “Sebenarvenar ne ini se egkehiyen ku keniyu,” ke si Hisus, “embiya edsarig kew te Eleteala te warà keduwaruwa te hinawa niyu, ne ebpekegaga kew te iring kayi te mid-ulaula ku ini kayi te kayu. Ne kenà ketà dà taman su misan ke kenà egkegaga te menusiya ne egkegaga niyu iring te egkehiyan niyu ini se buvungan te, ‘Awà ka kenian ne riyà ka te rahat,’ ne egketuman ini se egkehiyen niyu.

²² Tembù be,” ke si Hisus, “idtarem ku keniyu te embiya ruen ebuyuen niyu te Eleteala, ne eheta niyu ke hinawa niyu te warà keduwaruwa rin ne egketelimà niyu ini.”

Mid-insaan si Hisus Mekeatag te Kewagib din dut te Mibpenegseg Din ke Menge Ebpemendahang Diyà te Nekebpurù ne Valey te Eleteala

(Marcos 11:27-33; Lucas 20:1-8)

²³ Guna su nekeuma ran en maa diyà te Hirusalim, ne midlived en maa si Hisus ketà te Nekebpuru ne Valey te Eleteala. Gewii rin te ebpenurù kayi te lusud ne ruen minge mepurù te terebpepengesa wey minge pekilukesen te Hudiyanen ne mid-uvey kandin ne mid-insaan dan si Hisus te, “Ini se mid-ulaula nu kayi te Nekebpuru ne Valey te Eleteala, engkey se kewagib nu te ed-ulaula te iring kayi? Ne engkey se mibehey keykew te kewagib?”

²⁴ Midtavak si Hisus te, “Duen seveka rà ne id-insà ku keniyu, ne embiya egketavak niyu ne

idtarem ku keniyu ke engkey se mibehey kedì te kewagib kayi te mid-ulaula ku.

²⁵ Entei se mibehey ki Juan ke Ebpembunyag te kewagib te ebpembunyag, diyà be te Eleteala etawa kayi rà dè duen te menusiya?”

Ne mibpein-insee ran te, “Engkey se idtavak tew? Su embiya iyan tew egkehiyen se, ‘Riyà ebpuun te Eleteala,’ ne ed-insà maa sikandin te, ‘Meambe ke warà kew mebperetiyaya ki Juan?’

²⁶ Ugaid ne embiya egkahi ki te, ‘Kayi red ebpuun te menusiya,’ ne egkekeiran ki su mibperetiyaya ke langun ne menge etew te mibpelambas te Lalag te Eleteala si Juan.”

²⁷ Ketà be ne midtavak dan ki Hisus te, “Kenà dey egketuenan.”

Ne migkahi rema si Hisus kandan te, “Embiya iring ketà, ne kenà ku rema egkehiyen ke engkey se mibehey kedì te kewagib te mid-ulaula kayi.”

Ke Sempità ni Hisus Mekeatag te Deruwa ne Teleari ne Meama

²⁸ Mibpenurù pà maa si Hisus te, “Peg-pegitunga niyu ke engkey se meana rin ini se sempità ku. Duen senge etew ne deruwa se anak din me meama. Mid-uvey rin ini se kakey ne migkahi te, ‘Gelevek ka, Mama, diyà te pemulaan ta.’

²⁹ “ ‘Ah, kenà a!’ ke se anak din. Ugaid ne nekepegpegitung ded ne ketà ne mibpendiyà te pemulaan dan.

³⁰ “Ne mid-uvey rut te meama ini se ari ne anak din ne engketà ded maa ke migkahi rin.

'Uya, Amà,' ke se anak din, 'ebpendiyan a.' Ugaid ne warà medtuman.

³¹ "Na, endei ve rapit kayi te deruwa ne teleari," ke si Hisus, "se midtuman dut te suhù te amey ran?"

"Ke kakey," ke sikandan.

"Idtarem ku keniyu," ke si Hisus, "te ini se menge etew ne kenà meupiya kayi te etuvangan niyu iring te menge ebpevyad te buwis wey menge meritan ne warà en keeleran din ne ebpekeiring dut te kakey dut te teleari su edtuman dan guntaan te Lalag te Eleteala ne tembù be egkeuna ran keniyu ne ebpekelusud dut te menge etew ne Edetuan te Eleteala.

³² Su mibpengkayi te keniyu si Juan ke Ebpembunyag," ke si Hisus, "su ebpenurù te metidtu ne ralan diyà te Eleteala, ne warà kew mebperetiyyaya. Ugaid ne ini se ebpevyad te buwis wey ke menge meritan ne warà en keeleran din ne mibperetiyyaya ran mulà. Ne sikiyu, misan nekita niyu en te nesembian dan ke ulaula ran su sabap te kebperetiyyaya ran, ne warà kew mebpsendit wey mebperetiyyaya kandin."

Ke Sempità ni Hisus mekeatag te Menge Etew ne Pinetuganur te Pemulaan

(Marcos 12:1-12; Lucas 20:9-19)

³³ "Pmineg kew pà," ke si Hisus, "te ruma pà ne sempità ku. Ruen senge etew ne ruen tanà din ne mibpemulaan din te wahed ne edingaranan te paras. Ne mid-alad din arà, ne mibaal te edtehuan dut te egkekeres ne bahas te paras, ne midsebungan din te ebpeubpaan dut te

ebpeventayen din. Ne ruen pinekamal din dut te impemula rin, ne arà pà ne mid-ipanew se ebpendiyà te meriyù ne inged.

³⁴ Guna su midsabpet en ke pinemula rin, ne midsuhù din ke menge edsugsuhuen din su ibpekuwa ke kandin ne umun.

³⁵ Ugaid ne nekeuma ini se midsuhù din, ne migeweran dut te pinekemal din ne mibedasan dan ne ruen mid-imetayan dan ne ruen mibpen-rumbag dan te watu.

³⁶ Ne misan iring ketà, ne ruen pà maa midsuhù din ne merakel pà dut te neuna. Nekeuma ran ketà ne engketà ded lavew ke imped-ulaula rut te pinekamal te pemulaan.

³⁷ “Ketà te ketepusan en ne iyan din en midsuhù ne ke anak din. Ke hingginawa rin te, ‘Kenà egkepakey ne kenà dan ed-edatan ini se anak ku.’

³⁸ “Ugaid ne guna su nekeuma ini se anak din ne mibpeleglelahey ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayan tew su apey sikitew en se ebpekegkemuney kayi te tanà.’

³⁹ Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

⁴⁰ “Na,” ke si Hisus, “ketà te ked-ulì dut te kemuney te tanà, ne engkey ve se ibped-ulaula rin dut te pinekamal din?”

⁴¹ Midtavak dan te, “Ebayaan din arà se menge meraat ne etew ne ebpengimetayan din ne ebpekemalan din te ruma ne etew ne ebehey kandin te umun din ke egkeuma te kedsebpet.”

⁴² Ne migkahi pà maa si Hisus te, “Maa, warà niyu ves mevasa ke impesurat ne Lalag te Eleteala mekeatag te ini? Su nekahi ketà te, ‘Ke pelaus ne mid-eng-engkeran dut te menge etew ne ebpemevaley su kunaan dan ke warà rantek din, ne iyan en iya ini nepemili ne segkad te valey. Ini se mid-ulaula te Kerenan, ne mekegeyip nevenar!’

⁴³ “Igakahi ku keniyu,” ke si Hisus, “te ini se umun niyu kayi te Edetuan te Eleteala ne id-awà kayi te keniyu ne ibehey diyà te ruma ne menge etew ne ebperumaruma te Lalag te Eleteala.

[⁴⁴ Ne geina te siaken ini se segkad ne egkerupet ke langun ne egkeulug ketà, ugaid ne egkepipinì ke langun ne egkepilayan din.]”

⁴⁵ Guna su nerineg dut te menge mepurù te terebpelengesa wey ke menge Peresiya ini se sempità ni Hisus, ne netuenan dan te sikandan ke nesuhat ketà,

⁴⁶ tembù be ibpesigkem dan perem si Hisus. Ugaid ne neandek dan dut te merakel ne etew su mibperetiyaya ini se menge etew te ebpelambas te Lalag te Eleteala si Hisus.

22

*Ke Sempità ni Hisus Mekeatag te Kevuruanan te Kewingan ne Ibpeiring Din dut te Kevuruanan te Eleteala te menge Etew ne Edetuan Din
(Lucas 14:15-24)*

¹ Mibpenempità pà maa si Hisus te kebpenurù din kayi te minge etew.

² “Ke Kekatù te Eleteala dut te minge etew,” ke si Hisus, “ne iring kayi. Duen senge etew ne datù ne mibair te kevrunan te kegwawing te anak din ne meama.

³ Ne midsuhù din ke minge edsugsuhuen din diyà te minge etew ne mid-inggat din te ebpesabut kandan te ibpetelavuk dan te kevrunan. Ugaid ne warà dan sehipaa ke minge edsugsuhuen.

⁴ “Ketà ne midsuhù pà maa te ruma ne edsugsuhuen din se egkahi te, ‘Kehiyi niyu ke minge etew ne neinggat ku te ebpehendam en su nelutù en ke sapi wey minge nati. Kuwa kew en su ebpekaan en!’

⁵ “Ugaid ne warà dan medsehipà su iyan dan midsinaru ke kandan ne ed-ul-ulaan. Ini se senge etew ne mibpendiyà te pengengewiran din, ne ke senge etew ne diyà te tindà din,

⁶ ne ruma pà dut te neinggat te datù ne migawed dut te minge edsugsuhuen din ne mibedasan ne mid-emetayan dan.

⁷ Nerineg ini dut te datù ne neepes nevenar sikandin ne midsuhù din ke minge sundaru rin ne mibpeimetayan din arà se mid-imatey rut te edsugsuhuen din ne mibpevinsulan din ke inged dan.

⁸ “Ne midtawag din ini se minge edsugsuhuen din ne migkahi te, ‘Nekepehendam en ke ebpekaan ku te kevrunan te kegwawing te anak ku, ugaid ne arà se minge etew ne mid-inggat

ku ne kenà dan ebpekekaan su mid-engkenà dan dut te kineinggat ku kandan.

⁹ Pekehaan kew tuntula niyu ke minge meluag ne dalan ne ebpevayaan te merakel ne etew ne inggata niyu ke langun ne minge etew ne egkeuma niyu te ibpetelavuk kayi te kevrunan.'

¹⁰ Ketà ne mibpendiyà ke minge edsugsuhuen ne midtuntul dan ke dalan, ne langun ne neu-maan dan ne meupiya se ulaula rin etawa meraat ne mid-inggat dan te edtelavuk te kevrunan. Guna su nekeuma ran, ne nepenù en ke baley dut te egkewingan.

¹¹ "Midlusud ini se datù ne mibair te kevrunan su ed-intengan din ke minge etew ne midtelavuk ne nekita rin ini se senge etew ne warà mekebevelegkas te belegkas ne idtelavuk te kewingan.

¹² 'Mama,' ke se datù, 'engkey se kinepekelusud nu kayi te warà ka mibevelegkas te idtelavuk te kewingan?' Ugaid ne warà migkahikahi ke meama.

¹³ "Ketà ne migkehiyan dut te datù ke minge edsugsuhuen din te, 'Bekua niyu ke belad din wey ke paa rin ne iantug niyu riyà te kesusireman. Ne ketà ne ebpekependerawit wey ebpekengitel.' "

¹⁴ Ne migkahi pà maa si Hisus te, "Merakel ne minge etew se ed-inggaten te edlusud kayi te Edetuan te Eleteala, ugaid ne merelag se egkepemilì din."

Edlitahen perem si Hisus dut te Menge Peresiyu atag te Ked-insà dan Mekeatag te kebayad te

*Buwis**(Marcos 12:13-17; Lucas 20:20-26)*

¹⁵ Ketà ne mid-awà ke minge Peresiyu ne mid-upakat dan te edseligkaten dan te minge insà si Hisus.

¹⁶ Ne ruen en midsuhù dan diyà te ki Hisus ne minge edumdumaan dan wey minge sakup ni Hirudis. “Meyterù,” ke sikandan, “netuenan dey te edlalag ka te benar. Ne ibpenurù nu ke benar mekeatag te kiyug te Eleteala rut te minge etew. Ne kenà ka egkepeneheewit dut te lalag te minge etew su warà etew ne ebpelebiyen nu.

¹⁷ Kehiya nu kenami ke engkey se pegitungan nu kayi te id-insà dey kenikew. Maa ibpekerimpas kiyu ve dut te penduan tew embiya ebayad ki te buwis riyà te ratù tew diyà te inged ne Ruma, etawa kena?”

¹⁸ Ugaid ne netuenan ni Hisus ini se meraat ne netahù te itungan dan ne migkahi te, “Sikiyu ne uvag kun ne ruen id-insà niyu kedi! Ugaid ne iyan se ebaal kew rà te ralan te kegkelitag niyu kediey!

¹⁹ Peintenga a niyu kun te kureta ne ibayad te buwis!” Impekita ran kandin ke kureta,

²⁰ ne migkahi sikandin te, “Engkey ki paras wey ngaran kayi?”

²¹ “Paras wey ngaran dut te ratù tew kayi te inged ne Ruma,” ke sikandan.

“Embiya iring ketà,” ke si Hisus, “ne ivehey niyu diyà te datù ayan se buwis kandin, ne ivehey niyu riyà te Eleteala ke endei rema ke kandin.”

²² Nerineg dan ini se migkahi ni Hisus ne ingkeinuinu ran nevenar, ne mid-ewaan dan en sikandin.

Mid-insà ke menge Sadyusiyu ki Hisus Mekeatag te Kegkevanew te Menge Minatey (Marcos 12:18-27; Lucas 20:27-40)

²³ Arà ne hewii ne ruen menge Sadyusiyu ne mibpengkayi te ki Hisus. (Ini se menge Sadyusiyu ke menge etew ne warà mebperetiyaya te egkevanew pà te Eleteala ke menge minatey.)

²⁴ “Meyterù,” ke sikandan, “impenurù dengan ni Moises te, ‘Embiya ruen meama ne ebpatay ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.’

²⁵ Su ruen nekeubpà kayi,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak. Ne mibpemalu en dut te nesikupu rin arà se ipag dan.

²⁶ Ugaid ne minatey red dema te warà dan med-anak. Ne engketà ded dema ke iketelu. Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak.

²⁷ Netaman ne minatey en ini se meritan.

²⁸ Ne ini ve se id-insà day keykew,” ke se menge Sadyusiyu. “Embiya benar ne egkevanew red te Eleteala ke menge minatey keuremà, ne entei ve rapit kandan se tehiesawa ketà te meritan? Su

langun dan te pitu ne telteleari ne nekedtundug se nekeesawa kandin.”

²⁹ Ne migkahi si Hisus kandan te, “Warà en iya ebpekesuhat ne itungan niyu! Su warà niyu mesebuti ke impesurat ne Lalag te Eleteala, ne warà niyu mesebuti ke rekela ne gehem din.

³⁰ Su ketà te hewii ne kegkevanew te minge minatey, ne warà en kebpees-eseweey su iyan dan en egkeiringan ke minge suluhuen te Eleteala riyà te langit ne kenà ebpees-eseweey.

³¹ Ne ini se id-insà niyu mekeatag te kegkevanew te minge minatey, ne maa warà niyu ves mevasa ke migkahi te Eleteala keniyu kayi te impesurat din? Su migkahi te,

³² ‘Siaken ke Eleteala ne ebpengerapen ni Abraham, ni Isaac, wey si Jacob.’ Tembù be netuenan tew,” ke si Hisus, “te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ke biviyag, kenà ke minatey.”

³³ Guna su nerineg ini dut te minge etew, ne negeyip dan nevenar dut te kebpenurù din.

Duen Meyterù te Penduan ne Edlitag Perem ki Hisus atag te Insà Din ke Engkey se Pinekemepurù ne Penduan

(Marcos 12:28-34; Lucas 10:25-28)

³⁴ Guna su nerineg kayi te minge Peresiyu te nekepeeneng-eneng ke minge Sadyusiyu dut te penurù ni Hisus, ne mibpengkayi ran te ki Hisus.

³⁵ Senge etew kandan se edlitag ki Hisus dut te minge insà din su metmetau sikandin ne meysterù te penduan dan.

36 “Meyterù,” ke sikandin, “engkey ma rut te penduan tew se pinekemepurù te langun?”

37 Ne midtavak si Hisus te, “ ‘Tamin nu ke hinawa nu te edlimù te Kerenan ne Eleteala nu, ne iamin nu ke baher nu wey ke itungan nu te ed-ulaula ke engkey se ebpekesuhat te hinawa rin.’

38 Ini ke pinekemepurù ne penduan ne egke-una rut te langun.

39 Ne ini ke ikeruwa ne pinekemepurù dut te langun: ‘Kelimù nu ke ruma nu iring te kegelimù nu te hinawa nu.’

40 Ne langun te penduan ne intelaan ni Moises kenitew wey ke impenurù dut te mibpelambas te Lalag te Eleteala rengan ne kayi ebpuun se deruwa ini.”

Impesabut ni Hisus te Sikandin ke Impasad te Eleteala ne Ebayàbayà te Langun

(Marcos 12:35-37; Lucas 20:41-44)

41 Ketà te kinekevurun te minge Peresiyu ne mid-insaan dan ni Hisus te,

42 “Menu, engkey se pegitungan niyu mekeatag dut te Mesiyas, ini se Impasad te Eleteala rengan ne Ebperetuen te langun? Engkey ki inenakan sikandin?”

“Inenakan sikandin dut te ratù tew rengan ne si David,” ke sikandan.

43 “Benar,” ke si Hisus, “ne geina te iring ketà ne meambe ke migkahi si David te arà se Impasad te Eleteala ne Ebperetuen te langun ne Kerenan din? Su midlumunan te Kedesenan ne Ebpetuntul te Menusiyà si David ne impesurat din te,

44 “ ‘Migkahi ke Eleteala ketà te Kerenan ku te, Kayi ka pinuu te rapit te egkekewanan ku taman te ebpenggiekan ku ke menge kunterà nu.’

45 Na,” ke si Hisus, “embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne maa egkepakey ve ne kayi red ini te inenakan din?”

46 Ne warà etew ne ebpekekahi ketà. Ne inggenat dè be ketà ne warà en ebpeketikà ne ed-insà ki Hisus.

23

Duen Imbaag ni Hisus Mekeatag te Ed-ul-ulaan te Menge Meyterù te Penduan wey ke Menge Peresiyu

(Marcos 12:38-39; Lucas 11:43, 46; 20:45-46)

¹ Ne migkehiyan ni Hisus ke denda ne etew wey ke menge edumdumaan din te,

² “Ini se menge meysterù te penduan wey ke menge Peresiyu te ruen ketenged din te edseysey rut te Penduan ne intelaan ki Moises.

³ Iyan iya se medtuman kew te langun ne penurù dan, ugaid ne kenà kew ed-iring dut te ed-ul-ulaan dan su kenà dan edtumanen ke ibpenurù dan te menge etew.

⁴ Ebpekevahatan dan ke menge etew te penduan ne kenà dan egkegaga te edtuman, ugaid ne warà misan deisek dà ne idtavang dan te edtuman ketà.

⁵ “Langun ne ed-ul-ulaan dan ne iyan dan ked-ulaula ne ibpereyùdeyù dan dut te menge etew. Intengi niyu ma ke derekelà ne imbevengkeleng

dan wey ke imbagkes te velad dan ne midtehuan te insurat ne Lalag te Eleteala! Ne engketà ded ayan se melayat ne peyapey te belegkas dan!

⁶ Embiya edtelavuk dan te kevrunan ne riyà dan ebpinuu te insivey ne meupiya ne ebpepinuuwan te egkeedatan, ne embiya riyà dan en te valey ne ebppedgian te penduan dan ne ebpemili dan te meupiya ne ebpepinuuwan diyà te sineruwan.

⁷ Iyan dan kiyug ne ed-edatan dan te menge etew riyà te kevrunan, ne kiyug dan dema ne ed-ingaranan te 'Meyterù.'

⁸ "Ugaid ne sikiyu ve ne kenà kew peingaran te 'Meyterù,' su langun niyu ne iring te ebpenusuled su seveka rà ke Meyterù.

⁹ Liyu rà te tuney ne amey niyu, ne kenà kew ed-amey te piya entei kayi te ampew te dunya su seveka rà ke amey niyu ne Eleteala riyà te langit.

¹⁰ Ne kenà kew rema peingaran te Pengulu su seveka rà ke pengulu niyu ne arà dà se Mesiyas ke Impasad te Eleteala ne Ebperetuen te langun.

¹¹ Ne embiya ruen seveka keniyu ne egkiyug ne ebmepurù ne iyan iya se mebpeembavà te hinawa rin wey ebpevayàbayà dut te langun.

¹² Su piya engkey ne etew ne ebpepurùpurù te hinawa rin ne ibpevavà te Eleteala, ugaid ne piya engkey ne etew ne mepeembavà te hinawa rin ne ibpepurù sikandin te Eleteala."

*Mid-isuhat ni Hisus te Kewagib ke Menge Meyterù te Penduan wey Menge Peresiyu
(Marcos 12:40; Lucas 11:39-42, 52; 20:47)*

13 Ne migkahi pà maa si Hisus te, “Mekeyruwiru kew ne menge meyterù te Penduan wey menge Peresiyu su edusaan kew dut te Eleteala! Uvag en kun ne eduma kew te kiyug te Eleteala! Ugaid ne ebelevahan niyu ke ibayà te menge etew ne ebpesakup perem te Eleteala. Sikiyu ne kenà kew ebpesakup dut te Kedatù te Eleteala, ne ed-alang kew pà maa dut te menge etew ne edlusud perem. [

14 Mekeyruwiru kew ne menge meyterù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Ne ebpeedleyedley kew te kebpengeningeni niyu te Eleteala su uvag kun se rekela se sarig niyu te Eleteala. Ugaid ne kayi te ed-ul-ulaan niyu ne misan iring te edtavang kew te menge valu ne meritan, ne iyan niyu ma kedtavang su apey niyu meahew ke kearen dan.]

15 “Mekeyruwiru kew ne menge meyterù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Medmeriyù se ed-ipanewan niyu te tanà wey edlayag kew te rahat su ed-eneb te penurù niyu apey ruen ebpekeperumaruma keniyu. Ne embiya ruen ebpekeperumaruma keniyu, ne nasi en be maa ne warà pelahuy rin te ebpekependiyà te apuy nerakà dut te sikiyu.

16 “Mekeyruwiru kew! Su iring kew te pisek ne edtuyuk te pisek ded dema! Mibpenurù kew te, ‘Embiya ruen etew ne edsesapà te edreviten din ke Nekebpuru ne Valey te Eleteala, ne misan kenà din edtumanen ne warà kereetayan din. Ugaid ne embiya edsesapà te edreviten din ke

bulawan ketà te lusud te Nekebpuru ne Valey te Eleteala, ne iyan iya se medtuman sikandin te ini se insapà din.'

¹⁷ Warà itungan niyu su kayi te ini se ed-ul-ulaan niyu ne iring kew te pisek! Meambe, endei rapat se mevahat ne idsesapà niyu, ke bulawan etawa ke Nekebpuru ne Valey te Eleteala? Su ini se Nekebpuru ne Valey te Eleteala ne berekat, ne nevaluy ne berekat ke bulawan su kayi intahù.

¹⁸ Ne impenurù niyu rema te, 'Embiya ruen etew ne edsesapà te edreviten din ke edenaan te ibpelengesa te Eleteala, ne misan kenà din edtumanen ne warà kereetayan din. Ugaid ne embiya ruen etew ne edsesapà te edreviten din ke indenà ne ibpelengesa, ne iyan iya se medtuman sikandin te ini se insapà din.'

¹⁹ Benar iya ne iring kew te pisek! Meambe, endei rapat se mevahat ne idsesapà niyu, ke indenà ne ibpelengesa etawa ke edenaan te ibpelengesa? Su ini se edenaan se ibpelengesa ne berekat, ne nevaluy ne berekat ke langun ne idenà ne ibpelengesa ketà.

²⁰ Tembù be embiya ruen etew ne edsesapà te edreviten ke edenaan te ibpelengesa, ne ebpeker-agkes en ke langun ne indenà ne ibpelengesa ketà.

²¹ Engketà ded dema ke ruen etew ne edsesapà ne edreviten ke Nekebpuru ne Valey te Eleteala, kenà ke Nekebpuru rà ne Valey te Eleteala ke idsesapà din su elin dema ke Eleteala ne ed-ubpà ketà.

²² Ne engketà ded dema ke ruen etew ne edsesapà ne edreviten din ke langit, ne kenà ke

langit dà ke idsapà din su elin dema ke Eleteala su ketà ebpinuu se edatù te langun.

²³ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag kun ne eduma kew te kiyug te Eleteala! Ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà niyu tumana ke didis en dut te Penduan. Su kenà metidtu ke ulaula niyu ne kenà kew egkeyru te menge ruma niyu, ne kenà kew egkeserihan. Benar ne ebehey kew te Eleteala te kandin ne umun, ugaid ne warà niyu ma tumana ke didis en dut te Penduan.

²⁴ Ne iring kew te pisek ne edtuyuk te pisek ded dema! Embiya idsempità ta ne iring te id-awà niyu ke rengit diyà te ed-inumen niyu kayi te betasan niyu te edtuman te kenà utew benar ne penurù te Penduan. Ugaid ne iring te ed-iveleng kew te dekelà ne binatang ne kemilu kayi te warà niyu kedtuman dut te didis en te Penduan.

²⁵ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Su iring kew te menge basu wey pelatu ne midlinisan diyà te luwal, ugaid ne kayi te diralem niyu ne meredsik su iyan niyu ed-ul-ulaan ne edlimbung kew te menge ruma niyu ne ed-ahew kew te menge kearen dan.

²⁶ Sikiyu ne menge Peresiyu, benar iya ne iring kew te pisek! Unai niyu te edlinis ini se meredsik ne kenà egkekita ne kayi te diralem niyu su apey ebmetidtu ini se ed-ul-ulaan niyu!

27 “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Iring kew ma te simintù ne edtehuan te lungun ne mibintulaan te meputì su apey meupiya ne edtengtengan, ugaid ne diyà te lusud ne nepenù te menge tulan wey sahu.

28 Ne iring kew ve ketà! Su iyan niyu ibpekita te menge etew ne metidtu kew, ugaid ne diyà te diralem niyu ne nepenù kew te meredsik su uvag en kun ne eduma kew te kiyug te Eleteala.”

Migkehiyen ni Hisus ke menge Meyterù te Penduan wey ke Menge Peresiyu te Edusaan dan te Eleteala atag dut te Meraat ne Ed-ul-ulaan Dan (Lucas 11:47-51)

29 “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te Eleteala! Su mibpengumbayaan niyu ke simintù ne edtehuan te lungun dut te menge mibpelambas te Lalag te Eleteala rengan, ne mideyreyanan niyu ke menge pantyun dut te menge metidtu.

30 Ugaid ne egkahi kew te, ‘Embiya ketà key en te gewii rut te keep-epuan dey, ne kenà dey ed-ul-ulaan ke mid-ulaula ran ne kenà dey ed-imetayan ke menge mibpelambas te Lalag te Eleteala.’

31 Ew, na tembù pà nekahi niyu arà su telimà niyu te sikiyu iya ke menge inenakan dut te mid-imatey ketà te menge mibpelambas te Lalag te Eleteala rengan!

³² Na kua niyu en be, imesara ke meraat ne ulaula te minge keep-epuan niyu!

³³ “Iring kew te pispis te uled! Ebmenu kew te ed-elihu te kedusa keniyu diyà te apuy nerakà?”

³⁴ Ne ebpektuenan ku keniyu te ruen etew ne edsuhuen ku kayi te keniyu ne ebpelambas te Lalag te Eleteala, minge etew ne dekelà se netuenan din mekeatag te Eleteala, wey minge etew ne ebpenurù. Ugaid ne ruen ed-imetayan niyu, ne ruen idlansang niyu riyà te kayu, ne ebpembedasan niyu ke ruma diyà te lusud te baley ne ebpengedian te penduan niyu, wey ke ruma ne ebpenuntulen niyu riyà te minge inged su ebpemekeiran niyu.

³⁵ Tembù be edusaan kew te Eleteala atag dut te kineimatey te langun ne minge etew ne kenà egkevenaran igenat dut te kineimatey ki Abel taman en dut te kineimatey ki Zacarias ke anak ni Berekiyas ne mid-imetayan te keep-epuan niyu diyà te elet te edenaan te ibpelengesa te Eleteala wey ke mibpeheletan diyà te Nekebpuru ne Valey te Eleteala.

³⁶ Sebenarvenar ne ini se egkehiyen ku keniyu,” ke si Hisus, “sikiyu ne minge etew guntaan, ne igkeragkes kew te Eleteala te kedusa rin dut te kineingimatey ran dengan.”

*Bayuk ni Hisus te Kegkerurunù din dut te Menge Mehinged te Hirusalim
(Lucas 13:34-35)*

³⁷ “Ey, igkerurunù ku sikiyu ne minge mehinged te Hirusalim!
Su sikiyu ke mibpengimatey

te minge etew ne mibpelambas te Lalag te
 Eleteala,
 wey mibpenrumbag niyu te batu
 ke minge etew ne midsuhù te Eleteala
 kenian te keniyu!

Kenà kepipira ku rà perem eburuna sikiyu
 su edtugenuren ku sikiyu
 ebpekeiring te upa ne edlekup te anak din,
 ugaid ne kenà kew ebpelekup kediey!

38 Na guntaan ne ed-ewaan en te Eleteala ke
 inged niyu.

39 Ne ini se igkahi ku keniyu,
 igenat guntaani ne kenà a niyu en egkekita
 taman te egkeuma arà se hewii
 ne ebpekekahi kew te, 'Edeyuen tew ini se
 nekeuma,
 ne midsuhù te Eleteala ke Kerenan tew.' "

24

*Migkahi ni Hisus ke Kegkerundus Dut te
 Nekebpuru ne Valey te Eleteala diyà te Hirusalim
 (Marcos 13:1-2; Lucas 21:5-6)*

¹ Guna su mid-awà en si Hisus ketà te
 Nekebpuru ne Valey te Eleteala ne mid-uwey
 ke minge edumdumaan din ne midterù dan
 ke minge pengawid dut te melmeluag ne
 Nekebpuru ne Valey te Eleteala.

² "Uya," ke si Hisus, "intengi niyu ma ini se
 rekelà ne valey ne batu ke pengengawid din. Su
 idtarem ku keniyu te ruen hewii ne egkeuma
 ne ini se egkekita niyu ne egkerundus ne warà
 seveka rà ne vatu ne egkesamà su egkevurahey
 an langun."

*Migkahi ni Hisus ke Keresayan wey Kebpeke-
sakit ne Ebpekeuma kayi te Menge Etew
(Marcos 13:3-13; Lucas 21:7-19)*

³ Guna su riyan dan en te buvungan ne ed-ingaranan te Ulivuwen ne mibpinuu si Hisus, ne mid-uvey kandin ke menge edumdumaan din te sikandan dà. “Ikahi nu kenami,” ke sikandan, “ke keenu egketuman ini se migkahi nu ne kegkerundus dut te Nekebpuru ne Valey te Eleteala. Ne engkey se idtuus dey su apey rey egketueni ke mehaan en egkepupus ini se kelibutan ne egkeuma arà ke hewii ne edlived ka kayi te ampew te dunya?”

⁴ Ne migkahi si Hisus te, “Uram kew su apey kew kenà meekali dut te menge etew ne metau ne edliyuk.

⁵ Su merakel se edlepew ne engkungkun ne siaken en ne egkahi ran te, ‘Siaken en ini ke Impasad te Eleteala ne Edatù te langun ne menge etew!’ Ne ketà,” ke si Hisus, “ne merakel ne menge etew se ebpekeperetiyaya te tarù dan.

⁶ Ne egkerineg niyu se ebpevunbunuey diyà te meriyù merani, ugaid ne kenà kew meandek. Su ini pà iya se egkeuna ne egked-ulaula, ugaid ne warà pà meuma ke hewii te kebpuypusa kayi te kelibutan.

⁷ Ebpemekebunuey pà ke idsenge inged ne engketà ded dema ke idsenge retuan. Ne egetab se bitil wey edlinug te mevaher te piya endei en.

⁸ Ugaid ne rudsuan dà ini dut te keresayan ne egeramen niyu, iring dut te belilit te meritan ne ed-anak.

⁹ “Egkeepesan kew te langun ne menusiya su atag te keduma niyu kediey. Ebpenigkemen kew ne ibpalad kew riyà te ruen ketengdanen din ne edresayen kew nikandan wey ruen pà ebpengimetayan.

¹⁰ Ketà te arà ne hewii ne merakel se edlekà te kebperetiyaya ran kediey, ne ebpemeked-epesey ran wey ebpeul-uluhey ran diyà te ruen ketengdanen din.

¹¹ Ne merakel se edlepew ne engkungkun ne ebpelambas te Lalag te Eleteala, ne merakel se menge etew ne ebpekepehimbenar dut te tarù dan.

¹² Ne tehaad te ed-iseg ke meraat ne ulaula kayi te ampew te dunya, ne edlugkà ke limù dut te merakel ne etew.

¹³ Ugaid ke etew ne misan egkerasey en sikandin ne kenà edsuwey dut te keduma rin kediey taman te ini pà sikandin te ampew te dunya, ne ebpekehaked te umur ne warà edtemanan din.

¹⁴ Ne iyan pà ibpeuna ibpesabut kayi te tivuuk ne kelibutan ini se Meupiya ne Tudtul mekeatag te Kekatù te Eleteala dut te menge etew ne arà pà ne egkeuma ke hewii te kebpuusa kayi te kelibutan.”

Imbaag ni Hisus Mekeatag te Kebpekeuma Dut te Ebpekekaid ne Ebpekelusud Diyà te Nekebpuru ne Valey te Eleteala su Edsevuèn Din ke Ed-edatan (Marcos 13:14-23; Lucas 21:20-24)

¹⁵ Ne migkahi pà maa si Hisus te, “Ruen migkahi ni Daniel rengan, senge etew ne mibpelambas te Lalag te Eleteala, te ruen

ebpekeuma ne 'Ebpekekaid' ne ebpekelusud diyà te Nekebpuru ne Valey te Eletealà su edse-vuen din ke ed-edatan. (Sikiyu ne ebpekevasa kayi te insurat din ne pegpegitunga niyu ke meana rin.)

¹⁶ Ketà te egkeuma arà ne hewii ne ke menge etew ne riyà te pruvinsiya te Hudiya ne mebpelahuy ran diyà te buvungan.

¹⁷ Ne ke etew ne riyà te ruwangen te valey rin ne kenà din en lilingaya ke keleglahan din su mebpelahuy en sikandin.

¹⁸ Ne ke etew ne riyà te pengengewiran din, ne kenè en med-uli se egkuwa te kumbalà din.

¹⁹ Ne egkeyruwan ke menge meritan ne mehingey te arà ne hewii wey ke menge meritan ne edseruru.

²⁰ Ipengeningeni niyu te Eleteala te kenà ini med-ulaula te hewii te kedrengreng etawa Hewii te Id-imeley!

²¹ Su ini se kemeresayan ne ebpekeuma ne warà repeng din igenat dà dut te aney en lim-baha ini se kelibutan, ne kenà en egkerepengan te misan keenu.

²² Ugaid ne sabap dut te raat te nanam te Eleteala ne migkurangan din en ke menge hewii rut te kemeresayan su embiya warà, ne warà egkesamà ne biviyag. Uya, su geina ne rekelà te limù din dut te menge etew ne mibpemili din, ne migkurangan din ke hewii rut te kemeresayan.

²³ "Su ketà ne hewii embiya ruen egkahi te, 'Ini en ke Impasad te Eleteala ne Ebperetuen te langun ne menge etew!' etawa ruen egkahi te, 'Ayan en sikandin!' ne kenà kew peretiyaya su

apey kew kenà egkelimbungi.

²⁴ Su ruen ebpenlepew ne minge etew ne engkungkun te sikandan ke Impasad te Eleteala ne Ebperetuen etawa sikandan ke ebpelambas te Lalag te Eleteala. Ne ebpekita ran te mekegeyip ne ed-ul-ulaan su apey ran perem meekali ini se minge etew ne mibpemilì te Eleteala.

²⁵ Tembù be idtarem ku keniyu ini,” ke si Hisus, “su apey niyu meingati te kenà pà ini egked-ulaula.

²⁶ “Su embiya ruen egkahi keniyu te, ‘Diyan en te tanà ne kenà egkeubpaan te minge etew ini se Impasad te Eleteala ne Ebperetuen,’ ne kenà kew peretiyaya ne kenà kew pendiyà. Etawa ruen egkahi te, ‘Kayi en sikandin ed-eles-eles su warà pà mibpepayag,’ ne kenà kew peretiyaya.

²⁷ Su ketà te kedlived te Impeanak te Menusiyà kayi te ampew te dunya ne iring te kehaan din te kilat ne ebpeketayew te langun ne linengkevan egenat te edsilaan taman te edsenlepan.

²⁸ “Su iring dut te besaanen ne egkahi te, ‘Piya endei se ruen minatey rin, ne ketà eburun ke minge uwak.’ ”

Tuus te Mehaan en ke Kedlived dut te Impeanak te Menusiyà kayi te Ampew te Dunya (Marcos 13:24-27; Lucas 21:25-28)

²⁹ “Ne ketà ke egkeipus en arà ne minge hewii te kemeresayan,” ke si Hisus,
 “ ‘Ne ebmerusirem ke andew,
 ne kenà en edsilà ke vulan,
 ne ebpengeulug ke minge bituen genat te langit,

ne egkeparin en dut te netehuan din ke edtenu-
ran ne menge bituen.'

³⁰ "Ne ketà ne edlepew riyà te langit ke tuus te edlived en ke Impeanak te Menusiyà. Ne egkekita te langun ne menusiyà te ebpekeuma en sikandin ne egkerumaan te sehulapun, ne egkekita rema ke gehem din wey raman din ne ed-anlag, ne ketà ne ebpeninehew ke menge etew.

³¹ Ne ibperahing en ke budyung ne edsuhuen din ke menge suluhuen din diyà te epat ne pediyulu te dunya su apey ran egkevurun ke langun ne mibpemilì te Eleteala igenat te pehiliran taman te binunsuran."

Ke Sempità ni Hisus Mekeatag te Kayu ne Igira ne In-upama Rin te Tuus te Mehaan en te Kedlived Dut te Impeanak te Menusiyà

(Marcos 13:28-31; Lucas 21:29-33)

³² "Keniyen niyu rè ma te kayu ne igira," ke si Hisus, "su ruen ibpenurù din keyta. Embiya nekepasad en te edrawrew ne ed-umbus en wey ebpenlumbey, ne tuus te ed-andew en.

³³ Ne engketà ded dema embiya egkekita niyu en se netuman en ke langun ne tuus ne impenurù ku keniyu, ne egketueanan niyu te mehaan en se kedlived dut te Impeanak te Menusiyà.

³⁴ Tentenuri niyu ini se egkehiyen ku keniyu su ruen pà kayi te keniyu guntaani ebpekesaut pà ketà te kegketuman din ini.

³⁵ Su egkeawà ini se langit wey tanà ugaid ne ini se migkahi ku ne kenà bulug ebperis."

Warà Metueni ke Hewii te Kedlived dut te Impeanak te Menusiyà Kayi te Ampew te Dunya (Marcos 13:32-37; Lucas 17:26-30, 34-36)

³⁶ “Ugaid ne ini se idtarem ku keniyu,” ke si Hisus, “warà netau te hewii etawa endei egketahù ke andew ke kedlived kayi ke Impeanak te Menusiyà su ke Amey ku rà ne Eleteala. Misan ke suluhuen te Eleteala diyà te langit wey misan dema siaken ke Anak te Eleteala ne warà netau ke keenu se edlived din.

³⁷ Su ketà te kedlived dut te Impeanak te Menusiyà kayi te ampew te dunya, ne ebpekeiring ke menge ed-ul-ulaan te menge etew rut te ed-ul-ulaan te menge etew rengan te gewii pà ni Noa.

³⁸ Su rengan te warà pà ke dalem, ne warà sanggel dan se ebpegevevurun su egkaankaan dan ne ebpeinginum wey ebpees-eseweey taman te arà en ne hewii te midlusud en ensi Noa ketà te rekela ne avang ne ed-ingaranan te arka.

³⁹ Ugaid ke menge etew ne warà utew mekesabut ke engkey se egketemanan dan taman te netekew en ke dalem ne neherà dan langun. Ne iring din ded be ketà ke edlived ke Impeanak te Menusiyà kayi te ampew te dunya.

⁴⁰ Su ketà ne hewii ke ruen deruwa ne meama ne ebpeemungey diyà te pengengewiran, ebpekeruma kedì ke senge etew ne egketahak ke seveka.

⁴¹ Engketà ded dema ke ruen deruwa ne meritan ne ebpeemungey te egaling, ne ebpekeruma kedì se senge etew ne egketahak ke seveka.

⁴² “Uram kew ve ne ebpenehana kew en, su warà niyu metueni ke hewii ne edlived ke

Kerenan niyu.

⁴³ Ugaid ne ini se idtahù niyu te hinawa,” ke si Hisus, “embiya ebpekeingat ke kemuney te valey ke keenu ebpekeuma ke tekawen, ne ebpenehana neraan sikandin su apey kenà ebpekelusud te valey rin ke ebpenakew.

⁴⁴ Ne engketà kew red dema, penehena kew neraan su ebpekeuma ke Impeanak te Menusiyà dut te endei se netehuan te andew ne kenà niyu ebpenerengen.”

Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù Kandin wey ke Kenà Meperumaruma (Lucas 12:41-48)

⁴⁵ Ne ketà ne mibpenempità si Hisus te, “Ke edsugsuhuen ne egkedserihan wey metmetau su edtuman dut te edsuhù kandin, ne ebpekemalen en dut te ruma ne edsugsuhuen. Ne sikandin se ebehey te egkekaan dut te ruma ne edsugsuhuen ketà te kegkaan dan.

⁴⁶ Meupiya nevenar se hinawa dut te edsugsuhuen ne ebpekemalen ke ebpekeuma ke ebpengemuney kandin ne iyan din egkekita se midtuman din ke langun ne insarig kandin.

⁴⁷ Idtarem ku keniyu,” ke si Hisus, “te ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin.

⁴⁸ Ugaid ne embiya kenà meupiya ne edsugsuhuen su warà te hinawa rin ke insuhù kandin

ne kehingginawa rin te, ‘A kalu ke meuhet pà ebpekeuma ke ebpengemuney kenami,’

⁴⁹ ne ketà ne mibpemedasan din en ke ruma ne edsugsuhuen ne migkaankaan dè be sikandin wey ebpinginum elin dut te menge hubug.

⁵⁰ Ne ketà ne netekew mekeuma ini se ebpengemuney kandin te hewii ne warà din penerenga su warà din metueni ke endei egketahù ke andew te kedlived din.

⁵¹ Ne ebpekepesangan sikandin te edrasey dut te ebpengemuney kandin su idragkes sikandin dut te menge meraat ne etew ne engkungkun ne eduma te kiyug te Eleteala. Ne ketà ne ebpekependerawit wey ebpekengingitel.”

25

Ke Sempità ni Hisus te Sepulù ne Menge Raha ne In-upama rin dut te Menge Eteu ne Egkiyug ne Eduma te Edetuan te Eleteala

¹ Ne mibpenempità pà maa si Hisus te, “Ketà te edlived ku kayi te ampew te dunya, ne ke menge etew ne egkiyug ne ebpekiduma dut te menge etew ne Edetuan te Eleteala ne iring kayi. Ruen sepulù ne etew ne menge raha ne ebpengemkem te sulù dan su edtelevuken dan ini se kenakan ne ibpengesawa.

² Lelima kandan se lengab wey lelima red maa se bereitungan ebpenehana.

³ Ini se lelima ne lengab ne migkuwa ran te sulù, ugaid ne warà lana ne mid-ewit dan ke egkeibperan ke sulù dan.

⁴ Ugaid ke lelima ne bereitungan ne mid-ewit dan mulà te edtehuan te lana.

5 Ne nelangan se kebpekeuma rut te kenakan ne ibpengesawa, ne edtureturen en ke minge raha ne edtahad ne nekelipereng dan en.

6 “Ne ketà te edluuk en ke kerukileman ne ruen migkerag te, ‘Ini en ke kenakan ne ibpengesawa! Pengkayi kew en su sinuhunga niyu en sikandin!’

7 “Nekehimerat ini se sepulù ne minge raha ne mibpengumbayaan dan ke sulù dan.

8 Na, neibperan en te lana ini se sulù dut te lelima ne lengab ne migkahi ran en diyà te minge ruma ran te, ‘Behayi key pà te lana su egkeevukan en ini se sulù dey.’

9 “ ‘Kenà egkepakey,’ ke se bereitungan ne minge raha, ‘su kenà ebpekegaga kenitew ini. Pendiya kew te tindà ne pemasa kew.’

10 “Ketà ne mibpendiyan en te tindà ke lelima ne minge lengab. Ne lius dan dà ne nekeuma en ke kenakan ne ibpengesawa. Tembù be ke lelima rà ne etew ke nekepenehana ne nekeruma dut te kenakan diyà te baley ne egkewingan. Guna su nekepemenayik dan en ne mibpintuan en ke gumawan.

11 “Ne iseg-iseg ne nekeuma en ini se lelima ne minge raha ne lengab ne mibpenehetiat dan en se egkahi te, ‘E, Mama, pelusura key.’

12 “Ugaid ne migkahi ke kenakan ne ibpengesawa te, ‘Kenà, su kenà ku egketuenan sikiyu.’

13 “Iring kayi,” ke si Hisus, “ke ed-ul-ulaan te minge etew ketà te kedlived ku kayi, tembù be layun kew pempenehana su warà niyu metueni ke hewii etawa endei egketahù ke andew te kebpekeuma ku.”

*Ke Sempità ni Hisus Mekeatag te Menge Edsugsuhuen ne midserihan te kureta su Ebpeisehen ne In-upama rin dut te Menge Etew ne Egkiyug ne Eduma te Edetuan te Eleteala
(Lucas 19:11-27)*

¹⁴ Ne mibpenempità pà maa si Hisus te, “Ini se kedlived ku kayi te ampew te dunya ne ebpekeiring te senge etew ne mibpendiyà te meriyù ne inged. Ne ketà te warà pà mekehenat ne midtawag din ke munge edsugsuhuen din ne insarig din kandan ke kearen din.

¹⁵ Uman senge etew kandan ne mibehayan din te endei se taman ne egkegaga rin. Kayi te senge etew ne dekelà se egkegaga rin, ne mibehayan din te lelima nengivu. Kayi te ruma ne mibehayan din te deruwa nengivu su arà se egkegaga rin. Ne ketà te iketelu ne mibehayan din te sengivu su arà dema ke egkegaga rin. Ne ketà ne mid-ipanew en sikandin.

¹⁶ Ini se edsugsuhuen ne nekekuwa te lelima nengivu, ne midahewrahew en migkuwa te dehangen din ne netaman ne nekeuntung en sikandin te lelima pà nengivu.

¹⁷ Ne engketà ded dema ke edsugsuhuen ne nekekuwa te deruwa nengivu, su nekeuntung sikandin te deruwa pà nengivu.

¹⁸ Ugaid ne ini se edsugsuhuen ne migkuwa te sengivu, ne migkekalut dà ne inleveng din ke kureta ne insarig kandin.

¹⁹ “Guna su neuhet en ne mid-ulì en ke ebpengemuney kayi te munge edsugsuhuen. Ne midtawag din sikandan su ed-intengan din ini se insarig din kandan.

20 Nekeuma ini se edsugsuhuen ne midserihan te lelima nengivu ne migkahi te, 'Kerenan, ini en ke lelima nengivu ne insarig nu kedì, ne ruen pà ini lelima nengivu ne neuntung ku keniyen te kureta nu ne impemuunan ku te kedtitindàtindà ku.'

21 "Migkahi ini se ebpengemuney te, 'Ara be! Meupiya ka su mibpegelep ke ves su midtinid-tuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pà ke idsarig ku kenikew te rekelà pà. Pengkayi ka su apey ka ebpekeamung te kegkehalew ku!

22 "Ne midlusud en maa ke edsugsuhuen ne midserihan te deruwa nengivu ne migkahi te, 'Kerenan, ini en ke deruwa nengivu ne insarig nu kedì, ne ruen pà ini deruwa nengivu ne ne-untung ku keniyen te kureta nu ne impemuunan ku te kedtitindàtindà ku.'

23 "Migkahi ini se ebpengemuney te, 'Arà be! Meupiya ka su mibpegelep ke ves su midtinid-tuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pà ke idsarig ku kenikew te rekelà pà. Pengkayi ka su apey ka ebpekeamung te kegkahalew ku!'

24 "Ne midlusud en maa ke edsugsuhuen ne midserihan te sengivu ne migkahi te, 'Kerenan, warà ku ipemuunan ke kureta nu te kedtitindàtindà su netuenan ku te mepasang ka ne etew. Ebpepemulaan nu ke menge edsugsuhuen nu su apey ka ebpekekuwa kayi te

helevek dan. Ne ed-untung ka te kenà keykew ne helevek ke midtitindàtindà.

²⁵ Neandek a kenikew ne inleveng ku rà ini se kureta nu. Ini red ke kureta ne insarig nu kediey.'

²⁶ " 'Warà rantek nu ne pehulen ne edsugsuhuen!' ke se ebpengemuney. 'Netuenan nu ves te ebpepemulaan ku ke menge edsugsuhuen ku su apey a ebpekekuwa te helevek dan, ne ed-untung a te kenà kedì ne helevek te edtitindàtindà.

²⁷ Ne meambe ke warà nu intahù diyà te bangkù ini se kureta ne insarig ku kenikew su apey ketà te kedlived ku ne egketelimà ku ke kureta ku te ruen iseg din?'

²⁸ "Ne migkahi ke pengemuney kayi te ruma ne edsugsuhuen din te, 'Kua niyu arà se kureta ne kenian te kandin ne ivehey niyu ketà te edsugsuhuen ne mibpeiseg te sepulù nengivu ini se kureta rin.

²⁹ Su ke etew,' ke si Hisus, 'ne egkeserihan dut te insarig kandin, ne ed-umanan pà apey edsawadsawad pà ke kandin. Ugaid ke etew ne kenà egkeserihan, ne ed-ewien pà misan ke reisek ne insarig kandin.

³⁰ Ne ini se edsugsuhuen ne warà rantek din ne iantug niyu ipekeriyù diyà te merusirem, ne ketà ebpekependerawit wey ebpekengingitel.' "

Kedenà ni Hisus te Kukuman Dut Impeanak te Menusiyà ketà te Kedlived Din Kayi te Ampew te Dunya

³¹ "Ketà te edlived kayi te ampew te dunya," ke si Hisus, "ke Impeanak te Menusiyà ne edumaan

te langun ne minge suluhuen din, ne ebpinuu sikandin ketà te ebpinuuwan te punggus ne ratu su edatu te langun ne menusiya.

³² Ne eburunen din ke langun ne menusiya diya te etuvangan din, ne ketà ne ebpedshivayan din te deruwa ne puntuk ne ebpekeiring dut te tumetuganur ne ebpemilien din ke bilibili ne idsivey rin ke kambing.

³³ Ne ke minge etew ne ebpekeiring te bilibili su metidtu ne kayi rin idtahu te egkekewanan din, ne ke minge etew ne ebpekeiring te kambing ne kayi rin te egkehivang din.

³⁴ “Ne egkahi en ini se punggus ne ratu kayi te minge etew te egkekewanan din te, ‘Sikiyu ne mibehayan te keupianan dut te Eleteala ne Amey ku, ne lusud kew dut te Kedetuan te Eleteala ne impenehana keniyu igenat dut te kinelimbaha te kelibutan.

³⁵ Su ketà te nevitil a ne mibehayan a niyu te egkekaan, ne nemeraan a ne pineinum a niyu. Ne ketà te nekeuma a riyà te keniyu ne misan kenà a niyu egkekilala ne pinepemenayik a niyu.

³⁶ Ne ketà te warà belegkas ku, ne mibehayan a niyu te belegkas. Ne nekedaru a, ne midtuganur a nikiyu. Ne nevilanggù a, ne midlauy a nikiyu.’

³⁷ “Ne egkahi ini se minge metidtu kayi te egkekewanan te, ‘Kerenan, keenu ka nevitil ne pinekaan dey sikuna, etawa nemeraan ka ne pineinum dey sikuna?

³⁸ Keenu ka mibpengkayi te kenami ne misan warà dey mekilala sikuna ne pinepemenayik dey sikew? Ne keenu ka mewerai te belegkas ne mibehayan day sikuna?

39 Keenu ka medaru etawa nevilanggù ne midlauy rey sikuna?’

40 “Ne egkahi ke punggus ne ratù te, ‘Sebenarvenar ne ini se egkehiyen ku, ketà te mid-ulaula niyu ini diyà te misan engkey dut te kevevaan en ne eduma kedì ne iring te mid-ulaula niyu ini kayi te kediey!’

41 “Ne ketà ne egkehiyan din ke minge etew kayi te egkehiyang din te, ‘Sikiyu ne mibpenrewakan te Eleteala su nesuhaw kew te sakit te hinawa rin, awà kew kayi te kediey! Pendiya kew te apuy nerakà ne kenà egkeevukan ne impenehana ki Setanas ke datù te pekaid wey ke minge sakup din.

42 Su nevitil a ne warà a niyu behayi te egkekaan, ne nemeraan a ne warà a niyu peinuma.

43 Ne ketà te nekeuma a riyà te keniyu, ne warà a niyu pepemenayika. Ne warà belegkas ku, ne warà a niyu behayi. Nekedaru a, ne warà a niyu tugenura. Nevilanggù a, ne warà a niyu leuya.’

44 “Ne ketà ne egkahi ini se minge etew kayi te egkegivang te, ‘Kerenan, keenu ka nevitil etawa nemaaran, etawa nekeuma ka kayi te kenami, etawa warà velegkas nu, etawa nekedaru ka, etawa nevilanggù ka ne warà key medtavang keykew?’

45 “Ne egkahi ke punggus ne ratù te, ‘Sebenarvenar ne ini se egkehiyen ku keniyu, uman kew warà medtavang dut te kevevaan en ne eduma kedì ne iring te mid-ulaula niyu ini kayi te kediey!’

⁴⁶ “Tembù be,” ke si Hisus, “ini se minge etew ne ibpependiyà te apuy nerakà su edusaan te warà edtemanan din. Ne ini se minge metidtu ne ibpependiyà te surugà su ruen umur dan ne warà edtemanan din.”

26

Mibentaan ke minge Mepurù te Terebpelengesa wey ke minge Egkeunutan te Hudiyanen te Kedsigkem ki Hisus su Ebpeimetayan
(*Marcos 14:1-2; Lucas 22:1-2; Juan 11:45-53*)

¹ Guna su nekeipus si Hisus se ebpenurù ne migkehiyan din ke edumdumaan din te,

² “Netuenan niyu te deruwa rà ne hewii ne kegkeuma ke Pista ne edtenuran tew te Kedsehari te Suluhuen dut te minge apù tew rengan. Ne arà en ke kebpalad dut te Impeanak te Menusiyà diyà te minge etew ne ibpelansang en diyà te pinebelavag ne kayu.”

³ Ne arà dema ne hewii ne miburun ke minge mepurù te terebpelengesa wey ke minge pekilukesen te Hudiyanen diyà te turuhan ni Kayipas, ke pinekemepurù dut te langun ne terebpelengesa

⁴ su ebpemengà dan te ralan te kedsigkem dan ki Hisus te kenà egketuenan dut te minge etew su apey ran ebpeimetayi.

⁵ “Ugaid ne iyan be kayi se kenà ta ini ed-ullaan te ebpekeatuk dut te pista,” ke sikandan, “su kema ke egkekita rut te minge etew ne egkeepes dan keytew ne egkehuvut en ketà.”

*Mibperiyemutan en Neraan ke Lawa ni Hisus
te Kedleveng Kandin*

(Marcos 14:3-9; Juan 12:1-8)

⁶ Guna su riyà si Hisus te inged ne Bitanya ne riyà sikandin te valey ni Simon, senge etew ini ne kevuwaen muna pà te it-it ne neulian.

⁷ Gewii te egkaan si Hisus ne nekeuma en ini se meritan ne mid-ewit te pelanaan ne mibeelan te elibastru ne midtehuan te periyemut ne mepurù nevenar. Ne mid-uvey en kandin ne imbusbus din en ke periyemut kayi te ulu ni Hisus.

⁸ Nekita ini rut te edumdumaan din ne neepes dan. “Babeba! Meambe ke midereetan din dà ini se periyemut?” ke sikandan.

⁹ “Iyan tumù ne indahang din ini ne ruen dekelà ne kureta ne igkepemehey pà diyà te menge ayuayu.”

¹⁰ Nesehipà ni Hisus ke edlelahen dan ne migkehian din sikandan te, “Meambe ke edsewayan niyu sikandin? Su meupiya nevenar ini se mid-ulaula rin kediey.

¹¹ Su ke menge ayuayu ne egketevangan niyu su lelayun kew red ebpemekeduma, ugaid ne siaken ne kenà ad meuhet kayi te keniyu.

¹² Su iyan din kinevusbust te periyemut kayi te lawa ku ne ibpenehana te kedleveng kediey.

¹³ Sebenarvenar ne ini se egkehien ku keniyu,” ke si Hisus, “te misan endei kayi te ampew te dunya ibpesabut ini se Meupiya ne Tuđtul mekeatag kediey, ne egkepenudtul ded dema ini se mid-ulaula rin kediey ne kenà sikandin egkelipatan.”

Mibpendiyà si Hudas Iskeriyuti te Menge Mepurù te Terebpelengesa su Ebpekidsungkit ke Ebmemenuwen Din te Ed-ulug si Hisus

(Marcos 14:10-11; Lucas 22:3-6)

¹⁴ Ne senge etew rut te sepulù wey deruwa ne edumdumaan ni Hisus, si Hudas Iskeriyuti, se mibpendiyà te menge mepurù te terebpelengesa

¹⁵ ne migkahi te, “Pira se ibehey niyu kediey embiya ibpalad ku si Hisus diyà te keniyu?” Ne nesebutan dan en te tetelu nepulù ne pirak ne pelatà se imbehey ran en ki Hudas.

¹⁶ In-awà dè be ketà ne ebpemengaan en ni Hudas te ralan te kegkeulug din ki Hisus su apey ran mesigkem en.

Mibpekidseveka te Edlavung si Hisus wey ke Menge Edumdumaan Din te Kedlavung te Pista te Kedtanuri ran te Kedsehari te Suluhuen te Eleteala dut te Menge apù dan

(Marcos 14:12-21; Lucas 22:7-13; Juan 13:21-30)

¹⁷ Ne ketà te egkeuna ne andew te Pista te menge Hudiyanen te Egkaan te Pan ne Warà Insawug ne Ibpelevag ne mid-uvey ki Hisus ke menge edumdumaan din se egkahi te, “Endei rey ve ini ebpegetura se idlavung te Pista te kedtanud tew te Kedsehari te Suluhuen dut te menge apù tew rengen?”

¹⁸ Ne migkahi si Hisus te, “Pendiyà kew te inged ketà te senge etew ne meama ne kehiya niyu kandin te, ‘Kiyug te meyterù tew te ini se baley nu ke edlevungan din wey ke menge edumdumaan din te ini se Pista su mehaan en ed-awà kayi te kelibutan.’ ”

¹⁹ Ne midtuman en dut te menge edumdumaan ni Hisus ke migkahi rin, ne mibpegatur dan en te idlavung dan te Pista te Kedsehari te Suluhuen.

²⁰ Guna su merukilem en ne nekeuma en ensi Hisus ne mibpinuu en sikandin wey ke menge edumdumaan din su egkaan dan.

²¹ Ne gewii ran te egkaan ne migkahi si Hisus te, “Benar ini se egkehiyen ku keniyu, ruen senge etew kayi te keniyu se ed-ulug kediey.”

²² Ne ketà ne mibmerungkug ini se menge edumdumaan din ne uman senge etew ne mid-insà te, “Entei, Kerenan, kenà ma siaken?”

²³ Ne migkahi si Hisus te, “Ini se ebpekidtuhen ne edeluwit en te pan din ke ed-ulug kediey.

²⁴ Su egkeimetayan ke Impeanak te Menusiyà iring dut te nekahi te impesurat ne Lalag te Eleteala rengan, ugaid ne meraat nevenar se egketemanan din ini se etew ne ed-ulug kandin. Iyan pà tumù ne warà ianak sikandin.”

²⁵ Ne si Hudas ke ebpesigkem ki Hisus ne migkahi te, “Entei, Meyterù, kenà ma siaken?” Ne migkahi si Hisus te, “Na, wey migkahi nu en iya.”

Ke Ketepusan ne Kinelavung te Kerenan Tew wey ke Edumdumaan Din

(Marcos 14:22-26; Lucas 22:14-20; 1 Kurintu 11:23-25)

²⁶ Gewii te egkaan dan ne migkuwa ni Hisus ini se egkeenen dan ne pan ne impeselamat din te Eleteala, ne mibpenevitevi din ne imbehey rin diyà te menge edumdumaan din se egkahi te, “Kua niyu ini ne keena niyu, su ini ke lawa ku.”

²⁷ Ne ketà ne migkuwa ni Hisus ke ed-inumen ne impeselamat din te Eleteala ne imbehey rin kandan se egkahi te, “Inum kew kayi, langun niyu.

²⁸ Ini ke lengesa ku,” ke si Hisus, “ne ebpeketudà ne ibavas te menge etew, su tuus ini te egketuman en ke impasad te Eleteala rengan te ebpekepelihau en ke menge etew dut te keberedusaan dan.

²⁹ Egkehiyen ku ini keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te ebpekeamung kew en te Edetuan te Amey ku ne Eleteala ne ketà ne egkevehu en ke ed-inumen tew.”

³⁰ Nekepasad dan ketà ne migkanta ran te kedeyù dan te Eleteala ne riyà dan en mebpesinaru te buvungan ne ed-ingaranan te Ulivuwen.

Impayag neraan ni Hisus ke Kebparew ni Pedro te Teleduma Ran

(Marcos 14:27-31; Lucas 22:31-34; Juan 13:36-38)

³¹ Ne migkahi pà maa si Hisus dut te edumdu-maan din te, “Ini ne kerukileman ne langun niyu ne ebpelahuy ne edtehaken a niyu su ruen Lalag te Eleteala ne impesurat din ne egkahi te, ‘Ebpeimetayan ku ke tumetuganur rut te menge bilibili, ne egurunsuwey ke menge bilibili rin.’

³² Ugaid,” ke si Hisus, “ne embiya egkevanew ad, ne ed-una ad keniyu riyà te inged ne Geliliya.”

³³ Ne migkahi si Pedro te, “Misan edtehaken ka rut te langun dan, ne siaken ne kenà!”

³⁴ Ugaid ne migkehiyan sikandin ni Hisus te, “Tentenuri nu ini te kenà pà ed-ukarà ke manuk te ini en ne kerukileman ne ketetelu a nu en ibparew te kenà a nu ruma.”

³⁵ Ugaid ne migkahi si Pedro te, “Kenà a ebpekekahi te iring ketà te kenà ki teleduma misan ebpekeunung a keykew te ed-imetayan!” Ne langun dut te minge edumdumaan ni Hisus, ne engketà ded dema se migkahi ran.

*Mibpengeningeni si Hisus diyà te Gitsimani
(Marcos 14:32-42; Lucas 22:39-46)*

³⁶ Ne ketà ne midlevundus en si Hisus wey ke minge edumdumaan din diyà te inged ne ed-ingaranan te Gitsimani. Guna su riyà dan en ne migkehiyan din sikandan te, “Pinuu kew rè be kayi su ebpengeningeni a keniyà te ubpu.”

³⁷ Ne miduma rin si Pedro wey ke teleari, ke minge anak ni Sibidyu. Ne nemutu nevenar sikandin wey nerurunù ke hinawa rin.

³⁸ Ne migkahi sikandin kandan te, “Merasey nevenar ini se hinawa ku su iring te egkevidtew en. Kayi kew rè be ne unung kew kediey.”

³⁹ Ne midlaus pà sikandin diyà te unaan dan ne midlangkeb en se ebpengeningeni te Eleteala te, “E, Amà, embiya egkepakey kenian te kenikew, ne ipesahad nu en kediey ini se keresayan ku! Ugaid ne misan iring en ketà se kiyug ku, ne iyan nu tumana ke keykew ne kiyug.”

⁴⁰ Neiseg-iseg ketà ne midliveran din ke tetelu ne etew ne edumdumaan din ne iyan din neu-maan se nekelipereng dan. Ne migkehiyan din

si Pedro te, “Meambe ke kenà kew ebpekektigker te ed-unung kediey te senge uras dà?”

⁴¹ Kenà kew lipereng, ugaid ne pengeningeni kew,” ke si Hisus, “su apey kew kenà ebpekeruma kayi te ebpenggeram keniyu. Su meveher perem ke hinawa niyu te eduma te lalag ku, ugaid ne midtaman dè be te kenà eduma ke lawa niyu.”

⁴² Ne mid-awà en maa si Hisus ne midsaup mibpengeningeni se egkahi te, “E, Amà, embiya kenà egkepakey ne ibpesahad kediey ini se keresayan ku, ne metuman en.”

⁴³ Ne ketà ne midlived en maa sikandin kayi te tetelu ne edumdumaan din ne iyan din neumaan se nekelipereng dan su midseharan dan en te turug.

⁴⁴ Ne mid-awà en maa si Hisus ne mibpengeningeni en maa te iketelu te arà ded ne pengeningeni rin.

⁴⁵ Ne midliveran din maa ke menge edumdumaan din te iketelu en ne migkahi te, “Maa, nekelipereng kew pè bes lavew? Ini en ke kebpalad dut te Impeanak te Menusiyà diyà te menge etew ne beniyagà.

⁴⁶ Enew kew en,” ke si Hisus, “su ini en ke etew ne ed-ulug kediey. Kuwa kiyu en su edtelavuk ki.”

Ke Kedsigkem ki Hisus

(Marcos 14:43-50; Lucas 22:47-53; Juan 18:3-12)

⁴⁷ Gewii te edlalag pà si Hisus ne nekeuma en si Hudas, senge etew ini rut te sepulù wey deruwa ne edumdumaan din. Ne nerumaan dut te

denda ne menge etew ne mibmemetarem dan te menge sundang wey menge behuval, su midsuhù dan dut te menge mepurù te terebpelengesa, ke menge meyterù te penduan, wey ke menge pekilukesen te menge Hudiyanen.

⁴⁸ Ugaid ne ketà te warà dan pà med-ipanew ne ruen ingkahi ni Hudas kandan te, “Ke etew ne ed-uvayen ku ne ed-erekan ku ne arà imbe ke ebpemengaan niyu. Sigkema niyu!”

⁴⁹ Nekeuma rà si Hudas ne mid-uvey rin en si Hisus se egkahi te, “Mebmelinew se egketemanan nu, Meyterù!” Ne arà pà ne mid-erekan din.

⁵⁰ Ne migkahi si Hisus te, “Suled, degdehawi nu en ini se impengkayi nu!”

Ketà ne migeweran dan en si Hisus ne mid-sigkem dan en, ne midesdesenan dan te egawed.

⁵¹ Ugaid ne ruen senge etew dut te ruma ni Hisus se mid-ulavut te sundang din ne midtibas din en ke sugshuen dut te pinekebmepurù te terebpelengesa ne nesempingan en te telinga rin.

⁵² “Ilipi nu ke sundang nu,” ke si Hisus, “su ke etew ne ebpengimatey te sundang ne sundang ded dema ke id-imatey kandin.

⁵³ Maa, warà nu ves metueni te egkepakey ne ebuyù a te tavang diyà te Amey ku ne Eleteala, ne seguguneey ne ibpepengkayi rin ke egngivuwan ne suluhuen din?

⁵⁴ Ugaid,” ke si Hisus, “ne kenà a su embiya ed-ul-ulaan ku arà ne memenu ve se kegketuman dut te impesurat ne Lalag te Eleteala ne egkahi te iyan iya se metuman te iring kayi?”

⁵⁵ Ne migkehiyan ni Hisus ke menge etew ne edsigkem kandin te, “Maa, tulisan a ne ebmeteraman niyu te sundang wey behuval te edsigkem kediey? Su uman ded ma hewii ne riyan a te Nekebpuru ne Valey te Eleteala se ebpenurù, ne warà e ma nikiyu sigkema ketà.

⁵⁶ Ugaid ne egked-ulaula ini langun su apey egketuman en ke Lalag te Eleteala ne impesurat dut te menge etew ne mibpelambas te lalag din dengan.” Arà dà ne mibpelahuy en ke menge edumdumaan din ne intahak dan en sikandin.

Mibpeneheewit si Hisus Diyà te Valey te Kuku-
man

(Marcos 14:53-65; Lucas 22:54-55, 63-71; Juan 18:13-14, 19-24)

⁵⁷ Ne mid-ewit si Hisus dut te menge etew ne midsigkem kandin diyà te baley ni Kayipas, ke Pinekemepurù te langun ne menge Terebpe-lengesa. Su rutun nevurun ke menge meyterù te penduan wey ke menge pekilukesen te menge Hudiyanen.

⁵⁸ Ugaid ne si Pedro, ne midtundugtundug ded kandan taman te nekeuma sikandin diyà te lama te valey dut te pinekemepurù te menge terebpe-lengesa. Ne rutun ne midlusud sikandin dut te lama ne mibpekid-amur en mibpinuu dut te menge bantey te baley su edtengtengan din ke engkey se ibped-ulaula ran ki Hisus.

⁵⁹ Ne ini se menge mepurù te terebpe-lengesa wey langun ne Perekukum ne mibpegelep dan mibpemengà ke engkey se id-isuhat dan ne kewagib ki Hisus misan kenà benar, su apey ran egkeimetayi.

⁶⁰ Ne misan duen merakel ne etew ne midtiti-
hus te kenà benar, ne warà netuen dan ne dait
ne id-imatey ki Hisus.

Netaman ne ruen en deruwa ne etew ne mid-
etuvang ki Hisus

⁶¹ ne migkahi te, “Nerineg dey,” ke sikandan,
“se egkahi ini se etew te, ‘Egkerundus ku ini
se Nekebpuru ne Valey te Eleteala ne mibeelan
te etew, ugaid ne ketà te tetelu ne hewii ne
igkepeitindeg ku en ke behu ne valey ne kenà
bineelan te etew.’ ”

⁶² Ketà ne mid-itindeg en ke Pinekemepurù
te menge terebpelengesa ne migkehiyan din si
Hisus te, “Engkey ve se keykew ne egkekahi?
Engkey, benar ini se id-isuhat dan ne kewagib
keykew?”

⁶³ Ugaid ne mibpeeneng-eneng dà si Hisus.

Ne migkahi pà maa ini se Pinekemepurù dut te
menge terebpelengesa te, “Ini ka te etuvangan te
Eleteala ne sesapà ka embiya sikuna ke Anak din
ne Impasad din ne Ebperetuen te langun.”

⁶⁴ Ne migkahi si Hisus te, “Benar ayan se
nekahi nu su siaken en iya. Ne sebenarvenar
ini se egkehiyen ku keniyu te kenà meuhet
ne egkekita niyu ke Impeanak te Menusiyà ne
ebpekepinuu riyà te egkekewanan te Eleteala ne
warà repeng te gehem din. Ne ketà te edlived
sikandin kayi ne egkekita niyu te edumaan te
sehulapun.”

⁶⁵ Nerineg dà dut te Pinekemepurù te Terebbe-
lengesa ke migkahi ni Hisus ne mibisey rin en
ke kumbalà din te kegkeepes din. Ne migkahi
te, “Nekesumpalit en sikandin te Eleteala kayi te

lalag din. Kenà ki en ebpemengà te ruma pà ne titihus su nerineg niyu en ini se kedsumpalit din!

⁶⁶ Ne engkey en se keniyu ne kukuman?"

Ne midtavak dan te, "Egkewegiban sikandin ne ed-imetayan en."

⁶⁷ Ne ketà ne mibpengilevan dan ke buked ni Hisus, ne mibedasan dan. Ne ruen midtabpì kandin

⁶⁸ ne migkahi te, "Na, embiya sikuna ke Impasad te Eleteala ne Ebperetuen te langun, ne kehiya nu ke entei se midtabpì keykew."

*Imparew ni Pedro te Teleduma Ran ki Hisus
(Marcos 14:66-72; Lucas 22:56-62; Juan 18:15,
25-27)*

⁶⁹ Ne kayi pà lavew te lama kayi te valey te Pinekemepurù te Terebpelengesa si Pedro, ne ruen meritan ne edsugsuhuen ketà te valey ne mid-uvey kandin. Ne migkahi te, "Sikuna rema ne ruma ka ni Hisus ke ebpuun te Geliliya."

⁷⁰ Ugaid ne mibparew si Pedro ketà te etuvangan te langun ne menge etew se egkahi te, "Kenà ku egkesebutan ayan se egkehiyen nu."

⁷¹ Ne mid-ip-ipanew en sikandin se ebpependiyà te bengawan te lama. Nekita en maa si Pedro te senge etew ne meritan ne edsugsuhuen ketà ne migkahi diyà te menge etew ne nevrurun te, "Ayan se etew ne teleduma ki Hisus ne riyà ebpuun te Nesarit."

⁷² Nerineg ni Pedro, ne mibparew rin ded maa se egkahi te, "Mekahat e pà te sapà ku ke teleduma key!"

⁷³ Neiseg-iseg manen ne mid-uvey ketà ke menge etew ki Pedro ne migkahi te, “Benar iya ne teleduma kew,” ke sikandan, “su kayi rà te lalag nu ne egketuusan en!”

⁷⁴ “Dusa kedì,” ke si Pedro, “ke embiya teleduma key keninyan te etew ne egkehiyen niyu!”

Arà dà iya ne mid-ukarà en ke manuk.

⁷⁵ Ne ketà ne netenuran ni Pedro ke migkahi ni Hisus kandin te, “Kenà pà ed-ukarà ke manuk te ini en ne kerukileman, ne ketetelu a nu en ibparew te kenà ki teleduma.” Ne midlihawang si Pedro ne midrahukrahuk te kedsinehew rin.

27

Mid-ewit dan si Hisus Diyà te ki Pilatu

(Marcos 15:1; Lucas 23:1-2; Juan 18:28-32)

¹ Mesmeselem pà ne nevrurun en ke langun ne menge mepurù te terebpelengesa wey ke menge pekilukesen te Hudiyanen ne neumpung dan en ke engkey se ed-ul-ulaan dan te ked-imatey ki Hisus.

² Ne mibakù dan te kedina si Hisus ne mibpeneheewit dan sikandin diyà te ki Pilatu, ke gubinedur ne Rumanu.

Ke Kinepatey ni Hudas Iskeriyuti ke Mid-ulug ki Hisus

(Nenged-ulaula 1:18-19)

³ Guna su netuenan ni Hudas, ini se senge etew ne mid-ulug ki Hisus, te riyen en si Hisus te etuvangan ni Pilatu su egkukumen en te ebpeimetayan ne nekedsendit nevenar sikandin kayi te mid-ulaula rin. Ne mibpendiyà te menge

mepurù te terebpelengesa wey menge pekilukesen te menge Hudiyanen ne in-uli din ke tetelu nepulù ne pirak ne pelatà.

⁴ “Nekesalà a,” ke sikandin, “su impesigkem ku arà se etew ne warà salà din!”

Ne migkahi ran te, “Engkey se kenami ketà? Keykew rà ayan!”

⁵ Ne insewirà din ke kureta diyà te lusud te Nekebpuru ne Valey te Eleteala, ne mid-ipanew en se ed-ehet te lawa rin ne mid-iket te lieg din ne mid-umpak.

⁶ Ne mibpemurut dut te menge mepurù te terebpelengesa ini se kureta se egkahi te, “Ini se kureta ne imbayad te ibpeimatey te etew ne ebpekesurang ki te Penduan tew embiya idtahù ta ini kayi te edtehuan te kureta kayi te Nekebpuru ne Valey te Eleteala.”

⁷ Na geina te iring ketà ne mibpengasak dan ke engkey se ebpeetahan dan kayi te kureta, ne neumpungan dan te ibpemasa te tanà dut te etew ne ediyun te kuren su ebeluyen ne penlelevengan te menge etew ne ebpekevehu ne ebpatey ketà.

⁸ Tembù be igenat ketà ne hewii ne mid-ingaranan arà se tanà te “Tanà ne Mibayaran te Lengesa” ne iyan din meana ne nepemasa te imbayad te ebpeimatey.

⁹ Ne ini se ned-ulaula ne netuman ke impesurat te Eleteala ki Jeremias senge etew rengan ne mibpelambas te Lalag din se egkahi te, “Migkuwa ran ke tetelu nepulù ne kureta ne pelatà, ini se mid-umpungan te menge etew te Israyil ne ibayad te ebpeimatey kandin,

10 ne arà se impemasa ran te tanà te etew ne ediyun te kuren. Ini se impesabut kediey te Kerenan,” ke si Jeremias rengan.

Mid-ewit Dan si Hisus Diyà te ki Pilatu ke Gubinedur ne Rumanu

(Marcos 15:2-5; Lucas 23:3-5; Juan 18:33-38)

11 Ne mibpeneheewit dan si Hisus diyà te ki Pilatu ke gubinedur ne impeetuvang dan ki Pilatu su ed-insaan. “Menu,” ke si Pilatu, “sikuna en iya ke ratù te menge Hudiyanen?”

“Uya, ayan iya se migkahi nu,” ke si Hisus.

12 Ugaid ne langun ne in-isuhat dan kandin ne kewagib dut te menge mepurù te terebpelengesa wey ke menge pekilukesen te menge Hudiyanen ne warà din tevaka.

13 Ne ketà ne migkahi en maa si Pilatu ki Hisus te, “Menu, kenà ke en be edtavak kayi te langun ini ne in-isuhat dan kenikew?”

14 Ugaid ne warà en megkahikahi si Hisus te misan senge tahà dà, ne ketà ne neinuinu nevenar si Pilatu.

Migkukum Dan te Ed-imetayan si Hisus

(Marcos 15:6-15; Lucas 23:13-25; Juan 18:39-19:16)

15 Ne iyan nelayaman ni Pilatu te uman egkeuma ke Pista te Kedsehari te Suluhuen ne ruen ibpelihawang din ne senge etew ne vilanggù ne ebuyuen dut te menge etew.

16 Ketà dema ne hewii ne ruen senge etew ne nevilanggù ne ed-ingaranan ki Barabas su nevantug te meraat ne mid-ulaula rin.

17 Guna su ruen en denda ne menge etew ne nevrurun ne mid-insà si Pilatu te, “Menu, endei rapit se ibpelihawang ku, Si Barabas etawa si Hisus ke Impasad te Eleteala ne Ebperetuen te langun?”

18 Iyan din migkahi ini su netuenan din se ini se id-isuhat ne kewagib ki Hisus dut te menge mepurù te terebpelengesa ne sabap dut te kegkesihi ran kandin.

19 Ikeruwa rin ne gewii te kebpinuu diyà te kukuman ne ruen nekeuma ne telaan te esawa rin ne egkahi te, “Kenà ka ebpekid-ubpu dut te meraat ne idwagib dan keniyen te etew ne warà salà din. Su geina te merukilem ne ruen tehinepen ku mekeatag kandin ne nepesangan a.”

20 Ugaid ne ini se menge mepurù te terebpelengesa wey ke menge pekilukesen te Hudiyanen ne mibpemitiyeraan dan ke menge etew te iyan dan buyua ki Pilatu ne ibpelihawang si Barabas ne ebpeimetayan si Hisus.

21 Ne migkahi en maa si Pilatu ke gubinedur te, “Menu, endei rapit kayi te deruwa ini se egkiyuhan niyu ne ibpelihawang ku?”

“Si Barabas!” ke sikandan.

22 “Embiya iring ketà se egkiyuhan niyu,” ke si Pilatu, “ne ebmemenuwen ku be si Hisus ini se Impasad te Eleteala ne Ebperetuen te langun?”

“Ibpelansang nu riyà te ebpebelevahen ne kayu!” ke se menge etew.

23 “Meambe?” ke si Pilatu. “Engkey se meraat ne mid-ulaula rin?”

Ugaid ne nasi en ne mid-iseg se kebpemensag dan te, "Ibpelansang nu sikandin diyà te ebpebelevahen ne kayu!"

²⁴ Guna su nesebutan ni Pilatu te kenà en egkepakey ne ibpeengked ke menge etew su deisek dà ne egkehuvut en, ne migkuwa sikandin te wayig ne mibpenlùlù sikandin te velad din dutun te etuvangan te menge etew su tuus ini te kenà sikandin ebpekid-ubpu dut te ked-imetayi ki Hisus. Ke sikandin te, "Warà kediey ke egkevudsi te lengesa keniyen te etew! Keniyu rà ayan!"

²⁵ Ne migkahi ke langun ne menge etew te, "Dusai key en abpeg ke menge kevuwaran dey ke egkevudsi ke lengesa rin!"

²⁶ Ketà ne impelihawang en ni Pilatu si Barabas. Ne si Hisus embe ke imperuug din ne imbehey rin en kandan te ibpelansang diyà te pinebelavag ne kayu.

Pinebparas si Hisus te Datù Dut te Menge Sundaru te Kedsumpalit dan kandin su uvag kun Datù

(Marcos 15:16-20; Juan 19:2-3)

²⁷ Ne impelusud en te menge sundaru si Hisus dut te turuhan te gubinedur, ne miburun ketà ke langun ne menge sundaru.

²⁸ Ne midluungan dan te velegkas din ne pinelelembung dan te merihà su uvag kun ne ratù.

²⁹ Ruen impetengkulu kandin ne mibeelan dan ne ruhiyen ne wahed, ne ruen kayu ne mibpeweran dan kayi te kewanan din. Ne ketà ne mibpenimbuel dan kayi te sineruwan din

su uvag kun ed-adat dan kandin se egkahi te, “Mebereumur ka ne ratu te menge Hudiyane!”

³⁰ Ne mibpengilevan dan sikandin, ne migkuwa ran ke kayu kayi te velad din ne imbas dan dut te ulu rin.

³¹ Guna su neipus ke kedsumpalit dan kandin, ne midluung dan en ke meriha ne impelembung kandin ne inseluub dan ded ke kandin ne belegkas ne mid-ewit dan en sikandin diyà te ebpelensangan kandin.

Inlansang si Hisus Diyà te Pinebelavag ne Kayu (Marcos 15:21-32; Lucas 23:26-43; Juan 19:17-27)

³² Guna su riyà dan en te ralan te kebpenheewita ran en kandin ne ruen etew ne edingaranan ki Simon ne riyà ebpuun te Sirini ne nesinuhung dan, ne mibpehes dan te ibpetiang ke pinebelavag ne kayu ne edtiangen ni Hisus.

³³ Nekeuma ran diyà te dapit ne mid-ingaranan te Gulguta, ne iyan din meana ne “Tulan te Ulu.”

³⁴ Ne ketà ne ebpeinum dan perem si Hisus te binu ne midsewuhan dan te mepait ne vawì, ugaid ne guna su neheraman din ne warà din inuma.

³⁵ Arà dà ne inlansang dan en si Hisus diyà te pinebelavag ne kayu. Neipus dan ne mibunutbunutan dan ke velegkas din ke entei se ebpekegkemuney kandan.

³⁶ Ne mibpinuu ran se ebantey kandin.

³⁷ Ne riyà te divavew te ulu rin ne impikit dan ke midsuratan te in-isuhat dan ne kewagib ki Hisus se egkahi te, “Si Hisus ini Ke Ratù te menge Hudiyane.”

38 Ne ruen deruwa ne tulisan ne inlansang dan dema duma ki Hisus, seveka kayi te egkeke-wanan din, ne seveka kayi te egkehivang din.

39 Ke minge etew ne midsahad kandin ne mibpendungkàdungkà dan te ked-undaunda ran kandin se egkahi te,

40 “Na, endei embe ke migkahi nu ne egkerundus nu ini se Nekebpuru ne Valey te Eleteala ne ketà te tetelu ne hewii ne igkepeitindeg nu manen ke vehu pà? Embiya benar ne Anak ka te Eleteala, ne ibpelihaun nu ke hinawa nu! Pemenaug ke en keniyen te midlensangan keykew!”

41 Ne engketà ded dema ke ked-undaunda rut te minge mepurù te terebpelengesa, minge meyerù te penduan wey ke minge pekilukesen te Hudiyanen se ebpelelelahey ran te,

42 “Nekepelihaun kun sikandin te minge ruma rin, ugaid ne ke kandin ne hinawa ne kenà din egkegaga. Menu, kenà sikandin ke ratù te minge Hudiyanen? Embiya ebpekepemenaug sikandin keniyen te midlensangan kandin, ne ebpekeperetiyaya ki te sikandin ke Impasad te Eleteala ne Ebperetuen te langun.

43 Migkahi rin te Eleteala se edserihan din ne migkahi rin pà te Anak sikandin te Eleteala. Na ed-intengan ta ve ke Eleteala se edtavang kandin!”

44 Ne misan dema ke deruwa ne tulisan ne inlansang diyà te idsengeriveluyà din ne elin en ne ed-undaunda kandin.

Ke Kinepatey ni Hisus

(Marcos 15:33-41; Lucas 23:44-49; Juan 19:28-30)

⁴⁵ Ne ketà te neudtu en ke andew ne mibmerusirem en ke tivuuk ne kelibutan lusud te tetelu ne uras.

⁴⁶ Ketà te tetelu ne uras ne migkuleyì si Hisus te merahing se egkahi te, “Ili, ili, lama seabtani?” Ne iyan din meana se, “Ey, Eleteala ku, Eleteala ku, meambe ke mid-ewaan a nu?”

⁴⁷ Ne ruen munge etew ne nekeitindeg ketà ne nekerineg kandin ne migkahi te, “Pemineha niyu ma su ebpengumawen din en si Elias.”

⁴⁸ Senge etew ketà se midahewrahew migkuwa kayi te in-ered te tebà ne midtiyuk din en te deisek ne terekayu ne insugkar din diyà te bèbà ni Hisus su ibpeesep.

⁴⁹ Ugaid ne ruen migkahi te, “Na ed-intengan tew ve ke edlepew si Elias se ebpeawà kandin ketà!”

⁵⁰ Ne migkuleyì en maa si Hisus te merahing ne nependusan en sikandin te hinawa.

⁵¹ Diyà te Nekebpuru ne Valey te Eleteala ne ruen mekepal ne saput ne impehelet dut te insivey ne ed-ubpaan te Eleteala, ne ketà te kinepatey ni Hisus ne nevindas kayi te luuk ini igenat te divavew taman te diralem. Ne midlinug ne nengetevì ke derekelà ne watu.

⁵² Ne ruen munge penlelevengan ne surung ne nengepuwasan, ne merakel ke minatey ne mibperetiyyaya ki Hisus ne nengevanew en.

⁵³ Ne mibpenlihawang dan dut te leveng dan ne ketà te nevanew en si Hisus ne mibpendiyà

dan te inged ne Hirusalim ne riyà dan mekita te merakel ne etew.

⁵⁴ Ne ini se kepitan wey ke menge ruma rin ne sundaru ne ebantey ki Hisus, ne nengeandek dan nevenar dut te neheram dan ke linug wey nekita ran ke langun ne ned-ulaula ketà. Ke sikandan te, “Benar ini ne Anak te Eleteala!”

⁵⁵ Ne ruen dema ketà merakel ne menge meritan ne miduma ki Hisus ne egenat te Geliliya ne midtavang kandin. Ed-it-itindeg dan ini diyà te malù meriyù su edtengteng kandin.

⁵⁶ Ne elin ketà si Maria Magdalina, si Maria ke iney ni Santiago ki Jose, wey ke esawa ni Sibidiyu.

Ke Kineleveng ki Hisus

(Marcos 15:42-47; Lucas 23:50-56; Juan 19:38-42)

⁵⁷ Guna su malù en edsanlep ke andew ne ruen nekeuma ne senge etew ne meama ne kewasa ne riyà ebpuun te Eremetiya. Iyan din ngaran ne si Jose ne sakup dema sikandin ni Hisus.

⁵⁸ Mibpendiyà sikandin te ki Pilatu ne mibuyù din ke bangkey ni Hisus, ne insuhù en ni Pilatu te ibpevehey.

⁵⁹ Ne migkuwa rin en ke vangkey diyà te midlensangan kandin, ne mibukusan din te behu ne malung ne meputi,

⁶⁰ ne in-awuk din en ketà te behu pà ne leveng ne imbangbang diyà te dempilas ne intail ne kandin ne leveng. Ne ruen dekelà ne batu ne midlilid din ne inlekeb ketà te bengawan te leveng ne mid-ewaan din en.

⁶¹ Ne si Maria Magdalena wey senge etew pà ne Maria ne mibpinuu ketà se edsinaru dut te leveng.

Mibpeventayan ke Leveng ni Hisus

⁶² Ne ketà te neketundug ne andew, ne Sepetu ini, ne mibpendiyà te ki Pilatu ke menge mepurù te terebpelengesa wey ke menge Peresiyu,

⁶³ ne migkahi kandin te, “Datù, netenuran dey te biviyag pà arà se teruen ne migkahi te, ‘Egkevanew e red ketà te iketelu ne hewii.’

⁶⁴ Tembù be peventayi nu nevenar ke leveng din lusud te tetelu ne hewii, su kalu ke penekawa ke vangkey rin dut te menge edumdumaan din ne ebpenudtulan dan ke menge etew te nevanew sikandin. Ne embiya arà se egkehiyen dan ne ebpehimbenaren dut te menge etew ne egkeumanan pà ke kegkelimbungi rut te menge etew.”

⁶⁵ “Kuwa kew en te menge sundaru,” ke si Pilatu, “ne peventayi niyu nevenar ke leveng.”

⁶⁶ Ne ketà ne mibayaan dan en ke leveng ne midtehuan dan te tuus ke batu ne inlekeb su apey ran egketueni ke newaleng te misan deisek dà, ne mibpeventayan dan en te menge sundaru.

28

Ke Kinekevanew ni Hisus

(Marcos 16:1-10; Lucas 24:1-12; Juan 20:1-10)

¹ Guna su neipus ke Hewii te Id-imeley ne mehaan en egkepawà te hewii te Akad ne mibpendiyà si Maria Magdalina wey ke senge

etew ne Maria su ed-intengan dan ke leveng ni Hisus.

² Ne ketà ne ruen midtekew ne linug, ne ruen mibpehunrenà ne suluhuen te Eleteala ne midlilid din ke batu ne inlekeb dut te leveng ne mibpinuuwan din en.

³ Ne ke paras din ne egkinrab iring te kilat, ne mibpeneringsing te keputi te velegkas din.

⁴ Ne migkerker ini se menge ebantey te kegke-andek dan ne nevidtawan dan iring te minatey en.

⁵ Ugaid ne migkahi ke suluhuen kayi te menge meritan te, “Kenà kew meandek!” ke sikandin. “Su netuanan ku te ebpemengà kew ki Hisus ke inlansang dan diyà te pinebelavag ne kayu.

⁶ Ugaid ne warè en kayi su nevanew en iring dut te migkahi rin. Pengkayi kew ne intengi niyu ini se midtehuan dan kandin.

⁷ Ne pekehaan kew se ed-ipanew ne penudtula niyu riyà te menge edumdumaan din te nevanew en sikandin ne mid-una en sikandin keniyu riyà te Geliliya ne riyà kew ebpemekegkita. Na kenà niyu lipati ini se migkahi ku keniyu.”

⁸ Arà dà ne migaangaan mid-awà ke menge meritan dut te leveng. Nengeandek dan ugaid ne netehuan dan te dekelà ne kegkehalew ne mibpelelahuy ran se ebpenudtul diyà te menge edumdumaan ni Hisus.

⁹ Ugaid ne gewii ran te ed-ipanew ne midtekew mibalak si Hisus kandan ne migkahi en te, “Mebmerinew se egketemanan niyu!” Ne mid-uvay ran kandin ne midlumpeng dan se egawed te paa rin te ebpengarap kandin.

10 “Kenà kew meandek!” ke si Hisus. “Beyai niyu ke menge edumdumaan ku ne pependiyana niyu sikandan te Geliliya ne diyan a nikandan egkekita.”

Midselipsipan dut te Menge Mepurù te Terebpelengesa te dekelà ne pirak ke Menge Sundaru ne Mibantey te Leveng ni Hisus apey ran Mekepenudtul te Nepenakew ke Bangkey ni Hisus

11 Ne ketà te kineipanew en dut te menge meritan se ed-awà kayi te leveng, ne mibpendiyan en te Hirusalim ke menge sundaru ne ebantey te leveng su mibpenudtulan dan ke menge mepurù te terebpelengesa te langun ne ned-ulaula kayi.

12 Arà dà ne miburun en dut te menge mepurù te terebpelengesa ke menge pekilukesen te Hudiyanen ne mibpengasak dan ke engkey se ed-ul-ulaan dan. Guna su neupakat dan en ne mibehayan dan te dekelà ne pirak ke menge sundaru

13 ne migkahi ran te, “Penudtula niyu diyà te menge etew te mibpenakew dut te menge edumdumaan ni Hisus ke bangkey rin te merukilem te gewii niyu te nekelipereng.

14 Ne embiya egkerineg ini dut te gubinedur,” ke sikandan, “ne kenà kew egkeururu su sikami rà se ebpetuntey kandin su apey kew kenà ed-isuhata.”

15 Ne midtelimà dut te menge sundaru ini se kureta ne midtumañ dan arà se insuhù kandan. Tembù be taman te ini en ne hewii ne ini red ke ebpemenudtulen te menge Hudiyanen.

Mibpekita si Hisus Dut te Sepulù wey Seveka ne Edumdumaan Din
(*Marcos 16:14-18; Lucas 24:36-49; Juan 20:19-23; Nenged-ulaula 1:6-8*)

¹⁶ Ne ini se sepulù wey seveka ne edumdumaan ni Hisus, ne mibpendiyà dan te Geliliya ketà te buvungan ne migkahi ni Hisus kandan.

¹⁷ Guna su nekita ran sikandin ne mibpengarap dan kandin, misan duen kandan eduwaruwa se hinawa ran ke si Hisus ini se nekita ran.

¹⁸ Ugaid ne mid-uvey si Hisus kandan ne migkahi te, “Langun ne gehem te kebayaàdiyà diyà te langit wey kayi te ampew te dunya ne imbehey en kediey.”

¹⁹ Na, pendiyà kew te langun ne minge etew kayi te ampew te dunya ne penurua niyu sikan-dan ke memenu se kebpesakup dan kediey. Ne pembunyahi niyu ke minge etew ne ebpesakup kediey te tuus te keduma ran te Eleteala, wey siaken ke Anak din, wey ke Kedesenan ne Ebpetuntul te Menusiyà.

²⁰ Ne penurua niyu sikandan te kedtuman dut te langun ne impenurù ku keniyu. Ne ini se idtahù niyu te hinawa te layun a eduma keniyu taman te taman.

clxx

Manobo, Ilianen
Manobo, Ilianen: Ke meupiya ne tudtul mekeatag ki
Hisu Kristu New Testament

copyright © 1989 Wycliffe Bible Translators, Inc.

Language: Manobo, Ilianen

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025

8fce2a78-a796-51ec-acdb-22430c0b7b13